

Giduc Mienh Naaic



Ging-Sou Dau

Zoc caux Porv Nyei Mienh:
Zeuz, Yauzsing
2013

Da'yietv joux waac naaic:

Tin-Hungh dau maiv sienx Ninh nyei mienh nyei daux gaux fai tov nyei fai?

Tin-Hungh ei ninh nyei za'eix, ninh haih ginv zoux nyungc-nyungc doix-diuc ninh nyei fiem-fingx. Se gorngv ninh ginv dau maiv sienx nyei mienh tov nyei, ninh haih zoux ei ninh nyei za'eix caux cong-mengh. *Mv baac Ging-sou mengh nyei gorngv Tin-Hungh maiv muangx yaac maiv dau* laanh laanh mienh daux gaux nyei caux tov nyei. Ging-sou mengh nyei gorngv taux zoqc-zoqc maaih 15 nyungc mienh dongh Tin-Hungh maiv dau ninh mbuo nyei daux gaux fai tov nyei waac. Ging-sou gorngv Tin-Hungh maiv dau naaiv deix mienh nyei daux gaux fai tov nyei waac:

1. Tov dorngc fai tov weic douh ganh duqv longx nyei mienh.

"Meih mbuo tov liuz yaac maiv duqv weic zuqc meih mbuo tov dorngc, kungx oix longc dorh mingh zoux henh mbienx hnangv" (Yaagorpc 4:3)

2. Sueih zuiz yiem hnyouv nyei mienh.

"Se gorngv yie sueih zuiz yiem yie nyei hnyouv, Ziouv zungv maiv muangx yie" (Singx Nzung 66:18)

3. Baamz jienv zuiz mingh nyei mienh.

"Mangc maah! Ziouv nyei buoz maiv zeiz nangv, maiv haih njoux meih mbuo. Ninh nyei m'normh yaac maiv zeiz ndung, maiv haih muangx meih mbuo. 2 Mv baac meih mbuo nyei zuiz bun meih mbuo caux meih mbuo nyei Tin-Hungh nqaeqv jienv. Meih mbuo nyei zuiz torngv ninh nyei hmien, bun ninh maiv mangc meih mbuo yaac maiv muangx meih mbuo" (I^saa^yaa 59:1-2); "Mbuo hiuv duqv Tin-Hungh maiv muangx baamz zuiz mienh nyei waac. Mv baac haaix dauh taaih Tin-Hungh, ei jienv ninh nyei eix zoux, ninh muangx wuov dauh" (Yo^han 9:31).

4. Zoux sic mangc piex Tin-Hungh nyei mienh.

"Dorn taaih ninh nyei die, bou yaac taaih ninh nyei ziouv. Se gorngv yie zoux meih mbuo nyei Die, meih mbuo weic haaix diuc maiv taaih yie? Se gorngv yie zoux meih mbuo nyei ziouv, meih mbuo weic haaix diuc maiv gamh nziex yie? O mangc piex yie nyei mbuox nyei sai mienh aah! Nernh Jiex nyei Ziouv hnangv naaiv gorngv. "Meih mbuo naaic gaax, 'Yie mbuo hnangv haaix nor mangc piex meih nyei mbuox?' 7 "Meih mbuo dorh maaih uix nyei nyanc hopv daaih an yie nyei ziec-dorngv. "Meih mbuo gorngv, 'Yie mbuo hnangv haaix nor zoux bun meih maaih uix?' "Se weic zuqc meih mbuo mangc piex Ziouv nyei dieh. 8 "Meih mbuo dorh m'zing maengh nyei saeng-kuv daaih zoux ziec nyei ga'naaiv se maiv zeiz zoux orqv sic fai? Meih mbuo dorh buoz-zaux waaic, butv baengc nyei saeng-kuv daaih fongc horc bun yie se maiv zeiz orqv sic fai? Meih mbuo dorh naaiv deix ga'naaiv mingh bun saengv-ziouv mangc gaax, ninh a'hneiv meih mbuo, oix zipv meih mbuo fai?" Naaiv se Nernh Jiex nyei Ziouv gorngv nyei waac. (Maa^laa^ki 1:6-8)

5. Guangc maiv muangx maiv ei Ziouv nyei mienh.

“Ziouv hnangv naaiv gorngv taux naaiv deix baeqc fngx. “Ninh mbuo a'hneiv hnangv naaiv youh jienv mingh, maiv zoux haaix nyungc bun ninh mbuo nyei zaux dingh. Weic naaiv Ziouv maiv a'hneiv ninh mbuo, ih zanc ninh oix jangx ninh mbuo nyei zuiz-nipc, yaac dingc ninh mbuo nyei zuiz.” 11 Ziouv aengx gorngv mbuox yie, “Maiv dungx weic naaiv deix baeqc fngx daux gaux tov bun ninh mbuo duqv kuh yiem. 12 Maiv gunv ninh mbuo zei maiv nyanc haaix nyungc, yie maiv muangx ninh mbuo heuc jienv tov nyei qiex. Maiv gunv ninh mbuo fongc horc buov ziec nyei ga'naaiv caux ziec nyei laangh ziqc, yie maiv zipv ninh mbuo. Yie oix bun ninh mbuo zuqc nzuqc ndaauv, zuqc ngorc hnaangx, yaac zuqc wuon-baengc mietc ninh mbuo.” (Ye[^]le[^]mi 14:10-12).

6. Ngaengc maiv muangx Ziouv heuc nyei mienh.

Weic zuqc yie heuc meih mbuo, meih mbuo yaac maiv kangv muangx. Yie sung buoz yaapy, mienh yaac maiv guen maiv sic nyei. 25 Meih mbuo nqemh yie kuinx nyei yiect zungv waac. Yie gorngv-njaaux, meih mbuo yaac maiv kangv muangx. Wuov zanc meih mbuo oix heuc yie, yie yaac maiv dau. Meih mbuo oix zimh lorz yie, yaac lorz maiv buac, (Cong-mengh 1:23-25, 28)

7. Maiv muangx Ziouv nyei lingc caux leiz nyei mienh.

“Haaix dauh maiv muangx leiz-latc, liemh ninh daux gaux nyei waac benx Tin-Hungh funx youx haic, gamh nziev haic nyei sic.” (Cong-mengh 28:9). “Mv baac ninh mbuo maiv kangv muangx, pingv mba'dauh, yaac zotv jienv m'normh kuotv zoux bun ninh mbuo ganh muangx maiv haiz. 12 Ninh mbuo bun ninh mbuo nyei hnyouv ngaengc ndongc la'bieiv. Nzauh heix muangx haiz leiz-latc caux Nernh Jiex nyei Ziouv longc ninh nyei Singx Lingh bun zinh ndaangc nyei douc waac mienh gorngv nyei waac. Weic naaiv Nernh Jiex nyei Ziouv qiex jiez! haic ninh mbuo. 13 “Nernh Jiex nyei Ziouv gorngv, ‘Yie heuc ninh mbuo, ninh mbuo yaac maiv muangx. Ninh mbuo heuc yie, yie yaac maiv muangx.” (Se[^]kaa[^]li[^]yaa 7:11-13)

8. Zotv m'normh maiv muangx mienh jomc mienh heuc jienv tov nyei mienh.

“Haaix dauh zotv jienv m'normh maiv muangx mienh jomc mienh heuc jienv tov nyei qiex, ninh ganh heuc jienv tov nyei ziangh hoc yaac maiv maaih haaix dauh dau” (Cong-mengh 21:13)

9. Buoz maaih nziaamv guoqv jienv nyei mienh.

Mangc naaiv deix ging-sou gorngv camv nyei gorngv taux mienh zoux nyei zuiz (E[^]se[^]ken 7:23; Maako 7:21-23; Lomaa 3:10-18; Gaa[^]laa[^]tie 5:19-21). “Meih mbuo sung jienv buoz daux gaux nyei ziangh hoc, yie oix buang jienv yie nyei m'zing maiv mangc meih mbuo. Maiv gunv meih mbuo daux gaux camv, yie maiv muangx. Meih mbuo nyei buoz maaih daix mienh nyei nziaamv guoqv buangv nzengc.” (I[^]saa[^]yaa 1:15) “Mv baac meih mbuo nyei zuiz bun meih mbuo caux meih mbuo nyei Tin-Hungh nqaevq jienv. Meih mbuo nyei zuiz torngv ninh nyei hmien, bun ninh maiv mangc meih mbuo yaac maiv muangx meih mbuo. 3 Weic zuqc meih mbuo nyei buoz maaih nziaamv guoqv jienv. Zuiz

yaac guoqv jienv meih mbuo nyei buoz-ndoqv. Meih mbuo nyei nzuih gorngv-baeqc, meih mbuo nyei mbietc gorngv orqv nyei waac" (I[^]saa[^]yaa 59:2-3).

10. Zangc zienh nyei mienh.

"Weic naaiv Ziouv hnangv naaiv gorngv, 'Mangc maah! Yie oix bun ninh mbuo zuqc orqv sic. Ninh mbuo maiv haih biaux maiv ndutv. Maiv gunv ninh mbuo heuc yie, yie maiv muangx ninh mbuo. 12 Yu[^]ndaa nyei zingh nyei mienh caux yiem Ye[^]lu[^]saa[^]lem nyei baeqc fingx ziouc mingh heuc dongh ninh mbuo buov hung bun wuov deix zienh. Mv baac zuqc kouv nyei ziangh hoc, naaiv deix zienh njoux maiv duqv ninh mbuo. 13 Yu[^]ndaa Mienh aah! Meih mbuo nyei zienh caux meih mbuo nyei zingh fih mbuoqc nyei. Meih mbuo weic gamh nziev nyei Mbaa[^]an zienh liepc buov hung dieh ndongc Ye[^]lu[^]saa[^]lem nyei jaai-horngc camv.' 14 "Maiv dungx weic naaiv deix baeqc fingx daux gaux. Maiv dungx weic ninh mbuo heuc jienv tov fai tengx ninh mbuo daux gaux, weic zuqc ninh mbuo buangh zuqc kouv nyei ziangh hoc heuc yie, yie maiv muangx ninh mbuo."

(Ye[^]le[^]mi 11:11-14) "Ninh aengx gorngv mbuox yie, "Baamh mienh aah! Meih buatc nyei fai? Meih corc haih duqv buatc gamh nziev nyei sic gauh hlo jiex naaiv." 16 Ninh aengx dorh yie bieqc Ziouv nyei biau nyei laatc gu'nyuoz wuov kang. Yiem Ziouv nyei biau nyei gaengh ndaangc, bingx laangh dorngh caux ziec-dorngh mbu'ndongx, maaih leih maiv go nyic ziepc hmz laanh mienh. Ninh mbuo nyei diqc daanz huin Ziouv nyei biau wuov bung. Ninh mbuo nyei hmien huin dong bung. Ninh mbuo yaac baaix yiem dong bung nyei mba'hnoi. 17 Ziouv aengx gorngv mbuox yie, "Baamh mienh aah! Meih buatc naaiv deix sic fai? Yu[^]ndaa nyei zeiv-fun yiem naaiv zoux naaiv deix gamh nziev nyei sic se faix-fiuv sic fai? Ninh mbuo yiem buangv deic-bung zoux ciouv nyei sic cuoqv yie gauh fatv qiex jiez. Ninh mbuo zorqv ndiangx-nquaah an ninh mbuo nyei mba'zorngh.. 18 Weic naaiv yie oix qiex jiez jienv zoux bun ninh mbuo. Yie nyei m'zing mangc ninh mbuo yaac maiv korv-fiqv yaac maiv korv-lienh ninh mbuo. Maiv gunv ninh mbuo qaqv heuc qiex mbui bieqc yie nyei m'normh, yie maiv muangx ninh mbuo." (E[^]se[^]ken 8:15-18)

11. Maiv maaih sienx fim nyei mienh.

"Mv baac tov nyei mienh oix zuqc longc sienx fim daux gaux, maiv dungx hlungh hluotv, weic zuqc haaix dauh hlungh hluotv se hnangv nziaaux buonc koiv jiez laangc mietv mingh mietv daaih nor. ⁷ Wuov dauh maiv zuqc hnamv daaih Ziouv oix bun haaix nyungc ninh, ⁸ weic zuqc wuov nyungc mienh maaih i diuc hnyouv. Zoux haaix nyungc yaac maiv dingc." (Yaagorpc 1:6-7).

12. Beih zaqc hnyouv njuotv nyei mienh fai ziangh maiv doix-dangc gorngv nyei mienh.

"Oix zuqc faix fim Faa[^]li[^]si Mienh nyei bingv. Eix leiz se ninh mbuo beih zaqc hnyouv njuotv" (Lugaa 12:1) "Naaiv deix mienh longc nzuih taaih yie, mv baac ninh mbuo nyei hnyouv leih duqv yie go haic". (Matv[^]tai 15:8)

13. Yiem hnyouv ceng hlo nyei mienh.

"Weic naaiv Ging-Sou gorngv, 'Tin-Hungh ngaengc jienv ceng-hlo nyei mienh, mv baac ninh ceix en bun nyiemc ganh zoux faix nyei mienh'" (Yaagorpc 4:6); "Meih mbuo lunx

wuov deix m'jangc dorn fih hnavgv nyei oix zuqc mbuoqc gox wuov deix gunv. Oix zuqc nyiemc ganh zoux faix, laanh fu-sux laanh, weic zuqc Ging-Sou gorngv, "Tin-Hungh ngaengc jienv zoux maux nyei mienh, mv baac ninh ceix en bun nyiemc ganh zoux faix wuov deix" (1 Bide 5:5).

14. Taaih ganh zoux hlo, maiv hiuv duqv qiemx zuqc Ziouv nyei mienh.

"Faa^li^si Mienh souv jienv wuov daux gaux gorngv, 'Tin-Hungh aah! Yie laengz zingh haic meih weic zuqc yie maiv hnavgv ga'nyiec nyei mienh. Yie maiv mauv ga'naaiv, yaac maiv zoux hnyouv pien, yaac maiv hienx auv. Maaih deix mienh zoux naaiv deix jauv mv baac maiv zeiz yie. Yie yaac laengz zingh haic meih, yie maiv hnavgv naaiv dauh siou nzou-zinh nyei mienh. Yietc norm leiz-baaix yie zeiz maiv nyanc haaix nyungc i nzunc. Yie duqv haaix nyungc, ziepc gouv yie bun yietc gouv meih. "Mv baac siou nzou-zinh wuov dauh souv jienv wuov maengx go deix nyei. Ninh liemh maiv cau hmien mangc gu'nguaaic lungh. Ninh za'gengh haiz hnyouv nzauh haic ziouc sung buoz nzuei la'kuotv gorngv, 'Tin-Hungh aah! Yie baamz zuiz camv haic aqv. Tov korv-lienh yie maah!" Yesu aengx gorngv, "Yie mbuox meih mbuo, siou nzou-zinh nyei mienh nzuonx nyei ziangh hoc ninh duqv caux Tin-Hungh horpc hnyouv. Mv baac wuov dauh Faa^li^si Mienh maiv duqv caux Tin-Hungh horpc hnyouv. Haaix dauh taaih ganh zoux hlo, Tin-Hungh oix bun wuov dauh zoux faix. Haaix dauh nyiemc ganh zoux faix, Tin-Hungh oix bun wuov dauh zoux hlo." (Lugaa 18:11-14)

15. Zoux doqc Ziouv nyei naamh nyouz nyei mienh.

"Meih yaac bun yie nyei win-wangv huin nqaang biaux. Yie duqv mietc nzengc nzorng yie wuov deix. 41 Ninh mbuo heuc jienv tov tengx, mv baac maiv maaih mienh njoux ninh mbuo. Ninh mbuo heuc Ziouv, mv baac ninh maiv dau ninh mbuo. (Singx Nzung 18:40-41). Daaux nzuonx meih mbuo nzorng zoux longx nyei jauv, hnamv orqv nyei sic. Meih mbuo maeqv yie nyei baeqc fingx nyei ndopv, yaac betv yiem ninh mbuo nyei mbungv nyei orv. 3 Meih mbuo nyanc yie nyei baeqc fingx nyei orv, maeqv ninh mbuo nyei ndopv, wuotv ninh mbuo nyei mbungv nauv benx yietc nqanx yietc nqanx nyei. Meih mbuo hngaqv benx yietc ndunh yietc ndunh hnavgv dapv caeng nyei orv, hnavgv yiem domh caeng nyei orv nor." 4 Wuov zanc ninh mbuo ziouc heuc jienv tov Ziouv mv baac ninh maiv dau ninh mbuo. Wuov zanc ninh maiv huin hmien mangc ninh mbuo, laaix ninh mbuo zoux nyei orqv sic" (Mikaa 3:2-4)

Nzutv Norz Waac: Naaic nyei waac se, *"Tin-Hungh dau maiv sienx Ninh nyei mienh nyei daux gaux waac nyei fai?"* Se gorngv maiv porv mengh nor, dau nyei waac maiv haih gorngv cing. Tin-Hungh haiz yaac dau nyei yietc nyungc se dongh maiv sienx nyei mienh **nyiemc zuiz nzuonx daaih lorz Ziouv nyei ziangh hoc, fai, dongh ninh mbuo goiv hnyouv sienx Ziouv wuov zanc** Ziouv haiz ninh mbuo nyei daux gaux waac nyei. Mv baac hnavgv mbuo duqv hoqc jhex daaih naaiv 15 nyungc mienh dongh Tin-Hungh maiv muangx maiv dau ninh mbuo daux gaux nyei benx mbuo nyei eix-leiz fai dau nyei waac. Mbuo buatc camv nyei maiv sienx nyei mienh nyei fiem-fingx se hnavgv naaiv deix 15 nyungc mienh nor. Mbuo haih dau gorngv pou tong nor Tin-Hungh maiv dau maiv sienx ninh nyei mienh nyei daux gaux tov nyei waac.

Da'nyeic joux waac naaic:

Daic mingh nyei mienh nyei lingh wuonh mingh haix?

Ging-sou: “Weic naaiv mbuo bungx dingc hnyouv. Mbuo hiuv duqv, da'faanh mbuo nyei sin corc zoux mbuo nyei biauv, mbuo leih Ziouv nyei biauv aqv. Mbuo yiem naaiv seix zaangc kaux sienx fim, maiv zeiz kaux mbuo mangc duqv buatc nyei. Mbuo bungx dingc hnyouv yaac gauh oix leih naaiv norm sin mingh caux Ziouv yiem” (2 Ko[^]lin[^]to 5:6–9).

Lingh Wuonh nyei Eix-Leiz: (נפש, *nephesh*; ψυχή, *psuchē*; Latin *anima*):

Yiem Loz Ngaengc Waac:

1. Lingh wuonh maaih ziex nyungc porv mengh nyei eix-leiz yiem Loz Ngaengc Waac. Janx nyei waac “Soul,” “living being,” “life,” “self,” “person,” “desire,” “appetite,” “emotion” and “passion”. Mv baac, da'yietv maaih eix-leiz gorngv qiex fai ziangh maengc.
2. Dongh mbuo qiex dangx, fai "daic" nyei ziangh hoc, mbuo nyei qiex leih mbuo nyei sin. (Tin deic douh 35:18 "Laasen aav lamh daic wuov zanc, ninh aengx tauv cuotv nzunc qiex, tengx ninh nyei dorn cuotv mbuox heuc Mben[^]o[^]ni. Mv baac Yaakopv cuotv mbuox heuc Mben[^]yaa[^]min"; Ye[^]le[^]mi 15:2). Weic naaiv yiem loz ngaengc waac sienx Tin-Hungh weic maiv oix lingh wuonh mingh deic nyuoqc (Singx Nzung 16:10; Yopv 33:18; I[^]saa[^]yaa 38:17).
3. Maengc, fai "lingh wuonh" se maengc fai qiex yiem sin (Janx Latin waac *anima* → "mind", *animation* → cartoon, dongh m'nqorngv famv zoux nyei. (Maengc se yiem nziaamv. Nzamc leiz latc 12:23-24 "Mv baac meih mbuo ndongc haaix zungv maiv dungx nyanc nziaamv weic zuqc nziaamv bun ninh maaih maengc. Maiv dungx zorqv nziaamv (Lingh wuonh → maengc) caux jienv orv nyanc. Maiv dungx nyanc nziaamv. Oix zuqc dox ga'ndiev ndau hnangv dox wuom norweic naaiv maiv.")

Yiem Siang Ngaengc Waac:

(1) Yiem Yo[^]han 19:30, "Yesu hopv liuz a'ngunc diuv-sui ninh gorngv, 'Nzoih zunh aqv loh!" Gorngv setv, Yesu nyei m'nqorngv hnaaiv njiec ziouc dangx qiex mi'aqv". Janx Gikc waac "psuche" caux "pneuma" se maiv fih hnangv. "Pneuma" se Tin-Hungh tauv nyei qiex bieqc zeix daaih nyei ga'naaiv. Janx nyei waac "soul" fai "pseuch" se baamh mienh laanh laanh maaih nyei. Mbuo laanh caux laanh maiv fih hnangv weic zuqc “Tin-Hungh bun nyei fangx zeiv”. **Yesu daic nyei ziangh hoc ninh fungx qiex, maiv zeiz lingh wuonh.** Ninh daic weic zuangx mienh.

Yiem 2 Ko[^]lin[^]to 5:6-8, Baulo gorngv tauv ninh zuov maiv duqv yiem Tin-dorng. Ninh zuov maiv duqv yiem Tin-dorng duqv siang sin, dunh yunh nyei sin, yietc liuz duqv caux Tin-Hungh yiem wuov nyei dorngx. Ndangc ninh haih duqv ninh hnamv nyei sin ninh zuqc daic. Haaix zanc qiex dangx ziouc duqv mingh yiem Ziouv nyei nza'hmien. Ninh gorngv nyei waac-gorn se yiem 2 Ko[^]lin[^]to 5:1–5 "¹Mbuo hiuv duqv mbuo yiem jienv naaiv norm baamh gen nyei ndopv-liuh, dongh mbuo nyei sin, zuqc caeqv wuov zanc, yiem wuov tin-dorng Tin-Hungh oix bun norm maiv zeiz mienh nyei buoz zoux daaih nyei biauv mbuo yiem, se yietc liuz nyei biauv. ² Ih

*zanc mbuo yiem jienv naaiv norm sin njunh jienv yiem, aqc duqv zuov maiv taux duqv yiem tin-dorngh nyei biauv.*³ *Yiem jienv tin-dorngh nyei biauv se hnangv zuqv jienv lui-houx nor, ziouc maiv zuqc laengh gaengv yiem.*⁴ *Mbuo corc yiem naaiv norm ndopv-liuh kouv haic, njunh jienv yiem. Naaiv maiv zeiz mbuo oix guangc baamh gen nyei sin, mv baac oix duqv tin-dorngh nyei sin. Haih daic nyei sin ziouc tiuv benx yietc liuz nyei sin.*⁵ *Tin-Hungh ganh liuc leiz ziangx mbuo, oix bun mbuo hnangv naaiv goiv yienc. Ninh yaac bun Singx Lingh mbuo weic zoux dingc-zinh beu jienv nqa'haav oix duqv nyei nyungc-nyungc."*

Weic naaiv deix zien leiz, Baulo maiv gamh nziex taux daic nyei jauv. Ninh bungx hnyouv Ziouv nyei waac. Ninh buangv hnyouv mbenc jienv ziangh dongh Tin-Hungh bun ninh nyei maengc. Ninh yaac mbenc ziangx taux daic nyei jauv. Maiv zeiz gorngv ninh maiv hnamv dongh ninh hiuv nyei mienh fai yiem fatv ninh nyei mienh, mv baac ninh hnamv Tin-Hungh gauh camv. Baulo nyei maengc se beiv hnangv saix tiux nyei mienh nor, ninh goux jienv ninh nyei maengc, oix tiux taux daauh. Kungx nduqc nyungc ninh oix ziangh yiem naaiv baamh gen se weic fux-sux Tin-Hungh. Maiv zeiz aeqv daic zungv gauh longx weic duqv caux Tin-Hungh yiem.

*"Yie ih zanc zuqc ciev ziec. Yie leih seix nyei ziangh hoc yaac taux aqv.*⁷ *Yie longc nzengc qaqv mborqv liuz longx nyei jaax aqv. Yie saaix tiux yaac tiux taux dorngh mi'aqv. Yie sienx nyei doz yie goux longx aqv.*⁸ *Ih zanc maaih norm ningv liouh jienv bun yie, dongh bun cing yie zoux duqv horpc wuov nyungc ningv. Taux wuov norm hnoi, baengh fim nyei Siemv Zuiz Jien, se Ziouv, oix zorqv wuov norm ningv zoux zingh nyeic bun yie. Maiv daan bun yie hnangv, yaac bun yietc zungv hnamv ninh ziouc zuov ninh aengx daaih wuov deix mienh"* (2 Ti^{mo} tai 4:6–8).

Siemv Yesu mienh yiem naaiv norm baamh gen, mbuo nyei lingh wuonh ziangh jienv yiem mbuo nyei sin, mbuo maiv duqv caux Zangc Diex yiem. Mbuo caux Zangc Diex jiu tong yiem mbuo nyei daux gaux waac, muangx Ninh caux mbuo gorngv waac yiem Ging-sou, mbuo maaih Tin-Hungh Singx Lingh caux mbuo yiem, mv baac mbuo maiv za'gengh duqv caux Zangc Diex juangc yiem. Singx Nzung 42:1-2 gorngv, “*O Tin-Hungh aac, yie nyei hnyouv ngorc meih hnangv njaih ngorc ndoqv nyei wuom-daaiah nor.*² *Yie nyei hnyouv ngorc Tin-Hungh, se ziangh jienv nyei Tin-Hungh. Yie taux haaix zanc cingx duqv mingh buatc Tin-Hungh nyei hmien?”* Fiev Singx Nzung sou 73:25 gorngv, “*Yiem wuov gu'nguaaic lungh, cuotv liuz meih, yie maiv maaih haaix dauh. Yiem naaiv lungh ndiev, cuotv liuz meih, yie maiv oix longc haaix nyungc.*”

Baulo ganh gorngv ninh zuov maiv duqv taux wuov hnoi dongh mbuo “*duqv yietc liuz caux Ziouv yiem*” (1 Te^{saa} loⁿⁱ gaa 4:17). Yiem Loz Ngaengc waac siemv Tin-Hungh nyei mienh mangc mv taux duqv caux Ziouv yietc liuz yiem nyei hnoi. “*Apc^{laa} ham zuov jienv maaih gorn-ndoqv wuov norm zingh, dongh Tin-Hungh ganh daav za'eix ceix yaac zoux zaangc mienh ceix jiez nyei zingh*” (Hipv^{lu} 11:10). Siemv Tin-Hungh nyei mienh yiem Loz Ngaengc Waac zieqv duqv gorngv mbuo maiv zeiz yiem naaiv norm baamh gen nyei mienh, mbuo yiem camx baav hnangv. (Hipv^{lu} 11:13 “*Naaiv deix zuangx mienh daic nyei ziangh hoc ninh mbuo corc maaih sienx fim. Ninh mbuo maiv gaengh duqv zipv Tin-Hungh laengz bun nyei buonc, mv*

baac yiem go nyei mangc duqv buate ziuoc a'hneiv. Ninh mbuo nyiemc ninh mbuo yiem naaiv baamh gen zoux ganh norm deic-bung daaih nyei kaeqv mienh hnangv"). Kungx yiem Tin-dorngh caux Tin-Hungh yietc liuz yiem, zanc-zanc maaih jiu tong (Laauc Yaangh 21:3-4, 22-23; 22:3-4).

Laa^saa^latv Caux Butv-Zoih Mienh (Lugaa 16:19-31)

¹⁹ "Maaih dauh domh butv-zoih mienh zuqv ciouh zuqv dunc nyei lui-houx hnangv. Hnoi-hnoi nyanc orv hopv diuv njien-youh haic. ²⁰ "Aengx maaih dauh ndortv naanc mienh, mbuox heuc Laa^saa^latv, butv faang butv laaix buangv nzengc yietc sin. Mienh zanc-zanc dorch ninh mingh taux wuov dauh butv-zoih mienh nyei gaengh ndaangc ²¹ zuov hnaangx-hmeiv-ndortv nyanc. Juv yaac daaih mbiec ninh nyei faang. ²² "Zoux gau, naaiv dauh ndortv naanc mienh daic mi'aqv. Fin-mienh dorch ninh mingh caux ninh nyei ong-taax-ngaeqv, Apc^laa^ham, yiem. "Butv-zoih mienh yaac daic mi'aqv, biopv jienv. ²³ Ninh mingh yiem yiemh gen [maaih deix sou faan daaih gorngv "deic nyuoqc"] zuqc diev mun diev kouv. Ninh ziuoc cau hmien buate Apc^laa^ham yiem go nyei, yaac buate Laa^saa^latv caux Apc^laa^ham yiem wuov. ²⁴ Ninh ziuoc heuc Apc^laa^ham, 'Ong aah! Tov korv-lienh yie, mbuox Laa^saa^latv daaih longc buoz-ndoqv coqv wuom daaih ndiepv yie nyei mbietc laangh deix, weic zuqc yiem naaiv douz buov jienv yie mun haic, kouv haic. ²⁵ "Apc^laa^ham dau ninh, 'Fun aac, meih oix zuqc jangx taux meih yiem seix zaangc wuov zanc meih nyungc-nyungc yaac duqv longx haic. Laa^saa^latv yaac kungx duqv waaic nyei hnangv. Ih zanc Laa^saa^latv duqv longx, njien-youh haic aqv. Daaux nzuonx meih ih zanc zuqc siouc kouv. ²⁶ Corc aengx maaih nyungc. Maaih diuh domh zuonx maanc zungx ndo nqaeqv jienv. Haaix dauh yiem naaiv bung oix jiex meih mbuo wuov bung, jiex maiv duqv. Haaix dauh yiem wuov bung oix jiex yie mbuo naaiv bung yaac jiex maiv duqv.'

²⁷ "Butv-zoih mienh aengx gorngv, 'Ong aac, wuov nyungc tov meih paaiv Laa^saa^latv mingh taux yie nyei die nyei biau. ²⁸ Yie corc maaih biao muoz-dorn yiem wuov. Tov bun Laa^saa^latv mingh kuinx ninh mbuo maiv dungx daaih naaiv siouc kouv nyei dornx.'

²⁹ "Apc^laa^ham dau, 'Ninh mbuo zungv maaih Mose caux Tin-Hungh nyei Douc Waac Mienh nyei Sou niaa. Meih nyei muoz-doic oix zuqc muangx ninh mbuo nyei waac. ³⁰ "Butv-zoih mienh aengx dau Apc^laa^ham, 'Ong aac, mbuoqc naaiv maiv gau. Se gorngv maaih laanh mienh daic mingh aengx nangh daaih mingh taux yie nyei muoz-doic wuov, muoz-doic zungv oix goiv hnyouv guangc zuiz. ³¹ "Apc^laa^ham gorngv, 'Se gorngv ninh mbuo maiv muangx Mose caux Tin-Hungh nyei Douc Waac Mienh nyei waac nor, maiv gunv maaih laanh mienh daic mingh aengx nangh daaih, ninh mbuo yaac maiv muangx lorqc.'"

Caux Yesu Ding Jienv Wuov dauh Zuiz-Mienh (Lugaa 23:39-43)

"Caux Yesu ding jienv wuov deix i dauh zuiz-mienh maaih dauh gorngv doqc ki Yesu, "Meih zoux Giduc maiv zeiz? Njoux meih ganh yaac njoux yie mbuo maah!" Mv baac wuov dauh zuiz-mienh baav ninh gorngv, "Meih maiv gamh nziex Tin-Hungh? Mbuo lomh nzoih zuqc dingc zuiz daic. Weic mbuo se horpc nyei, puix duqv mbuo zoux nyei. Mv baac naaiv dauh maiv zoux dornge haaix nyungc." Ninh aengx gorngv mbuox Yesu, "Yesu aah! Meih daaih zoux hungh nyei ziangh hoc, tov jangx deix yie oc." Yesu dau ninh, "Yie gorngv zien mbuox meih, ih hnoi meih duqv caux yie yiem orn-lorqc huingx."

Fu'jueiv dongh maiv gaengh hiuv waac daic mingh duqv njoux nyei fai?
Fu'jueiv duqv mba'ziex hnyangx cingx hiuv duqv zuqc caux dornge?
Se gorngv ninh mbuo daic ndangc naaic norm ziangh hoc corc duqv njoux nyei fai?

Yiem Ging-sou maiv maaih dornge gorngv fu'jueiv duqv mba'ziex hnyangx liuz nor cingx hiuv duqv zuqc fai dornge. Weic zuqc fu'jueiv hiuv zuqc fai dornge se maiv fih hnavg. Maaih deix faix nyei yaac hiuv aqv, maaih deix gauh gox deix cingx hiuv. Yietc fingx caux yietc fingx mienh yaac maiv fih hnavg. Tin-Hungh yiem ninh nyei cong-mengh maiv gorngv cing gorngv mengh. Tin-Hungh ganh hiuv duqv haaix zanc, haaix norm ziangh hoc, haaix laanh mienh hiuv duqv zuqc fai dornge, ziouc haih ganh ndaam-dornge. Tin-Hungh hiuv duqv mienh ngaengc ninh, maiv zipv ninh, haaix zanc mienh doix-dekc ninh. Kungx Tin-Hungh hiuv duqv haaix zanc jix gorn.

Janx Yiu[^]tai sienx gorngv ziepc nyeic hnyangx. Yesu duqv ziepc nyeic hnyangx Ninh nyei domh mienh dorh ninh mingh Ye[^]lu[^]saa[^]lem siex maengc zipv nyei wuic. Yiem wuov ninh jix gorn naaic jienv nyei waac. Ziepc nyeic hnyangx nyei ziangh hoc za'gengh jix gorn sin yienc, maaih hnyouv hanc, oix, jix gorn buatc cing gorngv taux zuiz nyei fiem-fingx.

Weic naaiv norm-norm ziangh hoc maaih qiangx fai duqv qiangx mbuox fu'jueiv taux ginv gan Yesu nor, gunv orn caux kuinx ninh mbuo gan longx Yesu Giduc. Ninh mbuo ganh hiuv duqv ninh mbuo oix sienx Yesu Giduc nor gunv orn ninh mbuo. Weic zuqc mbuo maiv hiuv duqv gorngv haaix zanc fai haaix norm ziangh hoc ninh mbuo za'gengh zien-zien nyei sienx Yesu, kungx Tin-Hungh ganh hiuv hnavg. Se gorngv fu'jueiv fai mienh lunx mienh gorngv "yie oix sienx Yesu", oix zuqc orn ninh mbuo caux ninh mbuo a'hneiv, kungx Tin-Hungh ganh hiuv duqv ninh mbuo nyei hnyouv - ninh mbuo sienx fai maiv sienx. Maiv gunv hnavg haaix nor, ninh mbuo gauh mingh nitv fatv deix Ziouv Tin-Hungh.

Fu'jueiv maiv gaengh hiuv duqv zuqc fai dornge, daic ndangc haih sienx Tin-Hungh yaac duqv njoux weic Tin-Hungh nyei korh lienh. Weic zuqc Ndaa[^]witv hungh bungx hnyouv Tin-Hungh taux ninh ganh nyei dorn. Ndaa[^]witv sienx gorngv ninh nyei dorn duqv mingh Tin-Dorngh nyei. Ndaawitv gorngv nyei waac bun cing ninh sienx gorngv ninh duqv buatc ninh nyei dorn yiem wuov Tin-dorngh. (2 Saa[^]mu[^]en 12:23 *Gu'nguaz daic yie fungc oix zuqc zai? Yie aengx haih dorh ninh nangh daaih fai? Yie haih mingh ninh wuov mv baac ninh maiv haih nzuonx yie naaiv.*)

Da'faam joux waac naaic:

Siex Yesu nyei mienh maiv ei Tin-Hungh nyei waac leih auv fai nqox liuz aengx longc se hnavg haaix nor? Longc jienv siang nqox fai auv ziouc benx hienx auv hienx nqox nyei mienh fai? Tin-Hungh guangc mienh nyiemc nyei zuiz niv? Tin-Hungh guangc naaiv nyunge mienh nyei zuiz nyei fai?

Ging-sou: "Aengx maaih joux waac gorngv, 'Haaix dauh leih ninh nyei auv oix zuqc fiev zai leih cai sou bun jienv ninh.' (Nzame Leiz-Latc 24:1-4 ; Matv[^]taai 19:7 ; Maako 10:4 32) Mv baac ih zanc yie mbuox meih mbuo, "haaix dauh leih ninh nyei auv yaac maiv zeiz laaix ninh

neyi auv hienx nqox, wuov dauh auv aengx mingh longc siang-nqox, wuov dauh loz-nqox zoux bun ninh neyi auv benx hienx nqox neyi mienh. Ninh longc wuov dauh siang-nqox yaac benx hienx auv neyi mienh aqv". (Matv^taai 19:9 ; Maako 10:11-12 ; Lugaa 16:18 "Haaix dauh leih ninh neyi auv aengx mingh longc siang-auv, ninh se hienx auv hhangv. Haaix dauh longc auv-leih zoux auv, wuov dauh se kungx hienx auv hhangv" ; 1 Ko^lin^to 7:10-11 10 "Yie aengx maaih joux waac hatc dorng jaa neyi mienh. Naaiv deix waac maiv zeiz yie ganh gorngv neyi waac, se Ziouv hatc neyi waac. Auv maiv dungx leih guangc nqox. 11 Mv baac se gorngv leih nor, ninh oix zuqc daan sin yiem. Maiv zeiz aeqv, oix zuqc aengx longc loz-nqox. Nqox yaac maiv dungx leih guangc ninh neyi auv.")

Yesu njaaux neyi eix-leiz se maiv zeiz gorngv guangc liuz aengx longc siang nor benx hienx auv hienx nqox neyi mienh mingh wuov douc. Se gorngv guangc liuz auv nqox neyi mienh aengx longc siang daaih ziouc benx hienx neyi mienh nor, nzunc-nzunc caux doic ziouc benx hienx mi'aqv. Oix zuqc jangx jienv 1 Yo^han 1:9 "*Se gorngv mbuo nyiemc mbuo neyi zuiz, Tin-Hungh se ziepc zuoqv neyi, baengh fim neyi, ziouc guangc mbuo neyi zuiz caux mbuo zoux neyi yietc zungv waaic sic, fioux mbuo cing-nzengc daaih".* Hhangv nyungc-nyungc zuiz mbuo zuiz mienh zoux nor, se gorngv mbuo za'gengh goiv hnyouv guangc mbuo zoux neyi, Tin-Hungh laengz jienv guangc mbuo neyi zuiz fioux mbuo benx cing-nzengc daaih. Guangc auv guangc nqox se benx yietc nyungc zuiz dongh Tin-Hungh guangc neyi, mv baac oix zuqc baamz jienv zuiz mingh (1 Yo^han 3:4-9; 1 Ko^lin^to 6:9-11)

Ging-sou njaaux neyi se hhangv naaiv, maiv oix bun aengx zoux jienv zuiz mingh (*hienx auv hienx nqox*). Mv baac, guangc liuz auv nqox neyi mienh aengx dorng jienv jaa oix zuqc ziepc zuoqv bun ninh mbuo neyi siang auv fai nqox.

Gorngv taux Mose bun mienh leih auv fai nqox neyi sou, "*Se gorngv mienh longc jienv auv, nqa'haav haiz maiv horpc hnyouv ninh neyi auv weic zuqc buatec ninh neyi auv zoux sic maiv ziangh horngh, nqox ziouc fiev leih cai sou bun jienv ninh yaac heuc ninh cuotv biau mingh aqv. 2 Se gorngv auv cuotv biau mingh aengx longc ganh dauh nqox, 3 da'nyeic dauh nqox yaac maiv hnamv ninh aengx fiev leih cai sou bun ninh ziouc heuc ninh mingh mi'aqv, fai da'nyeic dauh nqox daic mi'aqv, 4 daauh dauh nqox, dongh zunc ninh biaux wuov dauh, aengx longc ninh zoux auv maiv duqv aqv, weic zuqc wuov dauh auv maaih uix. Ziux Ziouv mangc, naaiv se gamh nziev haic, youx haic neyi sic. Maiv dungx bun Ziouv, meih mbuo neyi Tin-Hungh, jiu bun meih mbuo nzipc neyi deic-bung zuqc maaih zuiz"* (Nzame Leiz Latc 24:2-4).

Guangc daauh torngx liuz aengx mingh longc da'nyeic torngx neyi mienh maiv haih nzuonx mingh longc daauh torngx neyi auv/nqox aqv.

Yesu gorngv neyi waac yiem Matv^tai 5:32 caux Maako 10:11-12 maaih eix-leiz gorngv: ***La'guaih caux mienh yiem fai caux jienv doic yiem maiv dorng jaa se benx hienx neyi zuiz.*** Dorng liuz jaa neyi mienh oix zuqc ziepc zuoqv bun doic. Dorng jaa da'nyeic torngx neyi mienh nyiemc liuz zuiz, eix leiz se ninh mbuo maiv zeiz baamz jienv zuiz mingh yiem nzunc-nzunc ninh mbuo caux doic neyi ziangh hoc.

Mv baac se gorngv leih doic mingh neyi mienh maiv goiv yienc, maiv nyiemc zuiz, aengx mingh longc dieh torngx mienh, maiv haih hnamv oix duqv Tin-Hungh ceix fuqv ninh mbuo neyi jaa.

Hnangv nyungc-nyungc zuiz nor, maiv goiv hnyouv guangc zuiz, fai maiv horpc nyei jaa oix zuqc nyiemc zuiz. Weic zuqc dorng jaa se dorng Tin-Hungh laengz ngaengc waac. Hnangv Hipv^lu waac gorngv nor, "*Dauh dauh oix zuqc taaih dorng jaa nyei leiz, kungx longc ganh nyei auv nqox juangcoux bueix, weic zuqc Tin-Hungh oix dingc buangh liouh nyei mienh caux hienx auv hienx nqox nyei mienh nyei zuiz*" (Hipv^lu 13:4). Se gorngv duqv guangc jiex auv-nqox nyei mienh za'gengh oix zuqc nyiemc zuiz, dorng jaa da'nyeic nzunc oix zuqc benx nqa'haav lai wuov nzunc.

Tin-Hungh guangc mienh nyei zuiz nyei. 1 Yo^han 1:9 "*Se gorngv mbuo nyiemc mbuo nyei zuiz, Tin-Hungh se ziepc zuoqv nyei, baengh fim nyei, ziouc guangc mbuo nyei zuiz caux mbuo zoux nyei yietc zungv waaic sic, fioux mbuo cing-nzengc daaih.* Hnangv Matv^tai 12:31 *gorngv, nor Weic naaiv yie mbuox meih mbuo, mienh baamz nyei yietc zungv zuiz, caux gorngv ki nyei yietc zungv waac, Tin-Hungh haih guangc nzengc. Mv baac haaix dauh gorngv ki Singx Lingh, Tin-Hungh maiv guangc wuov dauh nyei zuiz aqv.*"

Hnangv naaic nor gorngv nor, mbuo oix Baamh jienv zuiz mingh fai? 1 Ko^lin^to 6:15-20 "*Meih mbuo maiv hiuv fai? Meih mbuo nyei sin se Giduc nyei sin nyei yietc nyungc. Hnangv naaic, yie oix zuqc dorh Giduc nyei sin mingh benx maaic buonv-sin nyei m'sieqv dorn nyei sin nyei yietc nyungc fai? Zungv maiv zeiz! Meih mbuo maiv hiuv fai? Mienh hienx maaic buonv-sin nyei m'sieqv dorn ziouc caux wuov dauh benx yietc norm sin, weic zuqc Ging-Sou gorngv, "Ninh mbuo i dauh ziouc benx yietc norm sin mi'aqv."* Mv baac haaix dauh caux Ziouv gapv jienv, wuov dauh ziouc caux Ziouv benx yietc diuc hnyouv aqv. Oix zuqc simv ngoi hienx nyei jauv. Mienh baamz nyei haaix nyungc zuiz se hoic maiv zuqc sin. Mv baac zoux hienx nyei sic se hoic ganh nyei sin. *Meih mbuo maiv hiuv fai? Meih mbuo nyei sin se Singx Lingh nyei dinc. Tin-Hungh bun daaih nyei Singx Lingh yiem meih mbuo gu'nyuoz. Meih mbuo nyei sin se maiv zeiz meih mbuo ganh nyei, se Tin-Hungh nyei, weic zuqc Tin-Hungh maaiz meih mbuo jaaix haic. Hnangv naaic, meih mbuo oix zuqc longc meih mbuo nyei sin taaih Tin-Hungh.*" Maiv dorngc ... dorngc mi'aqv ziouc oix zuqc nyiemc zuiz liuz maiv dungx zoux dorngc jienv mingh.

Ih jaax nyei jiu-bang mienh camv oix zuqc mengh baeqc taux leih cai-doix liuz aengx dorng nzunc jaa nyei jauv. Laanh-laanh sienx Tin-Hungh mienh, norm-norm jiu-bang oix zuqc hiuv mengh Tin-Hungh nyei waac hnangv haaix nor gorngv. Yaac oix zuqc longc cong-mengh dau ei jienv Ging-sou nyei waac weic tengx sienx Tin-Hungh nyei mienh haih ginv haih zoux duqv horpc.

Leih cai-doix nyei mienh oix zuqc zuov ndongc haaix lauh cingx dorng nzunc jaa?
Se gorngv nqox fai auv maiv gaengc dorng jaa nor niv?

Dau nyei waac za'gengh jienv haic weic zuqc maaih mienh camv buangh taux, yaac yiem jienv, naaiv nyungc sic. Maiv gunv weic haaix dauh, weic haaix nyungc leih cai-doix, jiex gorn oix zuqc yiem Ging-sou nyei waac dau taux naaiv deix naaic nyei waac.

Baulo dauh yiem 1 Ko^lin^to 7:10-11 "*Yie aengx maaiah joux waac hatc dorng jaa nyei mienh. Naaiv deix waac maiv zeiz yie ganh gorngv nyei waac, se Ziouv hatc nyei waac. Auv maiv dungx leih guangc nqox. Mv baac se gorngv leih nor, ninh oix zuqc daan sin yiem. Maiv zeiz aeqv, oix zuqc aengx longc loz-nqox. Nqox yaac maiv dungx leih guangc ninh nyei auv.*" Naaiv yiemc

Ging-sou gorngv taux leih cai-doix, maiv zeiz ziangh hoc, mv baac gorngv jienv nyei taux aengx longc nzunc auv fai nqox nyei jauv.

Jangx jienv yiem ging-sou naaiv, weic auv fai nqox maiv zingx, mingh hienx mienh nor zoux zingx wuov dauh haih guangc nyei. "Aengx maaih joux waac gorngv, 'Haaix dauh leih ninh nyei auv oix zuqc fiev zeiv leih cai sou bun jienv ninh.' Mv baac ih zanc yie mbuox meih mbuo, haaix dauh leih ninh nyei auv yaac maiv zeiz laaix ninh nyei auv hienx nqox, wuov dauh auv aengx mingh longc siang-nqox, wuov dauh loz-nqox zoux bun ninh nyei auv benx hienx nqox nyei mienh. Ninh longc wuov dauh siang-nqox yaac benx hienx auv nyei mienh aqv" (Matv[^]tai 5:32; 19:9) Fai maiv sienx nyei nqox fai auv biaux mingh (Maiv gunv auv fai nqox, se gorngv maiv sienx Yesu wuov dauh oix leih sienx nyei wuov dauh, sueih ninh mingh aqv. Buangh zuqc naaiv nyungc sic nor aeqv, sienx Yesu wuov dauh auv fai nqox ziouc maiv zuqc aapv ganh diev jienv yiem, weic zuqc Tin-Hungh heuc mbuo baengh orn nyei yiem) 1 Ko[^]lin[^]to 7:15). Mv baac se gorngv cuotv liuz naaiv deix i diuc jauv, leih cai-doix nyei mienh guangc fai aengx longc se benx hienx auv hienx nqox nyei mienh aqv (Maako 10:11-12).

Weic naaiv Baulo gorngv, "Mv baac se gorngv leih nor, ninh oix zuqc daan sin yiem. Maiv zeiz aeqv, oix zuqc aengx longc loz-nqox " (1 Ko[^]lin[^]to 7:10-11). Se gorngv za'gengh goiv hnyouv oix zuqc lorz loz nqox longc (Matv[^]tai 5:23-24). Maiv gunv m'jangc fai m'sieqv fih hngangv nyei. Mv baac se gorngv guangc mingh nyei nqox fai auv benx sienx Tin-Hungh nyei mienh zuov taux guangc wuov dauh nqox fai auv longc ndangc, fai biux mengh maiv sienx Tin-Hungh, fai daic, ziouc aengx haih longc sienx Tin-Hungh nyei mienh.

Ging-sou donv taux dorng jaa caux leih jiex cai-doix nyei mienh. Se gorngv mienh guangc fai leih cai-doix maiv zeiz weic auv fai nqox hienx, maiv sienx Tin-Hungh, longc nyei mienh se funx hienx nyei mienh. (Maako 10:11-12 "Yesu ziouc mbuox ninh mbuo, 'Haaix dauh leih ninh nyei auv, aengx mingh longc siang-auv, ninh se hienx auv hngangv, yaac dorngc ninh nyei loz-auv. Auv yaac fih hngangv nyei. Se gorngv leih ninh nyei nqox aengx longc siang-nqox, ninh se hienx nqox hngangv.")

Se gorngv leih cai-doix nyei mienh weic auv fai nqox hienx mienh, weic maiv sienx biaux, wuov nzunc hnoi haih aengx longc nzunc sienx Tin-Hungh mienh nyei auv fai nqox" (1 Ko[^]lin[^]to 7:39 "Se gorngv nqox corc ziangh jienv nyei ziangh hoc, auv maaih dorng jaa nyei leiz ndoh jienv. Mv baac nqox daic mi'aqv nor, auv maiv zuqc dorng jaa nyei leiz ndoh aqv. Sueih binc longc haaix dauh zoux nqox yaac duqv, da'faanh sienx Ziouv nyei mienh hngangv.")

Maiv gaengh sienx Tin-Hungh nyei ziangh hoc leih cai-doix liuz, sienx liuz Tin-Hungh longc duqv auv longc duqv nqox nyei fai?

Baulo gorngv haih longc duqv nyei. Yiem 1 Ko[^]lin[^]to 7:27-28 "Meih maaih auv nyei fai? Maiv dungx guangc meih nyei auv. Maiv gaengh longc auv fai? Maiv dungx gaengh lorz aqv oc. 28 Mv baac meih longc auv nor, meih maiv zeiz baamz zuiz. Sieqv-dorn longc nqox, ninh yaac maiv zeiz baamz zuiz. Mv baac yie oix tengx meih mbuo simv ndutv zoux auv zoux nqox nyei kouv naanc. "

Naaiv se kungx gorngv taux maiv gaengh sienx Tin-Hungh nyei ziangh hoc leih cai-doix hngangv. Sienx liuz Yesu nyei ziangh hoc, guangc liuz nor se gorngv haih yiem duqv maiv longc yaac longx nyei, maiv zei aeqv longc gauh longx zoux zuiz.

Guangc ziex torngx nyei mienh haih zoux duqv bun Tin-Hungh horpc hnyouv nyei fai?

Maiv gunv guangc ziex torngx fai guangc yietc torngx, **zuiz se zuiz!** M'daaih hngangv mienh zoux nyei ziex nyungc zuiz, maaiah mienh zoux ziex nzunc dongh wuov nyungc zuiz. Mbuo horpc zuqc yangh puix sienx Tin-Hungh nyei mienh. Guangc nqoi zuiz. Nyiemc dongh mbuo hiuv nyei zuiz. Leih caih doix hoic zuqc auv nqox. Se gorngv maaiah fu'jueiv yaac liemh fu'jueiv hoic zuqc; maaiah fun-faqv yaac fih hngangv nyei hoic zuqc ninh mbuo. **“zorqv i norm ga'naaiv huv mingh daaih gapv benx longx se aqc” se benx fangx taux leih cai-doix mienh dorng da'nyeic nzunc jaa se hngangv naaiv. Fai jae jaux huv maiv haih zorc longx hngangv loz.**

Baulo gorngv yiem 1 Ko^{lin}to 7:7-9 "*Feix duqv meih mbuo hngangv yie nor, maiv dorng jaa, mv baac gorqv-mienh duqv Tin-Hungh bun daaih nyei zingh nyeic. Maaiah dauh maaiah naaiv nyungc, maaiah dauh maaiah wuov nyungc. Ih zanc yie mbuox maiv maaiah jaa nyei mienh caux auv-guaav, meih mbuo hngangv yie nor, daan sin yiem gauh longx.*"

Baulo heuc dorng jaa mienh maiv dungx leih cai-doix, mv baac se gorngv maiv muangx Tin-Hungh nyei waac leih oix zuqc daan sin nyei yiem. Sienx Tin-Hungh nyei mienh haih leih weic auv fai nqox baamh jienv zuiz mingh, hienx jienv mingh. Se gorngv guangc mingh nor, oix zuqc longc sienx Tin-Hungh mienh hngangv.

Da'feix joux waac naaic:

Mbuo hitv kuonx yiem Dingh Gong Hnoi/Sabbath fai?

“Dingh gong hnoi” fai hitv kuonx hnoi, yiem Loz Nqaengc Waac se benx janx nyei waac heuc "*ceremonial, not moral, aspects of the law*". Weic naaiv ih jaax hnoi mbuo maiv ei mi'aqv. Weic dingh gong hnoi caux ziec saengh kuv nyei leiz se ndangc Yesu doz benx dauh baamh mienh. Naaiv deix zoux nyei "leiz" fai "*ceremonial laws*" se benx fangx nuqv taux Yesu Giduc.

1. Yiem Ko^{li}si 2:16-17, "*Weic naaiv maiv dungx bun haaix dauh weic meih mbuo nyanc nyei hopv nyei, fai jiex zipv nyei leiz, fai bieqc Siang-Hlaax nyei leiz, fai Dingh Gong Hnoi nyei leiz, daanh meih mbuo. Naaiv deix sic kungx zoux dongh linh biux mengh nqa'haav oix daaih nyei sic hngangv. Mv baac zien nyei se Giduc.*" Baulo gorngv dingh gong hnoi se benx dongh linh biux mengh taux Yesu Giduc hngangv, weic Yesu daaih liuz ih zanc naaiv deix leiz jiex mi'aqv (1 Zunh Doic Douh 23:31; 1 Zunh Doic Douh 2:4; 31:3; E^{se}ken 45:17; Ho^{se}ya 2:11). Maaiah eix-leiz gorngv hnoi-hnoi se jienv bun Tin-Hungh nyei.
2. Dingh gong hnoi se Tin-Hungh caux I^{saa}laa^{en} mienh nyei liepc ngaengc waac (Cuotvⁱyipv 31:16-17; E^{se}ken 20:12; Ne^{haa}mi 9:14). Weic mbuo yiem siang liepc jiex nyei ngaengc waac (Hipv^{lu} 8) *mbuo maiv zuqc ei dingh gong hnoi nyei leiz.*

3. Yiem Siang-Ngaengc Waac maiv maaih dornx heuc sienx Yesu mienh ei dingh gong hnoi nyei leiz.
4. Yiem jiex gorn nyei jiu-bang mienh, ninh mbuo buoqc zangc Ziouv yiem **Da'yietv hnoi** (Gong-sou 20:7 "*Wuov norm leiz-baaix nyei daauh hnoi...*"). Sunday fai da'yietv hnoi...
5. Yiem Loz Ngaengc waac biux mengh dongh ganh fingx mienh (maiv zeix Yiu^tai mienh fai I^saa^laa^en nyei mienh) Ging-sou maiv heuc ninh mbuo ei Dingh Gong nyei leiz. Se gorngv yietc liuz oix zuqc ei nor, weic haaix nyungc cuotv liuz I^saa^laa^en mienh ga'nyiec nyei mienh maiv zuqc ei?
6. Ndangc Mose nyei ziangh hoc, mienh maiv maaih Dingh Gong nyei leiz, yaac maiv maaih Dingh Gong Hnoi ndangc Tin-Hungh bun lingc I^saa^laa^en mienh yiem Si^nai mbong.
7. Baulo buangh gong-zoh mbuo yiem Ye^lu^saa^lem ca'laangh nyei ziangh hoc (Gong-zoh 15) ninh mbuo maiv heuc sienx Yesu nyei mienh ei jienv Dingh Gong Hnoi nyei leiz.
8. Baulo donv taux sienx Tin-Hungh nyei mienh taux ziex nyungc leiz caux lingc. Mv baac yietc nyungc lingc fai leiz dongh ninh maiv donv taux nyei se Dingh Gong Hnoi nyei leiz.
9. Yiem Gaa^laa^tie 4:10-11 Baulo donv fai hemz Gaa^laa^tie jiu-bang mienh weic ninh mbuo hnamv laaic duqv Tin-Hungh oix ninh mbuo longc hnoi fai mangc hnoi benx lengc jeiv nyei ziangh hoc, "*Meih mbuo gan duqv jienv dingc daaih nyei hnoi, hlaax, gueix caux hnyangx.* ¹¹ *Yie tengx meih mbuo nzauh haic. Nziex yie weic meih mbuo zoux nyei gong zoux maiv cuotv haaix nyungc.*" Sienx liuz Yesu hnoi-hnoi se Tin-Hungh ganh liepc daaih. Mbuo oix zuqc a'hneiv Tin-Hungh yiem *ih hnoi*, weic ninh zeix norm-norm hnoi bun mbuo. Weic naaiv, norm-norm ziangh hoc se benx jaaix nyei ziangh hoc bun taux mbuo - oix zuqc longc duqv horpc weic Tin-Hungh bun ziangh hoc mbuo.
10. Yiem Lomaa 14:5 Baulo maiv bun I^saa^laa^en mienh gorngv yietc hnoi gauh jienv ganh norm hnoi. "*Maaih dauh funx maaih norm hnoi gauh longc jienv. Aengx maaih dauh funx hnoi-hnoi fih hngangv nyei. Gorqv-mienh oix zuqc ei gorqv-mienh nyei hnyouv dingc naaiv deix sic*"
11. Zinh ndangc nyei jiu-bang sienx gorngv Yesu daic aengx nangh daaih yiem da'yietv hnoi (Sunday). Sienx Yesu mienh ziouc buoqc zangc Ziouv yiem da'yietv hnoi. Ih jaax maaih maaih guan mienh corc sienx yaac ei jienv dingh gong hnoi nyei leiz caux nyanc nyei ga'naaiv.
12. Buoqc zangc hnoi/da'yietv hnoi se maiv zeiz tiuv dingh gong hnoi. Mv baac buoqc zangc hnoi se sienx Yesu mienh daaih gapv zunv jangx taux Yesu zoux nyei gong, daic yiem ziepc nzangc jaax weic ninh mbuo nyei zuiz, yaac nangh daaih wuov hnoi. Mienh heuc *leiz baaix hnoi* - naaiv norm hnoi se **maiv zeiz** leiz baaix hnoi. Weic zuqc hnoi hnoi mbuo horpc zuqc baaix ceng Tin-Hungh. Naaiv hnoi mbuo zorqv daaih juangc jienv jangx taux Yesu nangh daaih nyei hnoi. Hnoi-hnoi se dingh gong hnoi bun sienx Tin-Hungh nyei mienh. Mbuo dingh weic maiv haih zoux haaix nyungc bun ganh duqv njoux, mv baac mbuo hitv yiem Yesu zoux nyei gong bun mbuo haih duqv njoux. Hipv^lu 4:9-11, gorngv, "*Hnangv naaic, weic Tin-Hungh nyei baeqc fingx aengx ganh maaih norm Dingh Gong hitv kuonx Hnoi, 10 weic zuqc haaix dauh duqv bieqc Tin-Hungh bun nyei hitv kuonx dornx, wuov dauh duqv dingh ninh ganh nyei gong hitv kuonx, hnangv Tin-Hungh dingh gong hitv kuonx wuov nor. 11 Hnangv naaic, mbuo oix zuqc njiec qaqv zoux weic bieqc Tin-Hungh nyei hitv kuonx dornx, weic maiv bun haaix dauh hnangv wuov deix mienh maiv muangx waac ziouc maiv duqv bieqc.*"

Ih zanc mbuo corc gapv zunv yiem "Sunday" fai da'yietv hnoi buoqc zangc, mv baac mbuo maiv heuc naaiv zoux dingh gong hnoi/"Sabbath" - mbuo heuc buoqc zangc hnoi.

Da'hmz joux waac naaic:

Siex Yesu nyei mienh haih baamz jienv zuiz mingh nyei fai? Baamz ndongc haaix lauh? Mbuo hnangv haaix nor haih hiuv duqv gorngv mbuo zoux nyei zuiz se nzunc baav nyei piatv, fai mbuiv gorngv mbuo maiv siex nyei mienh?

Ging-sou yiem **Singx Nzung 51:12** "*Tov bun yie duqv meih nyei njoux en nyei njien-youh hnangv loz nor. Yaac bun yie maaih hnyouv oix gan longx meih.*"

Matv[^]tai 18:15-16 "*Se gorngv meih nyei gorx-youz zoux dorngc meih, meih ganh oix zuqc mingh lorz ninh, bingx jienv mbuox ninh, ninh zoux dorngc nyei sic. Se gorngv ninh muangx meih nyei waac nor, meih ziouc duqv ninh aengx zoux gorx-youz. Se gorngv ninh maiv muangx, meih ziouc oix zuqc lorz jienv yietc dauh fai i dauh caux meih mingh tengx muangx waac ziouc haih zorqv joux-joux waac zoux zornz-zengx.*"

E[^]fe[^]so 4:30 "*Yaac maiv dungx bun Tin-Hungh nyei Singx Lingh nzauh. Tin-Hungh bun Singx Lingh meih mbuo, hnangv nqaapv jienv yienx nor, zuov Tin-Hungh oix zuoqc meih mbuo nzuonx nyei hnoi-nyieqc taux*"

Yiem naaiv Ging-sou mbuo buac siex Yesu mienh maaih ziangh hoc zoux zuiz, zoux jienv mingh lauh nyei. Ndaa[^]witv hungh zoux nyei zuiz yiem 2 Saa[^]mu[^]en 11-12 caux Singx Nzung 51. Mbuo buac Lotv (2 Bide 2:7-9 "*Tin-Hungh yaac njoux wuov dauh kuv mienh Lotv cuotv. Lotv weic orqv mienh zoux buangh liouh nyei sic nzauh duqv kouv haic. Wuov dauh kuv mienh yiem ninh mbuo mbu'ndongx, hnoi-hnoi buac yaac haiz ninh mbuo zoux nyei waaic sic. Weic Lotv zoux kuv mienh ninh ziouc haiz hnyouv mun haic. Hnangv naaic, Ziouv hiuv duqv hnangv haaix nor tengx gan longx Tin-Hungh nyei mienh biaux ndutv zuqc seix nyei sic, yaac hiuv duqv hnangv haaix nor wuonx mienh waaic mienh zuqc dingc jienv zuiz, zuov siemv zuiz nyei hnoi taux.*")

Zien-zien siex Yesu nyei mienh maiv haih ndortv njoux en (Lomaa 8:35-39), maiv gunv nzunc baav zoux piatv Tin-Hungh nyei waac. Mv baac siex Tin-Hungh mienh baamz zuiz ziouc ndortv orn-lorqc baengh orn. Ndaa[^]witv ganh zoux zorngh zengx gorngv ninh ndortv njoux en nyei orn-lorqc (Singx Nzung 51:12).

Siex Yesu nyei mienh zoux zuiz se bun mienh daanh Ziouv nyei mbuox, bun Ziouv nyei mbuox maiv duqv njang-laangc fai maiv bun mienh taaih Tin-Hungh nyei mbuox. 1 Ko[^]lin[^]to 5:16-17 mbuox cing mienh longc sin zoux zuiz se longc Giduc nyei sin zoux waaic. Siex Yesu mienh zoux zuiz ninh mbuo zoux mun Singx Lingh.

E[^]fe[^]so 4:30 "*Yaac maiv dungx bun Tin-Hungh nyei Singx Lingh nzauh. Tin-Hungh bun Singx Lingh meih mbuo, hnangv nqaapv jienv yienx nor, zuov Tin-Hungh oix zuoqc meih mbuo nzuonx nyei hnoi-nyieqc taux.*" Siex Tin-Hungh mienh zoux zuiz ziouc zuqc zangc Diex mborqv

njaaux (Hiv^vlu 12:5-7 "*Meih mbuo la'kuqv Tin-Hungh kuinx meih mbuo hnavg die kuinx dorn wuov deix waac fai? Ninh gorngv, 'Yie nyei dorn aac, Ziouv mborqv njaaux nyei ziangh hoc oix zuqc muangx longx, ninh gorngv-njaaux nyei ziangh hoc maiv dungx hnyouv namx. Weic zuqc Ziouv mborqv njaaux ninh hnavm nyei mienh, ninh zipv haaix dauh zoux dorn, ninh yaac longc biaav fitv.' Meih mbuo zuqc diev nyei kouv naanc se weic mborqv njaaux. Tin-Hungh zoux bun meih mbuo hnavg zoux bun ninh nyei dorn-jueiv nor. Maaih haaix dauh dorn-jueiv maiv zuqc ninh nyei die mborqv njaaux jiex?")*)

Se gorngv haaix laanh mienh baamz jienv zuiz mingh mv baac maiv buatc Tin-Hungh mborqv njaaux, maaih nyungc maiv horpc aqv. Se gorngv baamz jienv zuiz mingh mv baac maiv buatc Tin-Hungh mborqv njaaux se maiv zeiz ninh nyei dorn-jueiv fai naamh nyouz.

Oix zuqc hnavg haaix nor caux zoux zuiz nyei Giduc mienh jiu-tong? Mangc Matv[^]tai 18:15-20.

Maiv maaih haaix dauh baac-baac zoux jienv zuiz mingh fai baamz jienv zuiz mingh fai zoux sic doix-dekc jienv Tin-Hungh mingh haih gorngv benx duqv njoux nyei mienh. Maiv dungx mbuox naaiv nyungc mienh gorngv "*meih duqv njoux mi'aqv*" wuov nyungc eix-leiz. Se gorngv meih hiuv duqv naaiv nyungc mienh oix zuqc mbuox ninh mbuo goiv hnyouv guangc zuiz.

1 Yo[^]han 1:6-10, "*Se gorngv mbuo gorngv mbuo caux Tin-Hungh jiu tong mv baac corc yangh hmuangx nyei jauv nor, mbuo kungx gorngv-baeqc hnavg, maiv ei zien leiz zoux. Mv baac se gorngv mbuo yiem njang hnavg Tin-Hungh yiem njang nor, mbuo ziouc laanh caux laanh jiu tong. Ninh nyei Dorn, Yesu, nyei nziaamv yaac nzaaux nzengc mbuo nyei yietc zungv zuiz. Se gorngv mbuo gorngv mbuo maiv maaih zuiz, naaiv se nduov ganh hnavg. Zien leiz maiv yiem mbuo nyei hnyouv aqv. Se gorngv mbuo nyiemc mbuo nyei zuiz, Tin-Hungh se ziepc zuoqv nyei, baengh fim nyei, ziouc guangc mbuo nyei zuiz caux mbuo zoux nyei yietc zungv waaic sic, fioux mbuo cing-nzengc daaih. Se gorngv mbuo gorngv mbuo maiv baamz zuiz, se dorngx hnavg mbuo zoux bun Tin-Hungh gorngv-baeqc nor. Tin-Hungh nyei waac yaac maiv yiem mbuo nyei hnyouv aqv.*" **Weic naaiv, maiv dungx nduov naaiv nyungc mienh.**

1 Yo[^]han 3: 4-10, "*Haaix dauh baamz zuiz se baamz Tin-Hungh nyei leiz-latc weic zuqc zuiz se baamz leiz-latc nyei sic. Meih mbuo hiuv duqv Giduc daaih weic teix mbuo nyei zuiz. Ninh ganh yaac maiv maaih zuiz. Haaix dauh caux Giduc juangc maengc ziangh, ninh maiv baamz jienv zuiz mingh. Haaix dauh baamz jienv zuiz mingh, wuov dauh maiv buatc jiex Giduc, yaac maiv hiuv duqv ninh. Fu'jueiv aah! Maiv dungx muangx haaix dauh nduov meih mbuo. Haaix dauh zoux horpc, wuov dauh ziouc caux Tin-Hungh horpc hnyouv, hnavg Giduc caux Tin-Hungh horpc hnyouv nor. Haaix dauh baamz zuiz se mienv nyei hungh nyei mienh, weic zuqc mienv nyei hungh m'daaih yiem gorn baamz zuiz taux ih zanc. Weic naaiv Tin-Hungh nyei Dorn daaih, se weic mienc nzengc mienv nyei hungh zoux nyei gong. Haaix dauh zoux Tin-Hungh nyei naamh nyouz, wuov dauh maiv baamz jienv zuiz mingh weic zuqc Tin-Hungh nyei fiem-fingx yiem jienv ninh nyei hnyouv. Tin-Hungh zoux ninh nyei Die, ninh ziouc maiv haih baamz jienv zuiz mingh. Hnavg naaiv mbuo haih hiuv duqv haaix dauh zoux Tin-Hungh nyei naamh nyouz, haaix dauh zoux mienv nyei hungh nyei naamh nyouz. Haaix dauh maiv zoux horpc fai maiv hnavm ninh nyei gorx-youz, wuov dauh se maiv zeiz Tin-Hungh nyei naamh nyouz aqv.*"

Da'luoqc joux waac naaic:

Mienv haih bieqc sienx Tin-Hungh nyei mienh nyei fai?

Ging-sou: Matv[^]tai 12:22-32; Ko[^]lo[^]si 1:13

Tin-Hungh njoux mbuo leih ndutv hmuangx nyei qaqv, suiv bieqc ninh Dorn-hnamv nyei guoqv.

Mbuo oix zuqc jangx jienv, kungx Tin-Hungh nyei waac (Ging-sou) dongh mbuo haih bungx duqv hnyouv yaac gorngv zien taux mienv nyei hungh caux mienv nyei gorn. Yiem Ging-sou mbuo buatc mienv haih bieqc mienh, bieqc saengh kuv. Mv baac naaic nyei se "Mienv haih bieqc zien-zien sienx Tin-Hungh nyei mienh nyei fai?"

Maiv maaih haaix nyungc hoqc fai njaaux fai haih cuotv Tin-Hungh nyei leiz. Gaa[^]laa[^]tie 1:8, *"Maiv gunv yie mbuo fai yiem tin-dorng h daaih nyei fin-mienh zunh ganh nyungc kuv fienx, maiv hnangv yie mbuo zunh bun meih mbuo wuov nyungc kuv fienx nor, bun ninh zuqc zioux/dingc zuiz aqv."*

Ging-sou hnangv haaix nor gorngv, mienv haih bieqc zien-zien sienx Tin-Hungh nyei mienh nyei fai? Ging-sou maiv maaih yietc norm dorngc gorngv taux mienv bieqc zien-zien sienx Tin-Hungh nyei mienh. **Maiv maaih yietc nzunc.** Mbuo yaac maiv buatc mienh zunc mienv cuotv jiex zien-zien sienx Tin-Hungh nyei mienh. Ging-sou maiv maaih dorngx njaaux taux gorngv heuc mbuo zunc mienv cuotv yiem sienx fai maiv sienx nyei mienh. Kungx Yesu ganh caux Gong-zoh mbuo zunc mienv cuotv hnangv (Gong-zoh 19:14-17 *"Maaih Yiutai Mienh nyei yietc dauh sai mienh bieiv, mbuox heuc Sewaa, maaih siec dauh dorn hnangv naaiv nor zoux. Wuov dauh mienv dau ninh mbuo, 'Yesu yie hiuv nyei, Baulo yie zieqv duqv nyei. Mv baac meih mbuo ni? Dongh haaix dauh?' Maaih hieh guaiv mienv yiem sin wuov laanh mienh ziouc biu mingh nyau jienv borngz hingh ninh mbuo yietc zungv. Ninh mbuo laengh gaengv nyei biaux cuotv wuov norm biau, yietc zungv mun nzengc. Yiem E[^]fe[^]so Zingh, maiv gunv Yiutai Mienh fai fingx-fingx Janx haiz naaiv deix sic, ninh mbuo gamh nziex haic. Mienh ziouc aengx jaa taaih Ziouv Yesu nyei mbuox camv. Yiem nzunc-nzunc, zunc cuotv yiem maiv sienx Tin-Hungh nyei mienh hnangv."*)

Ging-sou bun cing mbuo hiuv duqv gorngv mienv maiv haih bieqc yiem zien-zien sienx Tin-Hungh nyei mienh. Weic 2 Ko[^]lin[^]to 6:16 *"Tin-Hungh nyei singx dinc caux miuc-fangx hnangv haaix nor haih doix-dongh? Weic zuqc yie mbuo zoux ziangh jienv nyei Tin-Hungh nyei singx dinc. Hnangv Tin-Hungh gorngv nor, 'Yie oix caux yie nyei baeqc fingx yiem, oix yiem ninh mbuo mbu'ndongx. Yie ziouc zoux ninh mbuo nyei Tin-Hungh, ninh mbuo yaac zoux yie nyei baeqc fingx.'* Singx Lingh yiem nyei dorngx, mienv maiv haih caux juangc dorngc yiem.

Yiem Ko[^]li[^]si 1:13 *"Tin-Hungh njoux mbuo leih ndutv hmuangx nyei qaqv, suiv bieqc ninh Dorn-hnamv nyei guoqv"*. Njoux en njoux mbuo leih ndutv mienv yaac goux jienv mbuo maiv bun mienv bieqc. Baulo gorngv mbuo duqv hingh weic Yesu (Lomaa 8:37). Yiem 1 Ko[^]lin[^]to 15:57, *"Mv baac laengz zingh Tin-Hungh, ninh bun mbuo weic mbuo nyei Ziouv Yesu Giduc duqv hingh."* Yiem 2 Ko[^]lin[^]to 2:14 *"Mv baac laengz zingh Tin-Hungh. Mbuo caux Giduc juangc maengc ziangh, Tin-Hungh yaac longc Giduc ciev bieiv dorh mbuo zanc-zanc duqv hingh."* Yiem 1 Yo[^]han 2:13 *"Yie fiev fienx bun meih mbuo weic zuqc meih mbuo hingh jiex*

hiuang orqv wuov dauh mi'aqv." Yiem 1 Yo[^]han 4:4, "*Fu'jueiv aah! Meih mbuo zoux Tin-Hungh nyei mienh yaac hingh jiex wuov deix zunh jaav leiz nyei mienh mi'aqv. Weic zuqc yiem meih mbuo nyei hnyouv wuov dauh se gauh henv jiex yiem baamh gen wuov dauh."* **Mbuo sienx Tin-Hungh nyei waac nor mbuo sienx gorngv mienv maiv haih bieqc yiem zien-zien nyei sienx Tin-Hungh nyei mienh.**

Zien-zien sienx Yesu nyei mienh maaih siang fiem-fingx, weic benx siang-yungz jiex daaih: daic weic zuiz, ziangh weic Tin-Hungh. Guangc nqoi loz mienh caux loz maengc.

Zien-zien nyei sienx Yesu nyei mienh za'gengh buatac cing nyei weic goiv yienc nyei maengc. Tin-Hungh nyei waac caux Singx Lingh za'gengh goiv yienc ziangh maengc caux zoux nyei sic. Maaih mienh oix gorngv "yie sienx nyei", mv baac Ging-sou yiem Yaagorpc gorngv sienx fim oix zuqc **ei** jienv zoux.

Se gorngv maiv maaih Singx Lingh yiem hnyouv, mangc Matv[^]tai 12:43-45 "*Hieh guaiv mienv yiem mienh nyei sin cuotv daaih wuov zanc ninh youh jienv deic-bung-haanz mingh lorz dorngr hitv. Mingh gau, lorz maiv duqv dorngr hitv. 44 Mienv ziouc gorngv, 'Aa, yie oix nzuonx yie nyei loz-biauv yiem aqv.'* Ninh ziouc nzuonx mingh buatac ninh nyei loz-biauv puotv njang nzengc, mbenc sung, henv henv wuov. 45 Ninh ziouc aengx mingh lorz siec dauh mienv gauh ciouv jiex ninh daaih. Ninh mbuo ziouc bieqc wuov dauh mienh nyei sin yiem. Wuov dauh mienh ziouc gauh kouv zinh ndaangc aqv. Meih mbuo naaiv doic hnyouv waaic nyei mienh yaac oix zuqc hnavg naaic." Maiv sienx Yesu, ninh mbuo nyei maengc ziouc koi nqoi bun mienv bieqc caux hoic. Zien-zien nyei sienx nyei mienh se maaih Singx Lingh yiem ninh mbuo nyei hnyouv (2 Ko[^]lin[^]to 6:16, mbuo nyei sin se Singx Lingh nyei singx dinc).

Ei 1 Bide 1:5, "*Weic meih mbuo sienx, meih mbuo duqv Tin-Hungh nyei qaqv beu jienv, zuov taux setv mueiz nyei hnoi Tin-Hungh liuc leiz ziangx nyei njoux en cuotv daaih."* Weic naaiv "*Mbuo hiuv duqv Tin-Hungh nyei naamh nyouz maiv maaih haaix dauh zanc-zanc baamz zuiz, weic zuqc Tin-Hungh nyei Dorn beu jienv ninh. Hiuang orqv wuov dauh yaac maiv haih hoic ninh*" (1 Yo[^]han 5:18). **Se gorngv Singx Lingh yiem mbuo nyei maengc, mienv maiv haih daaih fatv.** Mienv bieqc nyei mienh biux mengh gorngv ninh se maiv zeiz sienx Yesu nyei mienh.

Da'cietv joux waac naaic:

Guangc jiex auv aengx longc da'nyeic torngx nyei mienh haih zoux zunh doz mienh nyei fai?

(Ging-sou 1 Ti[^]mo[^]tai 3:2; Matv[^]tai 19:12; 1 Ko[^]lin[^]to 9:5; Tidatc 1:6)

Haaix zanc mienh naaic taux dorngr jaa caux leih cai-doix, fai aengx dorngr nzunc jaa nyei jauv, zaih dangc nziouv zanc mienh naaic taux: "leih cai-doix liuz aengx dorngr jaa nyei mienh haih zoux zunh doz mienh fai dorh jiu-bang nyei mienh nyei fai?" Naaiv se aqc nyei naaic bun jiu-bang mienh caux jiu-bang. Weic zuqc maaih mienh camv maaih hnyouv oix fu-sux Tin-Hungh

fai zoux Ziouv nyei gong nyei, mv baac weic ninh mbuo leih jiex auv ziouc maaih camv maiv zipv naaiv nyungc mienh.

Maaih mienh sienx gorngv maiv gunv jiex daaih weic haaix diuc fai haaix nyungc, leih cai-doix nyei mienh maiv haih zoux zunh doz nyei mienh. Ih jaax maaih mienh liemh maiv zaah taux jiex daaih nyei sic, maiv mangc mienh nyei maengc, la'guaih ginv fai longc mienh zoux zunh doz mienh weic maiv maaih mienh, fai weic ninh mbuo qiemx zuqc zunh doz mienh. Ih jaax hnoi maaih zunh doz mienh camv nyei guangc auv, mv baac mienh corc sueih ninh mbuo zunh jienv doz mingh fai zoux zunh doz mienh.

Dau nyei waac oix zuqc yiem Ging-sou. Ging-sou hnavg haaix nor gorngv taux naaiv norm hoc-dauh? Ging-sou haih tengx mbuo bieqc hnyouv. Guangc liuz auv nyei mienh, aengx mingh longc ganh dauh auv nyei mienh haih zoux zunh doz mienh nyei fai? Oix zuqc dau duqv horpc se gorngv oix ei Ging-sou zoux cih cunx ndorqc nyei zunh doz mienh.

Da'yietv guanh mienh sienx gorngv leih auv nyei mienh aengx longc nzunc auv nyei mienh maiv haih zoux zunh doz mienh weic zuqc Baulo gorngv nyei waac yiem 1 Ti^{mo}^tai 3:2 "*Jiu-baang nyei mienh gox oix zuqc zoux maiv maaih dorngx daanh nyei mienh, kungx longc nduqc dauh auv, haih zavn ganh, gunv duqv ganh, zoux dorh leiz nyei mienh, maaih hnyouv zipv kaeqv, yaac haih njaaux mienh*". Janx meiv guoqv nyei waac "*husband of one wife*" janx Gikc waac "*mias gunaikos andra,*" - maaih eix-leiz gorngv "yietc laanh m'sieqv dorn nyei m'jangc", fai "yietc laanh auv nyei m'jangc".

Mienh bieqc hnyouv bieci nyungc jauv taux naaiv joux waac:

- Zoux zunh doz mienh oix zuqc maaih auv
- Zoux zunh doz mienh maiv haih longc gauh camv yietc dauh auv
- Zoux zunh doz mienh oix zuqc longc nduqc torngx auv nyei mienh
- Zoux zunh doz mienh oix zuqc zoux cing-nzengc, ziepc zuoqv nyei bun auv (yietc dauh auv nyei nqox-mienh)

Porv mengh taux naaiv deix bieci nyungc sienx:

Zoux zunh doz mienh oix zuqc maaih auv. Hnavg naaiv nor sienx se bieqc hnyouv dorngc Baulo gorngv nyei mouz deic (weic zuqc ninh gorngv yiem 1 Ko^{lin}^to 7:7-9, 32-35 "*Th zanc yie mbuox maiv maaih jaa nyei mienh caux auv-guaav, meih mbuo hnavg yie nor, daan sin yiem gauh longx* "; Matv^{tai} 19:12) Baulo maiv dan zoux gong-zoh hnavg, ninh yaac zoux zunh doz mienh, mv baac ninh maiv maaih auv. Ninh daanh sin yiem. Ninh maiv haih gorngv mbuox Ti^{mo}^tai zoux zunh doz mienh oix zuqc maaih auv se gorngv ninh ganh zungv maiv maaih. Se gorngv zoux zunh doz mienh oix zuqc maaih auv nor, haaix laanh m'jangc maiv maaih auv nyei mienh ziouc maiv haih zoux mi'aqv. Yesu ganh zungv maiv haih zoux. Naaiv se maiv zeix Ging-sou njaaux nyei.

Zoux zunh doz mienh maiv haih longc gauh camv yietc dauh auv. Naaiv guanh sienx nyei "longc nduqc dauh auv" se "maiv haih gauh camv yietc dauh". Naaiv se benx yietc nyungc sic yiem Baulo nyei ziangh hoc. Se gorngv Baulo oix gorngv zunh doz mienh maiv haih longc gauh

camv yietc dauh auv ninh hngv wuov nor gorngv mi'aqv. **Longc nduqc dauh auv** nyei eix-leiz se gorngv taux longc i dauh auv fai i dauh nqox nyei mienh se benx dorngc nyei jauv, maiv haih ziepc zuoqv bun taux i dauh fih hngv (1 Ti^{mo}^tai 3:12; 1 Ti^{mo}^tai 5:9; Tidatc 1:6).

Zoux zunh doz mienh oix zuqc longc yietc torngx auv nyei mienh. Naaiv guanh sienx gorngv “longc nduqc dauh auv” se longc yietc torngx hngv. Naaiv guanh mienh yaac sienx gorngv leih liuz cai-doix se maiv haih aengx longc nzunc auv nqox. Ging-sou maiv gorngv taux se gorngv auv daic mingh nor ngox maiv haih longc duqv nzunc auv. Baulo ganh heuc auv-guaav mienh aengx longc nqox maaih fu'jueiv weic maiv bun win-wangv daanh (1 Ti^{mo}^tai 5:14). Simv maiv luonx horngc nyei jauv se laanh laanh maaih ganh nyei auv/nqox.

Zoux zunh doz nyei mienh horpc zuqc ziepc zuoqv bun ganh nyei auv. Naaiv guanh mienh sienx gorngv “longc nduqc dauh auv” se maaih eix-leiz gorngv ziepc zuoqv bun maaih jienv nyei auv. Naaiv buatec gauh doix ging-sou nyei eix-leiz.

Naaiv joux waac se benx orn nyei waac, gorngv taux ziepc zuoqv bun taux nduqc dauh auv. Naaiv joux waac maiv bun mienh mingh pien fai piatv yietc dauh auv nyei jaa (weic naaiv zunh doz mienh maiv haih longc gauh camv yietc dauh auv, maiv haih benx m'jangc longc m'jangc nyei mienh, fai mienh haih daanh nyei jaa). Gng-sou gorngv taux zunh doz mienh se “longc yietc dauh auv nyei mienh”. Naaiv nyungc mienh maiv haih bun mienh daanh taux gorngv ninh maiv ziepc zuoqv bun ninh nyei auv nyei mienh.

Zoux zunh doz nyei mienh oix zuqc hngv haaix nor: maaih gauh camv jiex yietc nyungc dongh puix duqv zoux zunh doz mienh/qualification: Wuov nzunc hnoi dau taux gorngv leih auv nyei mienh aengx longc nzunc auv haih zoux zunh doz mienh nyei fai? Se gorngv ninh ziepc zuoqv nyei bun ih zanc ninh longc jienv naaiv dauh auv. Baulo gorngv ninh oix zuqc. *“Haaix dauh maaih hnyouv oix zoux jiu-baang nyei mienh gox, wuov dauh oix zoux nyei se longx haic nyei gong.”* 2 *Jiu-baang nyei mienh gox oix zuqc zoux maiv maaih dorngx daanh nyei mienh* [eix-leiz: mienh maiv maaih haaix nyungc gorngv ninh zoux nyei sic se zuiz] *kungx longc nduqc dauh auv, haih zany ganh, gunv duqv ganh, zoux dorh leiz nyei mienh, maaih hnyouv zipv kaeqv, yaac haih njaaux mienh.* 3 *Ninh maiv hengx hopv diuv, maiv zoux ciouv mborqv mienh, hnyouv suonc nyei, maiv oix caux mienh nzaeng jaax, yaac maiv mauv nyaanh.* 4 *Oix zuqc haih gunv duqv longx ganh nyei hmuangv doic, njaaux ganh nyei fu'jueiv taaih ninh, muangx ninh nyei waac.* 5 *Se gorngv mienh maiv haih gunv duqv ganh nyei hmuangv doic, ninh hngv haaix nor haih goux Tin-Hungh nyei jiu-baang?* 6 *Siang-sienx nyei mienh maiv horpc zuqc zoux jiu-baang nyei mienh gox. Nzauh heix ninh haih ceng-hlo ziouc zuqc dingc zuiz, hngv mienv nyei hungh zuqc dingc zuiz wuov nor.* 7 *Zoux mienh gox nyei mienh oix zuqc dongh jiu-baang ga'nyiec nyei mienh funx mengh hoc longx nyei mienh. Ninh ziouc maiv zuqc mienh daanh yaac maiv zuqc mienv nyei hungh zaeng koux hlopv ninh”* (1 Ti^{mo}^tai 3:1-7).

Weic naaiv leih cai-doix nyei mienh fai guangc auv nyei mienh, se haih bun mienh daanh weic ninh zoux jiex daaih nyei (maiv gunv ndangc ninh sienx Yesu fai sienx liuz Yesu). Jiu-bang mienh haih daanh, weic zuqc ninh nyei dauh torngx auv se juangc norm laangz yiem fai juangc norm jiu-bang yiem. Weic naaiv maaih ziangh hoc guangc auv nyei mienh aengx longc nzunc auv nyei mienh maiv haih zoux zunh doz mienh. Fai ninh nyei daauh torngx auv nyei fu'jueiv maiv sienx Yesu, ninh maiv haih zoux zunh doz mienh.

Maiv haih gorngv guangc jiex auv nyei mienh ziouc maiv haih zoux zunh doz mienh (ndangc sienx Yesu fai sienx liuz Yesu). Oix zuqc mangc gaax ninh maaih dorngx mienh haih daanh nyei fai? Dongh zipv ninh zoux zunh doz nyei mienh oix zuqc buatc ninh benx maiv maaih dorngx daanh nyei mienh. Ninh haih zoux ziex nyungc gong tengx jiu-bang nyei, cuotv liuz zoux zunh doz mienh hhangv. **Za'gengh zoqc nyei, guangc liuz auv aengx longc siang auv nyei mienh haih zoux zunh doz mienh ei Ziouv nyei waac.** Naaiv maiv zeiz gorngv guangc liuz auv nqox nyei mienh se benx da'nyeic nzangh mienh wuov nyungc, mv baac leih cai-doix mienh oix zuqc ndaam camv-nyungc dongh ninh mbuo ginv nyei. Weic zuqc Tin-Hungh nzorng leih cai doix nyei jauv. **Tin-Hungh nyei en caux Yesu nyei nziaamv haih nzaaux nzengc yietc zungv zuiz nyei,** mv baac zuiz nyei jaax-zinh haih hoic ziex doic mienh.

Jiu-baang oix zipv naaiv nyungc mienh zoux ninh mbuo nyei zunh doz mienh oix zuqc zaah longc. **Mangc longx, hoqc longx yaac longc horpc** 1 Ti^{mo}^tai 3 caux Tidatc 1.

Da'betv joux waac naaic:

**Ganh daix ganh nyei mienh duqv njoux nyei fai?
Sienx Tin-Hungh mienh daix ganh nyei fai?**

Cuotvⁱ^yipv 20:13 "*Maiv dungx daix mienh*"; Gong-zoh 24:15 "*Yie yaac hhangv ninh mbuo nor, kaux Tin-Hungh maaih lamh hnamv, weic zuqc yie yaac sienx maiv gunv kuv mienh fai orqv mienh, daic mingh mv baac aengx oix nangh daaih*"; Lomaa 5:2-5 *mbuo ih zanc duqv nyei en. Mbuo a'hneiv haic weic zuqc hiuv dingc mbuo oix duqv buonc Tin-Hungh nyei njang-laangc. 3 Maiv daan naaiv hhangv, maiv gunv mbuo maaih naanc zingh, mbuo orn-lorqc haic weic zuqc mbuo hiuv duqv naanc zingh bun mbuo maaih noic diev duqv. 4 Mbuo maaih noic diev, Tin-Hungh ziouc buatc horpc hnyouv, mbuo cingx daaih maaih lamh hnamv. 5 Hhangv naaic maaih lamh hnamv maiv haih bun mbuo piatv, weic zuqc Tin-Hungh ceix Singx Lingh bun mbuo yaac longc Singx Lingh bun mbuo hiuv duqv Tin-Hungh ndongc haaix hnamv mbuo.*"

Mbuo hiuv duqv Tin-Hungh haih guangc nzengc nyungc-nyungc zuiz. Duqv njoux nyei mienh duqv Tin-Hungh guangc ninh mbuo zoux jiex daaih nyei zuiz, ih zanc zoux nyei zuiz, caux nqa'haav hingv zoux nyei zuiz (Ko^{lo}^si 2:13-14 "*Zinh ndaangc laaix meih mbuo baamz zuiz, yaac laaix meih mbuo maiv jiex gaatv nyei leiz guangc baamz zuiz nyei fiem-fingx, meih mbuo se dorngx daic mi'aqv. Mv baac ih zanc Tin-Hungh bun meih mbuo caux Giduc nangh daaih yaac guangc mbuo nyei yietc zungv zuiz. Ninh betv guangc dingc mbuo nyei zuiz nyei zaeqv-daan, dongh fiev jienv caux mbuo doix-dekc nyei leiz-latc. Ninh zorqv mingh ding jienv ziepc nzaangc jaax mi'aqv*"). Baulo gorngv maiv maaih haaix nyungc haih leih ndutv Tin-Hungh nyei hnamv bun taux mbuo (Lomaa 8:38-39). Mv baac, **ganh daix ganh se hniev haic nyei zuiz,** ndongc daix mienh nyei zuiz (Cuotvⁱ^yipv 20;13; 21:23).

Mbuo oix zuqc naaic gaax, daix ganh nyei mienh za'gengh zien-zien sienx Yesu nyei fai? Deix baav ninh mbuo maiv za'gengh sienx, weic zuqc Yesu haih tengx ninh mbuo jaev nyungc-nyungc sic nyei, weic haaix nyungc zuqc daix ganh?

Zien-zien sienx Tin-Hungh nyei mienh za'gengh maaih laamh hnamv dorngx (Gong-zoh 24:15; Lomaa 5:2-5; 1 Ko^lin^to 1:10; Lugaa 9:23-25; Lomaa 8:28; Ko^lo^si 1:29). Daix ganh nyei mienh nzengc-nzengc *maiv laamh hnamv dorngx* nyei mienh.

Aengx corc maaih diuc, hnamv taux daix ganh nyei mienh oix zuqc zaah taux ganh nyei hnyouv. Weic zuqc caux Yesu juangc maengc ziangh nyei mienh maiv haih baamz jienv zuiz mingh. (Cong-mengh 23:7; 1 Yo^han 3:9). Daix ganh nyei mienh se gauh camv maiv nyiemc Yesu zoux Ziouv nyei mienh. Weic zuqc ninh ganh longc ninh nyei za'eix maiv ei Tin-Hungh nyei za'eix. Maaih camv dongh daix ganh nyei mienh gorngv ninh mbuo sienx Yesu mv baac maaih hnoi duqv haiz Yesu gorngv nyei waac yiem Matv^tai 7:23, "Leih nqoi yie, yie maiv hiuv duqv meih, *meih mbuo zoux waaic nyei mienh gaavn biaux nqoi maah.*"

Sienx Tin-Hungh mienh yaac maaih jiex daix ganh nyei, mv baac za'gengh maiv nangc maaih fai maiv haih cuotv daaih. Weic naaiv, hnamv oix daix ganh nyei mienh za'gengh oix zuqc zaah mangc gaax ninh mbuo se za'gengh sienx Tin-Hungh nyei fai? 2 Ko^lin^to 13:5 "*Meih mbuo oix zuqc zaah ganh mangc gaax, meih mbuo za'gengh sienx Yesu Giduc fai maiv sienx. Oix zuqc kauv meih mbuo ganh. Meih mbuo maiv hiuv duqv Giduc Yesu yiem meih mbuo gu'nyuoz fai? Cuotv liuz meih mbuo kauv maiv duqv nor, meih mbuo hiuv nyei.*"

Da'juov joux waac naaic:

Saadaan, mienv nyei hungh, haih muangx duqv haiz yie hnamv nyei sic nyei fai? Mienv haiz mbuo gorngv nyei caux hnamv nyei sic nyei fai? Hnangv naaic mbuo oix zuqc maiv daux gaux mbui mienv ziouc maiv haih haiz mbuo fai?

Maiv maaih yietc norm dorngx yiem Ging-sou gorngv taux Mienv nyei hungh hiuv duqv nyungc-nyungc. Mv baac Mienv nyei hungh caux mienv se hiuv duqv baamh mienh nyei fiem-fingx caux zoux guenx nyei sic nyei weic zuqc ninh buatec dauh doix mienh zoux zuiz taux ih zanc. Ninh haih cai gorngv mienh haih hnangv naaiv nor hnangv wuov nor zoux nyei se gorngv mienh buangh naaiv fai buangh wuov fai mienh yiem naaiv fai wuov. Ninh buatec guenx baamh mienh zoux nyei.

Mv baac Mienv nyei Hungh maiv haih hiuv baamh mienh hnamv nyei fai yiem hnyouv nyei, kungx Tin-Hungh ganh haih hnangv. Weic zuqc fin-mienh zungv maiv hiuv nyungc-nyungc. Cing-nzengc nyei fin-mienh maiv hiuv nyungc-nyungc, zoux waic zoux zuiz nyei nor gauh maiv hiuv. Wuov nyungc, mienv nyei hungh se zoux zuiz nyei yietc dauh fin-mienh ninh ziouc maiv haih hiuv duqv mbuo hnamv nyei, maiv gunv ninh haih cai gorngv baamh mienh zoux guenx nyei sic.

Mbuo hnangv haaix nor caux mienv nyei hungh caux mienv doix-dekc? E^fe^so 6:11-12 "*Oix zuqc zorqv Tin-Hungh bun nyei yietc zungv mborqv jaax nyei wuoqc ginc zornng jienv. Meih mbuo ziouc haih souv duqv wuonv, ngaengc jienv mienv nyei hungh guv guaix nyei za'eix. 12 Weic zuqc mbuo maiv caux baamh mienh "maaih orv maaih nziaamv nyei". mborqv jaax. Se caux yiem ndaamv-lungh zoux hlo nyei, maaih lingc maaih qaqv gunv naaiv hmuangx haic nyei baamh gen wuov deix, caux yietc zungv waaic haic nyei mienv mborqv jaax.*"

Ging-sou heuc mbuo oix zuqc zorqv Tin-Hungh bun nyei yietc zungv mborqv jaax nyei wuoqc ginc zornj jienv, maiv zeiz mingh heuc mienh tengx meih zunc mienv. E^{fe}so 6:14-18 "*Weic naaiv oix zuqc zorqv Tin-Hungh bun daaih mborqv jaax nyei yietc zungv wuoqc ginc zornj jienv. Taux wuov norm orqv haic nyei hnoi meih mbuo ziouc haih caux wuov deix win-wangv doix-dekc. Zoux liuz nyungc-nyungc meih mbuo corc haih yiem duqv wuonv nyei. Hnangv naaic, souv wuonv maah! Longc zien leiz zoux houx-hlaang sai jienv jaaiv. Longc zoux horpc nyei jauv zoux hlieqv-jaapv buang jienv la'kuotv. Yaac oix zuqc zanc-zanc liuc leiz ziangx zunh baengh orn nyei kuv fienx weic zoux heh daapc. Maiv daan mbuoqc naaiv. Oix zuqc longc sienx fim zoux torngv-baaiah nanv jienv ziouc haih mietc hiiuang orqv wuov dauh maaih douz nyei forng-cang. Oix zuqc longc njoux en zoux hlieqv-muoc ndongx jienv. Yaac nanv jienv Singx Lingh nyei nzuqc ndaaav, se dongh Tin-Hungh nyei waac. Oix zuqc kaux Singx Lingh zanc-zanc weic nyungc-nyungc jauv dauh gaux tov Tin-Hungh. Weic naaiv oix zuqc ging jienv hnyouv dauh gaux, maiv dungx guangc. Oix zuqc maiv dingh liouh nyei weic Tin-Hungh nyei zuangx mienh dauh gaux.*"

Maiv maaih yietc norm dorngx fai yietc yienc Ging-sou gorngv Mienv nyei Hungh haih hiuv mbuo hnamv nyei sic. Mienv haih haiz mbuo gorngv nyei, bieqc hnyouv mbuo gorngv nyei. Ninh mbuo yaac haih gaqv baamh mienh nyei fiem-fingx caux zoux nyei sic nyei. Weic ninh mbuo buatc ziox doic baamh mienh.

Wuov nyungc nor, mbuo oix zuqc maiv gorngv cuotv waac qiex weic nzauh heix mienv haiz fai? Maiv zeiz, mbuo haih bungx laangc nyei mingh Yesu nyei dinc. Mbuo buatc mengh nyei Loz Ngaengc Waac, Ging-sou maiv gorngv Ndaa^{witv} hungh gorngv waac-saapv mbuox Tin-Hungh, mv baac Ging-sou gorngv Ndaa^{witv} caux Tin-Hungh gorngv waac. Baulo yaac maiv mbuox sai-gorx mbuo heuc maiv dungx dauh gaux mbui. Se gorngv ninh dauh gaux, ninh maiv gunv Mienv haiz ninh. Maiv gunv mienv haiz nyei mv baac ninh ziangh ei jienv Ziouv nyei waac, Mienv noic maiv duqv ninh. "*Tin-Hungh longc Baulo nyei buoz zoux cuotv lengc jeiv mbuoqc horngh nyei sic. Baulo longc jiex nyei siqc jaaav caux ninh torngv lui-houx wuov kuaaiv ndie, mienh dorh mingh an baengc mienh nyei sin, baengc ziouc longx. Liemh mienv yaac zuqc zunc cuotv mi'aqv. Maaih deix Yiutai Mienh youh jienv zueih laangz zueih mungv mingh tengx zunc hieh guaiiv mienv cuotv mienh nyei sin. Ninh mbuo seix mangc gaax ninh mbuo longc Ziouv Yesu nyei mbuox haih zunc duqv mienv cuotv fai maiv cuotv. Ninh mbuo mbuox mienv, "Yie dengv Baulo zunh wuov dauh Yesu zunc meih mbuo cuotv mingh."* Maaih Yiutai Mienh nyei yietc dauh sai mienh bieiv, mbuox heuc Sewaa, maaih siec dauh dorn hnangv naaiv nor zoux. Wuov dauh mienv dauh ninh mbuo, "*Yesu yie hiuv nyei, Baulo yie zieqv duqv nyei. Mv baac meih mbuo ni? Dongh haaix dauh?*" (Gong-zoh 19:11-15)

Da'ziepc joux waac naaic:

Sienv Yesu mienh horpc zuqc maaiz hueix, ndouv zinh nyei fai?

Da'yietv, ndouv zinh fai maaiz hueix fai Lottery se maiv zeiz benx goux longx Tin-Hungh nyei jaa-dingh nyei mienh. Weic zuqc nyungc-nyungc se Tin-Hungh bun mbuo tengx ninh goux nyei mienh. Yaagorpc 1:17 gorngv, "*Yietc zungv longx nyei, dunh yunh nyei zingh nyeic yiem tin-dorngh njiec daaih. Se Tin-Hungh, dongh zeix cuotv lungv nyei nyungc-nyungc njang wuov dauh, ceix bun mbuo.*" Mienh weic haaix nyungc ndouv zinh fai maaiz

lottery/hueix? Weic ninh mbuo maiv buangv hnyouv ninh mbuo maaih nyei (1 Ko^{lin}to 6:9-10 gorngv “mauv ga’naaiv” nyei mienh maiv duqv yiem Tin-Hungh nyei guoqv). Mange E^{fe}so 5:3-5 “*Mauv ga’naaiv nyei sic*” maiv maaih buonc yiem Giduc caux Tin-Hungh nyei guoqv. Ndouv zinh caux maaiz hueix se yietc nyungc zuiz dongh janx nyei waac heuc “get-rich-quick” nyei nduov.

Maaih ndouv zinh caux maaiz hueix mienh gorngv, “Ging-sou yiem haaix gorngv taux heuc maiv dungx ndouv zinh fai maiv dungx maaiz hueix?” Maaih camv nyungc nyei Ging-sou maiv mengh-mengh nyei nuqv taux fai gorngv taux. Se gorngv gorngv taux nyungc-nyungc nor yaac maiv maaih sou haih fiev duqv hingh. Mv baac Ging-sou nyei eix-leiz, fai principle, njaaux taux nyei.

Yie maiv sienx gorngv ndouv zinh fai maaiz hueix, fai haaix nyungc dongh mienh siepc-siepv nyei duqv mienh nyei nyaanh se horpc Tin-Hungh nyei za-eix. **Maaih mienh duqv weic maaih mienh ndortv.** Ging-sou njaaux mbuo heuc goux longx Tin-Hungh bun mbuo goux nyei nyungc-nyungc fuqv, dorh mingh ndouv fai maaiz hueix se cing nyei *maiv zeiz goux longx Ziouv nyei jaax-dingh nyei javv.*

Ndouv zinh maaiz hueix hoic mienh zoux nyei mienh, hoic zoux nyei mienh nyei hmuangv doic, hoic deic bung mienh. Ndouv nyei mienh caux maaiz hueix nyei mienh se camv nyei dongh kouv nyei mienh, zungv maiv maaih nyanc mv baac dorh mingh zoux guangc nyei mienh. Yie ganh maiv taux jiex ndouv zinh dorngx, mv baac haiz mienh gorngv ndouv nyei mienh se maiv zeiz dongh maaih zinh nyaanh camv gor maiv maaih dorngx aan nyei mienh, fai maaih cong-mengh longx nyei mienh. Weic zuqc guai nyei mienh hiuv duqv maiv haih hingh “machine”, hnavg mienh lorz cong-congx sim yiem mbiauh ndeic nor, za’gengh lorz maiv buatc, ndouv maiv hingh “machine”.

Oix liemh zeih butv zoih nyei mienh zuqc koux hopv ninh mbuo, hnavg mienh zaeng koux hopv norqc nor. Lueic maiv mingh lorz gaeng yiem lomc zangc nyei norqc zuqc koux hopv daic. Maaih haaix nyungc gaeng yiem dingc nyei norqc taux fatv yaac maiv biaux?

Ging-sou maiv maaih dorngx heuc mbuo lorz nyanh yiem ndouv fai maaiz hueix nyei javv. Yiem Meiv guoqv lauh lauh haiz maaih laanh mienh hingh, *mv baac ziex baeqv ziux mienh ndortv yaac maiv ko^{lo}.* Ndouv duqv nyei mienh weic maaih mienh ndortv. Ndouv zinh, maaiz hueix nyei mienh maaih hnyouv mauv, mauv nyei mienh jiex gorn mueic jieqv, m’zing buatc ziouc maiv gaux.

Maiv gunv deic bung mienh ndouv fai maaiz hueix, maaih huox camv maaic hueix, maaih dorngx camv ndouv zinh. Naaiv nyungc zoux nyei sic se doix-dekc Tin-Hungh nyei waac. Baulo mbuox sienx Tin-Hungh nyei mienh, “*Baamh mienh zoux sic maiv horpc Tin-Hungh, maiv dungx zuotc ninh mbuo nyei nyungc zoux. Mv baac oix zuqc bun Tin-Hungh goiv nzengc meih mbuo nyei hnyouv caux hnamv nyei javv, duqv siang-nyungc zeiv. Hnavg naaic meih mbuo haih hiuv duqv Tin-Hungh nyei za’eix, haaix nyungc se longx nyei, Tin-Hungh a’hneiv nyei, dunh yunh nyei za’eix.* (Lomaa 12:2). Maiv dan naaic hnavg mbuo oix zuqc maiv dungx zoux haaix nyungc dongh haih bun mbuo nyei zingh ginx ndortv fai mienh daanh mbuo (2 Ko^{lin}to 6:3).

Mbuo oix zuqc simv nqoi nyungc-nyungc dongh haih bun mienh weic mbuo zoux nyei sic sienx fim ndortv (1 Ko^{lin}to 8:13).

Ndouv zinh caux maaiz hueix se haih jiex inv, hnavg mienh buov in nor. Weic maaiah camv norm dorngx bun mienh ndouv zinh, bun mienh maaiz hueix, sienx Yesu mienh gorngv ninh mbuo maiv haih fongc horqc weic ndouv ndortv nzengc mi'aqv. Jiu-bang oix zuqc faix fim maiv dungx tengx ndouv zinh fai maaiz hueix liuz jomc nyei mienh. Naaiv nyungc mienh maiv dan maiv maaiah nyanc, qiemx zaeqv, ninh mbuo nduov ganh nduov mienh, bingx mienh nyei mienh.

Naaiv nyungc mienh qiemx zuqc Tin-Hungh nyei hnamv. Oix zuqc benx zingx nyei mienh bun ganh caux ganh nyei hmuangv doic, oix zuqc lorz doic dongh haih tengx ninh mbuo benx zingx nyei mienh, yaac gorngv zien mbuox ninh mbuo nyei mienh. Se gorngv sienx Yesu nyei mienh maiv buatac naaiv nyungc zuiz, ziouc zuqc Saadaan mienv nyei hungh nduov. Yiem mbuo nyei guoqv, zuiz jangv jienv mingh hnavg douz buov lomc nor. Mbuo buatac ndouv zinh dorngx, mienh yiem wuov guangc ninh mbuo nyei maengc, ziangh hoc, zinh nyaanh, mv baac mienh maiv gorngv taux naaic, kungx gorngv taux zoux gong mienh weic ndouv zinh dorngx bun mienh maaiah gong hnavg. Mv baac naaiv nyungc gong jaa zoux jaa bun mienh zoux zuiz.

Ndouv zinh maaiz hueix nyei mienh maiv dan hoic zuqc ganh, hmuangv doic, mv baac hoic deic bung mienh. Mienv oix mienh hnavg naaiv sienx, laaic duqv naaiv deix zoux hoic zuqc zoux nyei mienh hnavg. Zaaah taux ndouv zinh maaiz hueix nyei mienh gorngv, ndouv zinh nyei mienh nzengc-nzengc maaiah ganh nyungc sic caux jienv, weic maiv maaiah nyaanh ndouv zoux nyei zuiz se camv...wuov nzunc hnoi fu'jueiv yaac zuqc diev weic domh mienh nyei zuiz.

Baamh mienh zoux nyei sic maiv horpc Tin-Hungh mbuo maiv horpc zuqc zuotc. Mbuo zoux nyei nyungc zeiv oix zuqc bun mienh taaih Ziouv (1 Ko^{lin}to 10:31). Wuov nyungc, se gorngv maiv sienx nyei mienh zungv gorngv ndouv zinh maaiz hueix se waaic...sienx Tin-Hungh nyei mienh fungc la'guaiah mingh fatv?

Ziepc Yietv Joux Waac Naaic: **Tin-dorngv yiem haaix?**

Ging-sou: I^{saa}yaa 57:15; Laauc Yaangh 3:12; Laauc Yaangh 21:10

Mbuo duqv hoqc gorngv sienx Tin-Hungh nyei mienh daic liuz ninh mbuo nyei lingh wuonh mingh Tin-dorngv, maiv sienx Tin-Hungh nyei mienh mingh ndortv deic nyuoqc. Wuov nyungc aeqv, Tin-dorngv yiem haaix? Ging-sou mengh nyei njaaux gorngv maaiah Tin-dorngv nyei. Tin-dorngv se maiv maaiah ziangh hoc fai gapc jaaix dangv. Tin-dorngv se mangc duqv buatac, haih yiem duqv. Mbuo sienx dingc gorngv maaiah Tin-dorngv weic Yesu ganh gorngv ninh liuc leiz nyei dorngx bun sienx Tin-Hungh nyei mienh yiem. Yiem Yo^{han} 14:1-4 Yesu gorngv, "*Maiv dungx hnyouv huaang hnyouv nzauh. Oix zuqc sienx kaux Tin-Hungh yaac sienx kaux yie. Yie nyei Die nyei biauv maaiah yiem nyei dorngx camv nyei. Se gorngv maiv maaiah yie zungv mbuox meih mbuo mi'aqv. Yie yaac mingh liuc leiz dorngx bun meih mbuo yiem. Yie*

mingh liuc leiz ziangx dorngx bun meih mbuo yiem, yie aengx daaih dorh meih mbuo mingh caux yie yiem wuov. Yie yiem haaix meih mbuo ziouc caux yie yiem wuov. Yie oix mingh nyei dorngx wuov diuh jauv, meih mbuo yaac hiuv nyei."

Tin-dorngx za'gengh jangv fai hlo gor mbuo baamh mienh hnamv maiv zaic nyei. Yiem Laauc Yaangh 3:12 Yesu nyei fieng bun taux Fi[^]laa[^]nden[^]fi[^]e jiu-baang, Ninh gorngv taux yietc liuz yiem nyei dorngx: "*Haaix dauh duqv hingh, yie oix bun wuov dauh yiem yie nyei Tin-Hungh nyei singx dinc zoux norm ndiouh. Ninh yietc liuz maiv cuotv singx dinc aqv. Yie oix fiev yie nyei Tin-Hungh nyei mbuox yiem ninh nyei sin, yaac oix fiev yie nyei Tin-Hungh nyei zingh nyei mbuox, dongh yiem tin-dorngx, yie nyei Tin-Hungh wuov njiec daaih wuov norm siang-[^]Ye[^]lu[^]saa[^]lem Zingh. Yie yaac oix fiev yie ganh nyei siang-mbuox yiem ninh nyei sin"* Yiem Laauc Yaangh 21:10 *Singx Lingh ziouc gunv jienv yie, fin-mienh dorh yie mingh taux norm hlo haic, hlang haic nyei mbong, bun yie mangc wuov norm Cing-Nzengc Zingh, [^]Ye[^]lu[^]saa[^]lem, dongh yiem tin-dorngx, Tin-Hungh wuov, njiec daaih."*

Siang Tin-dorngx caux Siang Lungh Siang Ndau buatc zorpc jienv jiu-tong. Naaiv deix i norm dorngx za'gengh benx kuv yiem nyei dorngx taux maanc gouv maanc doic. Ziouv nyei njang-laangc za'gengh maiv maaih dorngx beiv, gauh nzueic jix baamh mienh haih hnamv duqv zaaic nyei fai buatc jiex nyei.

Tin-dorngx se dorngx dongh ziangh hoc caux dorngx maiv maaih nqaeqv. Hnangv Ging-sou gorngv yiem I[^]saa[^]yaa 57:15 "*Weic zuqc yiem gauh hlang jix Wuov Dauh, se yietc liuz yiem, maaih mbuox heuc Cing-Nzengc nyei Tin-Hungh, hnangv naaiv gorngv, 'Yie yiem hlang nyei, cing-nzengc nyei dorngx, yie yaac caux zieqv duqv ganh dorngc, hnyouv mun, nyiemc ganh zoux faix nyei mienh yiem. Weic bun nyiemc ganh zoux faix nyei mienh nyei hnyouv fimgv jiez, yaac bun zieqv duqv ganh dorngc, hnyouv mun nyei mienh nyei hnyouv fimgv jiez daaih'".* Tin-dorngx se maiv hnangv baamh mienh hnamv nyei weic zuqc baamh mienh hnamv nyei jauv se aiv, mbuo hnamv maiv zaaic.

Mbuo maiv zuqc gaqv fai hnamv daaix Tin-dorngx se hnangv naaiv hnangv wuov. Ging-sou gorngv mbuox mbuo maaih Tin-dorngx dongh Yesu liuc leiz nyei dorngx bun sienx ninh nyei mienh yiem. Naaiv norm cing-nzengc nyei dorngx za'gengh benx zien dorngx. Dongh maaih siang sin nyei mienh duqv yiem yietc liuz.

Ziepc Nyeic Joux Waac Naaic:

Mbuo zieqv duqv doic yiem wuov Tin-dorngx nyei fai?

Ging-sou: Tin deic douh 25:8; 35:29; 49:29; Saaub Mienh 20:24; Domh jien 2:10

Dau nyei waac se: Aeqc, mbuo zieqv duqv doic yiem Tin-dorngx nyei weic zuqc fiev Loz Ngaengc Waac nyei mienh gorngv daic mingh nyei mienh se "*guei seix, mingh caux ninh nyei mienh yiem.*" (Tin deic douh 25:8; 35:29; 49:29; Saaub Mienh 20:24; Domh jien 2:10). Yiem 2 Saa[^]mu[^]en 12 dongh Ndaa[^]witv hungh nyei dorn daic, Ndaa[^]witv hungh gorngv "*Gu'nguaaz daic yie fungc oix zuqc zei? Yie aengx haih dorh ninh nangh daaih fai? Yie haih mingh ninh*

wuov mv baac ninh maiv haih nzuonx yie naaiv" (2 Saa^mu^en 12:23). Ndaa^witv hungh gorngv nyei waac bun cing ninh sienx gorngv ninh aengx buac nzunc ninh nyei dorn nyei.

Yiem Siang Ngaengc Waac gorngv gauh mengh. Dongh Yesu liepc nyanc singx hnaangx wuov muonz ninh gorngv, *"Yie mbuox meih mbuo, yangh naaiv jiex yie maiv nyanc Siex Maengc Zipv nyei hnaangx. Zuov taux naaiv donx hnaangx nyei zien eix leiz dunh yunh nzengc, se dongh Tin-Hungh daaih zoux Ziouv gunv mienh nyei ziangh hoc, yie cingx daaih aengx duqv nyanc.'* Gorngv liuz, *Yesu zorqv zaanv a'ngunc diuv daaih laengz zingh Tin-Hungh yaac gorngv, "Zipv naaiv norm zaanv mingh bun nqoi yietc laanh hopv deix".* Yesu laengz jienv ninh caux ninh nyei sai-gorx mbuo aengx duqv juangc jienv nyanc hopv nzunc yiem Tin-dorngh. Yiem ganh yiemc Ging-sou yaac gorngv mengh nyei, *"Yie yaac mbuox meih mbuo, maaiah mienh camv nyei yiem dong bung caux fai bung oix daaih yiem Tin-Hungh nyei guoqv caux Apc^laa^ham, I^sac caux Yaakopv juangc dieh nyanc hnaangx"* (Matv^tai 8:11).

Mbuo buac Mose caux E^li^yaa hinc cuotv, sai-gorx mbuo zieqv duqv ninh mbuo nyei, maiv gunv ninh mbuo yiem ndangc ziex baeqv hnyangx jiex daaih: *"Naaiv deix buo dauh sai-gorx aengx buac Mose caux E^li^yaa hinc cuotv daaih caux Yesu gorngv waac"* (Matt. 17:3). Bide, Yaagorpc, caux Yo^han zieqv duqv ninh mbuo nyei. Yiem wuov Tin-dorngh mienh haih zieqv duqv mbuo nyei. Mbuo yaac haih zieqv duqv dongh mbuo maiv buac jiex nyei mienh yiem wuov Tin-dorngh nyei.

Duqv Yesu zuoqc nzuonx nyei mienh yietc liuz maaiah mbuo ganh nyei mbuox/fangx, janx nyei waac heuc "identity" yiem wuov Tin-dorngh dunh yunh nyei. Mbuo haih caux jiex daaih nyei mienh jiu-tong. Weic naaiv mbuo cingx hiuv duqv gorngv mbuo mouz laanh ganh mouz laanh nyei lengc yiem Tin-dorngh.

Baulo gorngv taux nqa'haav Yesu daaih nyei hnoi, daic mingh nyei mienh nangh ndangc, liuz *"nqa'haav mbuo corc ziangh jienv nyei mienh caux nangh daaih wuov deix ziouc faaux mingh yiem mbuonx gu'nyuoz buangh Ziouv yiem wuov ndaamv-lungh. Hnangv naaic, mbuo duqv yietc liuz caux Ziouv yiem"* (1 Te^saa^lo^ni^gaa 4:17).

Baulo fiev mingh orn taux ziangh jienv nyei mienh, weic zuqc ninh mbuo laaic duqv daic mingh nyei mienh piatv Yesu daaih dorh ninh mbuo nyei hnoi mi'aqv. Yiem 1 Te^saa^lo^ni^gaa 4:18 Baulo gorngv, *"Weic naaiv oix zuqc longc naaiv deix waac laanh orn laanh nyei hnyouv."* Mbuo haih laanh orn laanh nyei hnyouv weic zuqc mbuo maaiah hnoi aengx duqv buangh yiem wuov Tin-dorngh. Se gorngv mbuo maiv zieqv duqv doic mbuo fungc haih maaiah laamh hnamv? Baulo gorngv nyei se mbuo aengx duqv juangc dorngx yiem wuov Tin-dorngh...aengx borqv jienv hnangv mbuo hiuv duqv doic yiem naaiv baamh gen nor.

Mbuo maiv dan duqv caux mbuo nyei hmuangv doic yiem wuov Tin-dorngh hnangv, mv baac duqv caux yietc zungv sienx Yesu nyei mienh yiem wuov - maiv gunv haaix doic mienh, haaix fingx mienh. Naaiv za'gengh benx yietc norm hlo haic nyei dorngx dongh baamh mienh hnamv maiv zaic. Ih zanc guai jiex nyei baamh mienh zungv hnamv maiv zaic mbuo yiem nyei lungh ndiev. Mbuo buac ninh mbuo bun cie ndaix mingh zaah mbuo yiem nyei lungh qiex zungv zaah maiv mengh baeqc. Mbuo yiem nyei dorngx se yietc norm hleix, fai "galaxy", nyei dorngx hnangv. Lungh ndiev se maaiah ziex billion norm hleix/"galaxy".

Maiv dungx nzauh gorngv taux Tin-dorng mingh nor maiv hiuv duqv hnavg haaix nor. Yiem wuov se benx cing-nzengc dunh yunh nyei dorngx dongh mbuo yietc liuz duqv caux mbuo nyei Ziouv yiem nyei dorngx. Hnavg mbuo baaux nyei nzung "Duqv caux Ziouv yiem" yaac duqv caux sienx Ziouv nyei mienh yietc liuz yiem wuov.

Weic naaiv Singx Nzung sou gorngv, "*Ziux Ziouv mangc, ninh nyei cing-nzengc baeqc fingx daic se weih jaaix*" (Singx Nzung 116:15).

Ziepc Faam Joux Waac Naaic:

Yiem Tin-Dorng nyei mienh hiuv duqv baamh gen nyei sic nyei fai?

Ging-sou: 2 Ko^{lin}to 5:1-3; Hipv^{lu} 11

Ging-sou maiv gorngv taux daic mingh hiuv duqv baamh gen nyei sic. Ging-sou yiem 2 Ko^{lin}to 5:1-3 gorngv: "*Mbuo hiuv duqv mbuo yiem jienv naaiv norm baamh gen nyei ndopv-liuh, dongh mbuo nyei sin, zuqc caeqv wuov zanc, yiem wuov tin-dorng Tin-Hungh oix bun norm maiv zeiz mienh nyei buoz zoux daaih nyei biau v mbuo yiem, se yietc liuz nyei biau v. Ih zanc mbuo yiem jienv naaiv norm sin njunh jienv yiem, aqc duqv zuov maiv taux duqv yiem tin-dorng nyei biau v. Yiem jienv tin-dorng nyei biau v se hnavg zuqv jienv lui-houx nor, ziouc maiv zuqc laengh gaengv yiem.*" Se gorngv mbuo duqv bungx nqoi yiem naaiv norm sin fai ndopv-liuh, duqv mingh Tin-dorng wuov zanc duqv siang biau v yiem. Weic mbuo duqv bungx nqoi yiem haih daic nyei sin mingh taux maiv haih daic nyei sin. Yiem 2 Ko^{lin}to 5:8 "*Mbuo bungx dingc hnyouv yaac gauh oix leih naaiv norm sin mingh caux Ziouv yiem.*"

Lugaa 16 zang gorngv taux butv zoih mienh tov Apv^{laa}ham nzuonx mingh mbuox ninh nyei hmuangv doic taux deic nyoqc. Ninh tov nyei se weic ninh jangx zuqc taux ninh ziangh seix nyei ziangh hoc nyei sic. Maiv zeiz daic liuz hiuv ih zanc nyei sic fai ziangh jienv mienh zoux nyei sic.

Maaiah mienh bieqc hnyouv **dorngc** taux Hipv^{lu} 12:1 "*Hnavg naaic, mbuo maaiah zorn-gzengx mienh ndongc naaic camv weih jienv mbuo, mbuo ziouc oix zuqc guangc yietc zungv torngv jauv nyei ga'naaiv yaac guangc aah loc nyau jienv mbuo nyei zuiz. Yaac oix zuqc longc noic diev jienv tiux, hungx jienv mingh taux dingc daaih nyei dorngx.*" Maaiah deix mienh njaaux gorngv daic mingh nyei mienh yiem Tin-dorng mangc buatc baamh gen nyei mienh zoux nyei sic yaac tengx jienv ninh mbuo. Naaic se maiv zeiz Ging-sou nyei eix-leiz.

Naaiv deix zorn-gzengx, yiem Hipv^{lu} 12:1 nyei mienh, se maiv zeiz mbuo nyei muoz doic cien ceqv dongh daic mingh nyei mienh, mv baac *dongh zinh ndangc sienx longx Tin-Hungh nyei mienh*. Yiem Hipv^{lu} 11 zang wuov deix mienh dongh ninh mbuo ziangh nyei maengc bun cing mbuo buatc gorngv ninh mbuo sienx Tin-Hungh yaac bungx hnyouv Tin-Hungh nyei mienh. Naaiv deix gorx youz zoux zorn-gzengx gorngv mbuox mbuo taux bungx hnyouv Ziouv, sienx Ziouv nyei jaax-zinh maiv gunv buangh zuqc haaix nyungc. Ninh mbuo zoux zorn-gzengx, zoux nyungc zeiv. Ninh mbuo zoux zorn-gzengx bun mbuo zuotc, maiv zeiz longc m'zing mange

jienv mbuo. Mbuo maaiah laamh hnamv weic ninh mbuo nyei sienx fim ninh mbuo duqv buac Yesu. Maaiah hnoi mbuo yaac duqv buac Yesu, yietc liuz maiv zuqc leih.

Ziepc Feix Joux Waac Naaic:

Tin-Hungh maaiah nyungc-nyungc, zoux haaix nyungc oix yie fongc-horqc?

Ging-sou: Levi 27:30-33; Nzamc leiz latc 14:22-29; cuotvⁱyipv 25:2; 1 Zunh doic douh 29:9

Dau nyei waac: Yiem Ging-sou gorngv taux i nyungc: a) bun=giving [bun hungh jaa - naaiv nyungc bun se *aapv* fai ei *leiz* bun=complutory]; b) bun Tin-Hungh [se fongc-horqc fai ginv bun-voluntary].

Naaiv deix i nyungc bun, fai "giving", se zoux bun mienh bieqc hnyouv dorngc camv. Maaiah mienh bieqc hnyouv dorngc taux Loz Ngaengc Waac nyei "yietc gouv ziepc gouv". Naaic se maiv zeiz yiem hnyouv fongc horqc nyei, mv baac bun deic bung nyei hungh jaa weic tengx I^{saa}^^{laa}^^{en} deic bung yiem wuov norm ziangh hoc. Weic zuqc I^{saa}^^{laa}^^{en} fingx se Tin-Hungh nyei mienh (weic ninh mbuo benx "bun Tin-Hungh gunv nyei baeqc fingx", fai "theocracy").

Lewi mienh zoux nyei sic se hhangv ih jaax nyei hungh jaa nor. Weic naaiv, Lewi nyei fongc horqv yiem Lewi 27:30-33 “*Yiem ndau cuotv nyei yietc zungv ga'naaiv, liemh laangh ziqc liemh ndiangx nyei biouv, ziepc gouv nyei yietc gouv benx Ziouv nyei mi'aqv. Se gorngv haaix dauh oix zuoqc haaix deix ninh nyei ziepc gouv nyei yietc gouv, oix zuqc bun buonv-zinh aengx jaa tipv biao gouv nyei yietc gouv. Da'faanh ngongh guanh, ba'gi yungh fai yungh guanh, ziepc gouv nyei yietc gouv, se ziepc dauh nyei yietc dauh ziouc cing-nzengc weic fungx bun Ziouv. Maiv dungx ginv cuotv benx fai maiv benx yaac maiv dungx tiuv. Se gorngv ninh gengh oix tiuv nor, liemh dorh daaih wuov dauh caux oix tiuv wuov dauh se cing-nzengc mi'aqv. Maiv haih zuoqc aqv.*” Lewi mienh zoux nyei gong se hungh jaa goux deic bung mienh nyei gong. Naaiv m'daaih fih hhangv ih jaax zoux gong mienh bun nyei “income tax”.

Yiem Nzamc Leiz Latc 14:22-29 “*Meih mbuo nyei liangx-ndeic hnyangx-hnyangx siou daaih nyei gaeng-zuangx oix zuqc fongc horc ziepc gouv nyei yietc gouv. Oix zuqc dorh meih mbuo nyei laangh ziqc, siang-a'ngunc diuv, ga'lanv youh ziepc gouv nyei yietc gouv caux meih mbuo nyei ngongh guanh yungh guanh nyei daauh toi dorn mingh yiem Ziouv, meih mbuo nyei Tin-Hungh, nyei nza'hmien nyanc. Se yiem ninh oix ginv daaih liepc ninh ganh nyei Mengh wuov norm dorngx weic bun meih mbuo hoqc linc zanc-zanc taaih Ziouv, meih mbuo nyei Tin-Hungh. Se gorngv wuov norm dorngx leih duqv meih mbuo go, ziouc dorh maiv duqv Ziouv, meih mbuo nyei Tin-Hungh, ceix fuqv bun meih mbuo ziepc gouv nyei yietc gouv, (weic zuqc Ziouv, meih mbuo nyei Tin-Hungh, oix ginv liepc ninh nyei Mengh wuov norm dorngx leih meih mbuo go haic,) oix zuqc zorqv meih mbuo ziepc gouv nyei yietc gouv maaic benx nyaanh, ziouc dorh jienv mingh Ziouv, meih mbuo nyei Tin-Hungh, oix ginv wuov norm dorngx. Haiz oix nyanc haaix nyungc, gunv longc naaiv deix nyaanh maaiz. Maaiz ngongh, ba'gi yungh, a'ngunc diuv fai haaix nyungc diuv fai oix longc haaix nyungc yaac duqv. Hhangv naaic meih mbuo caux meih mbuo nyei biauv zong mienh yiem Ziouv, meih mbuo nyei Tin-Hungh nyei nza'hmien, njien-youh nyei*

nyanc. Yaac maiv dungx la'kuqv yiem meih mbuo nyei zingh gu'nyuoz nyei Lewi Mienh weic zuqc ninh mbuo maiv duqv caux meih mbuo bun nqoi nyei buonc yaac maiv maaih ninh mbuo ganh nzipc nyei buonc. Mouz nzunc buangv buo hnyangx wuov hnyangx siou daaih nyei gaeng-zuangx ziepc gouv nyei yietc gouv oix zuqc dorh daaih siou jienv meih mbuo nyei mungv gu'nyuoz, weic bun yiem meih mbuo nyei mungv nyei Lewi Mienh, (weic zuqc ninh mbuo maiv duqv caux meih mbuo bun nqoi nyei buonc, yaac maiv maaih ninh mbuo ganh nzipc nyei buonc,) caux yiem meih mbuo nyei mungv gu'nyuoz nyei ganh fingx mienh caux guh hanh fu'jueiv caux auv-guaav duqv nyanc beuv. Hnangv naaiv zoux, Ziouv, meih mbuo nyei Tin-Hungh, ziouc ceix fuqv meih mbuo nyei buoz zoux nyei nyungc-nyungc gong." Ninh mbuo yaac maaih siou nzou-zinh (Lewi 19:9-10; Cuotv^i^yipv 23:10-11). Yietc zungv gapv zunv daaih nor, I^saa^laa^en mienh maiv zeiz bun ziepc gouv nyei yietc gouv, mv baac bun jiex ndangc nyic ziepc gouv. Naaiv deix bun nyei nyaanh weic longc bun deic bung zangv I^saa^laa^en deic bung.

Cuotv liuz oix zuqc bun weic tengx hung hjaa nyei, yietc zungv bun nyei oix zuqc yiem hnyouv **nqoi hnyouv nqoi eix fongc horqc** (purely voluntary). Ging-sou yiem Cuotv^i^yipv 25:2; 1 Zunh Doic Douh 29:9, mouz laanh mienh fongc horqc ei ganh nyei hnyouv, yiem hnyouv fongc horqc maiv maaih gorngv oix zuqc bun mba'ziex fai mbouqc naaiv cingx gaux.

Yiem Siang Ngaengc waac nyei sienx Yesu mienh, *Ging-sou maiv gorngv* taux ziepc gouv nyei yietc gouv nyei jauv. Yiem Matv^tai 22:15-22 caux Lomaa 13:1-7 gorngv taux fongc horqc bun jiu-baang, yaac mbuox mbuo oix zuqc siou nzou bun hung hjaa jien fouv. Yiem Meiv guoqv nyei mienh zuqc siou 20-30 gouv nyei yietc baeqv gouv nyei nzou-zinh.

Hnangv haaix nor fongc-horqc bun Tin-Hungh caux zoux Tin-Hungh nyei gong? Mangle yiem 2 Ko^lin^to 9:6-8: "*Jangx jienv oc. Haaix dauh zuangx zoqc ziouc siou duqv zoqc. Haaix dauh zuangx camv ziouc siou duqv camv. Mouz dauh oix zuqc bun ziux ganh nyei hnyouv dingc oix bun nyei. Bun yaac oix zuqc buangv hnyouv, maiv dungx korv-fiqv, weic zuqc Tin-Hungh hnamv nyei se nqoi eix bun nyei mienh. Tin-Hungh haih ceix nyungc-nyungc en camv-camv nyei bun meih mbuo. Meih mbuo ziouc zanc-zanc maaih gaux, zungv maaih camv weic zoux nyungc-nyungc kuv sic.*" Naaiv nyungc fongc-horqc se buangv hnyouv buangv eix nyei bun. Naaiv nyungc bun ziouc haih bun meih ganh duqv fuqv. Lugaa 6:38 gorngv, "*Meih mbuo bun haaix nyungc mienh, Tin-Hungh yaac oix winh bun meih mbuo, zungv oix dox bun meih mbuo gauh camv, zatv yuonh, nqamv zietc, hlaau ningx taux yiem maiv jienv. Meih mbuo longc haaix nyungc hlaau bun mienh, Tin-Hungh yaac oix longc wuov nyungc hlaau bun meih mbuo.*"

Tin-Hungh bun mbuo fai winh bun mbuo nyei maiv zeiz nzunc-nzunc benx zinh nyaanh nyei jauv fai ga'naaiv longc, mv baac Ninh winh nyei se gauh maaih jaax-zinh mbuo bun nyei. Fongc horqc bun se maiv zeiz gorngv mbuo zoux nyei mv baac fongc-horqc se mbuo nyei maengc (Giving is not something *we do*, but something *we are*). Janx nyei waac gorngv "Giving is a way of life for Christians who understand the grace of God." Fongc horqc, fai bun, se benx sienx Yesu mienh nyei maengc weic ninh gorngv ninh mbuo zieqv duqv Tin-Hungh nyei en.

Baamh gen mienh maiv haih bieqc hnyouv Cong-mengh waac 11:24 "*Maaih laanh mienh zoux hnyouv jangv yaac gunv zoux gunv butv zoih. Maaih laanh zoux hnyouv hepc, horpc zuqc bun nyei ninh maiv bun, mv baac gunv zoux gunv jomc.*" Weic zieqv duqv Tin-Hungh nyei en fongc

horqc nyei mienh, mbuo nyei mouz deic fai mauv se maiv zeiz mbuo bun oix duqv nzuonx nyei, mv baac weic mbuo duqv zipv Ziouv nyei fuqv camv haic mbuo cingx bun nzuonx Ninh.

Se gorngv mbuo bun weic oix duqv nor mbuo oix zuqc faix fim nyei weic 2 Ko[^]lin[^]to 9:6 *"Jangx jienv oc. Haaix dauh zuangx zoqc ziouc siou duqv zoqc. Haaix dauh zuangx camv ziouc siou duqv camv."* Maiv zuqc fan naaiv nyungc eix-leiz camv weic zuqc mbuo hnoi-hnoi buatc mengh naaiv nyungc eix-leiz cuotv daaih. Zoux ndeic nyei mienh zuangx nyim camv ziouc maaih qiangx siou duqv gauh camv. Zorqv nyaanh aan nyaanh laamz fai zoux sa'eix gauh camv ziouc maaih qiangx duqv gauh camv. Se gorngv mbuo njiec buonv gauh camv yiem Ziouv nyei gong mbuo ziouc duqv siou gauh camv.

Hnangv Fi[^]lipv[^]poi 4:10-20 gorngv nor: *"Ziouv bun yie za'gengh orn-lorqc haic weic zuqc nqaeqv lauh deix mv baac ih zanc meih mbuo aengx jangx taux yie. Yie maiv zeiz gorngv meih mbuo maiv jangx, se meih mbuo maaih qangx bun yie hiuv hnangv. Yie yaac maiv zeiz hnangv naaiv nor gorngv weic zuqc yie qiex zuqc haaix nyungc. Yie hoqc liuz ziouc hiuv duqv maiv gunv maaih camv fai zoqc yie buangv hnyouv aqv. Yie hiuv duqv buangv dangx-douh nyei ziangh hoc, yaac hiuv duqv buangv maaih mbienc nyei ziangh hoc. Yie hoqc liuz ziouc hiuv duqv haaix zanc, yiem haaix ndau, duqv nyanc beuv fai hnyouv sie jienv yiem, maaih zengc fai maiv gaux longc, yie buangv hnyouv aqv. Giduc bun yie maaih qaqv, nyungc-nyungc yie ziouc zoux duqv aqv. Mv baac yie maaih kuonx naanh nyei ziangh hoc meih mbuo tengx yie, naaiv se longx haic aqv. Meih mbuo Fi[^]lipv[^]poi Mienh hiuv duqv yie jiez gorn zunh kuv fienx, cuotv Maa[^]si[^]ndo[^]nie wuov zanc maiv maaih ganh norm jiu-baang fungx yie longc bieqc longc cuotv nyei nyaanh, kungx meih mbuo ganh nyei hnangv. Yie yiem Te[^]saa[^]lo[^]ni[^]gaa wuov zanc yie qiex zuqc nyei meih mbuo juix daaih maiv zeiv yietc nzunc. Yie yaac maiv zeiz kungx oix zipv meih mbuo nyei zingh nyeic. Yie oix meih mbuo nyei zaeqv-daan duqv leic zinh camv jienv faaux. Meih mbuo fungx daaih nyei ga'naaiv yie duqv zipv nzoih mi'aqv, zungv gauh camv. E[^]baa[^]fo[^]ndi[^]tatv dorh meih mbuo juix nyei zingh nyeic taux, yie qiex longc nyei ziouc gaux nzengc aqv. Meih mbuo nyei ga'naaiv se hnangv ziec nyei ga'naaiv nor, Tin-Hungh haiz ndaang nyei ziouc a'hneiv zipv. Yie nyei Tin-Hungh maaih nzoih nyungc-nyungc. Meih mbuo qiex zuqc nyei yietc zungv, zoux ninh maaih nyei ninh ziouc longc Giduc Yesu ceix bun meih mbuo. Mbuo oix zuqc yietc liuz ceng mbuo nyei Zaangc Diex Tin-Hungh taux maanc gouv maanc doic."*
Amen.

Haaix zanc mbuo la'kuqv naaiv diuh lingc caux leiz (principle), mbuo oix zuqc jangx jienv Tin-Hungh siev jienv jaaix jiex nyei zingh nyeic bun mbuo - Ninh nyei ndoqc Dorn Yesu. Hnangv Lomaa 8:32 *"Tin-Hungh liemh maiv nzaeng ninh ganh nyei Dorn, zungv bun ninh weic mbuo zuangx mienh siev maengc. Hnangv naaic, ninh zorqv ninh nyei Dorn ceix bun mbuo, ninh maiv zeiz oix zorqv maanc muotc baeqc baeqc ceix bun mbuo fai?"* Tin-Hungh nyei fiem-fingx caux ninh nyei juoqc setv se "Bun=Giver". Se gorngv mbuo sienx ninh nyei mienh oix zuqc zuangv oix zuqc zuotc Tin-Hungh nyei nyungc zoux.

Sienx Yesu nyei mienh fongc-horqc nyei mouz deic se jienv - meih zoux haaix nyungc bun Tin-Hungh? Mbuo nyei mouz deic fai "motive" se weic zuqc mbuo maaih hnyouv oix zoux bun Ziouv a'hneiv. Mbuo maiv horpc zuqc zoux "maiv a'hneiv maiv buangv hnyouv nyei fongc horqc" wuov nyungc mienh. Oix zuqc benx "a'hneiv buangv hnyouv buangv eix nyei fongc-horqc" wuov nyungc mienh. Maiv zeiz gorngv mbuo maaih camv cingx a'hneiv fongc horqc mv

baac weic zuqc mbuo zieqv duqv Ziouv nyei en-zingh se longx haic. Janx Gikc waac gorngv "jatv jienv bun/fongc-horqc". Se gorngv mbuo maiv hnavg naaic mbuo oix zuqc zaah ganh nyei hnyouv, tov Ziouv tengx, bun mbuo haih zieqv duqv ninh nyei en. Maiv dungx bun fai fongc horqc weic leiz, fai zuqc aapv, fai zuotc mienh. Tin-Hungh a'hneiv nyei fai ceix fuqv nyei se weic zuqc mbuo nyei hnyouv mouz deic se zuqc, horpc ninh nyei za'eix. Tin-Hungh maiv dan ceix fuqv bun fongc-horqc nyei mienh yaac ceix fuqv fongc-horqc nyei ga'naaiv, weic fongc horqc nyei mienh benx fuqv bun taux mienh.

Mbuo fongc horqc nyei mienh siou nyei yietc nyungc maiv hnavg zoux liangx ndeic nyei mienh se hnavg naaiv. Zoux liangx ndeic nyei mienh oix zuqc zuov jienv gaeng-zuangx siou, mv baac sienx Yesu nyei mienh liemh zeih duqv siou mbuo zuangx nyei. Mbuo ih zanc duqv siou, mbuo nqa'haav hingv yiem Tin-dorngh yaac duqv siou. Maiv zeiz gorngv mbuo fongc horqc liuz Tin-Hungh, ziouc duqv Tin-Hungh ceix naaiv ceix wuov bun mbuo, mv baac Tin-Hungh zungv liuc leiz mbuo qiemx zuqc nyei.

- **Fongc horqc se biux mengh gorngv mbuo bangc Tin-Hungh ganh hnavg, bangc ninh gorngv nyei waac - Ging-sou.**
- **Fongc horqc se biux mengh gorngv Yesu zoux da'yietv yiem mbuo nyei maengc.**
- **Fongc horqc se biux mengh gorngv Tin-Hungh se jaaix caux jienv yiem mbuo nyei maengc.**
- **Fongc horqc se zieqv duqv gorngv nyungc-nyungc se Tin-Hungh nyei, mbuo duqv siou nyei se weic Tin-Hungh nyei en.**

Ziepc Hmz Joux Waac Naaic:

Mbuo hnavg haaix nor hiuv duqv haaix nyungc Singx Lingh zoux nyei gong haaix nyungc jaav (mienv) nyei?

Ging-sou: 1 Yo[^]han 4

Mbuo haih buatc baa nyungc cing nyei gorngv Singx Lingh zoux nyei gong. Zien Singx Lingh zoux nyei gong se:

- A. Taaih Yesu Giduc
- B. Doix-dekc Mienv Nyei Hungh
- C. Dorh mienh gan longx Ging-sou
- D. Bouh zien leiz taaih caux ceng zien leiz
- E. Bun mienh haih hnamv Tin-Hungh caux Mienh.

1. Taaih Yesu Giduc

- a. *"Yie hnamv nyei gorx-youz aah! Mienh gorngv ninh mbuo maaih Singx Lingh, mv baac meih mbuo maiv dungx la'guaih sienx. Oix zuqc seix mangc gaax, ninh mbuo maaih nyei se yiem Tin-Hungh daaih zeiz fai maiv zeiz, weic zuqc maaih jaav douc waac mienh camv haic cuotv mingh youh lungh ndiev. Naaiv haih bun meih mbuo zieqv duqv se Tin-Hungh nyei Singx Lingh. Haaix dauh nyiemc Yesu*

- Giduc njiec daaih benx dauh baamh mienh, wuov dauh maaih yiem Tin-Hungh daaih nyei Singx Lingh. Mv baac haaix dauh maiv nyiemc Yesu, wuov dauh maiv maaih yiem Tin-Hungh daaih nyei Singx Lingh. Ninh maaih nyei se dongh yiem Giduc nyei win-wangv daaih nyei mienv. Meih mbuo haiz gorngv wuov dauh win-wangv oix daaih, ninh zungv daaih yiem jienv baamh gen aqv" (1 Yo^han 4:1-3).*
- b. Singx Lingh zoux nyei gong se bun cing mienh zieqv duqv Yesu Giduc, doz benx baamh mienh, cuotv seix yiem maiv gaengh hiuv jiex m'jangc nyei m'sieqv dorn, zuqc ding yiem ziepc nzangc jaax daic, da'faam hnoi nangh daaih. Ninh se zoux Singx Dorn, dongh njoux zuiz-mienh wuov dauh.
 - c. Singx Lingh zoux nyei gong se bun mienh hiuv Yesu Giduc, mingh lorz Yesu Giduc. Doz benx dauh baamh mienh, buangv nzengc baamh mienh yaac buangv nzengc doz, Yesu se Singx Dorn, ninh daaih njoux zuiz-mienh. Kungx Yesu ganh hngangv haih njoux zuiz mienh. Gong-zoh mbuo gorngv nyei se mengh nyei - Singx Lingh zoux zorngh zengx weic Yesu. Zien Singx Lingh zoux zorngh zengx gorngv taux Yesu.
 - d. Mienv nyei hungh Saadaan nzorngh haic Tin-Hungh Singx Dorn, lengc jeiv weic Yesu Giduc daaih njoux zuiz mienh. Mienv nyei hungh nzorngh taux njoux en nyei kuv fiensex. Singx Lingh, dongh bun mienh nyei hnyouv zieqv duqv Yesu Giduc, caux Saadaan zanc-zanc doix-dekc weic ninh maiv oix mienh duqv njoux. Ninh mbuo se benx win-wangv.

2. Doix-deck Mienv nyei hungh zoux nyei sic.

- a. *"Fu'jueiv aah! Meih mbuo zoux Tin-Hungh nyei mienh yaac hingh jiex wuov deix zunh jaav leiz nyei mienh mi'aqv. Weic zuqc yiem meih mbuo nyei hnyouv wuov dauh se gauh henv jiex yiem baamh gen wuov dauh. Wuov deix zunh jaav leiz nyei mienh guei baamh gen. Weic naaiv ninh mbuo kungx gorngv baamh gen nyei jauv-louc hngangv. Baamh mienh yaac muangx ninh mbuo" (1 Yo^han 4:4-5).*
- b. Singx Lingh zoux nyei gong se doix-dekc taux Mienv nyei hungh zoux nyei. Singx Lingh zoux nyei gong doix-dekc taux zuiz, doix-dekc taux baamh gen nyei jauv. Naaiv se bun mbuo haih hiuv duqv zien Singx Lingh zoux nyei gong caux jaav nyei.
- c. Mbuo buatc duqv cing yiem Gong-zoh mbuo (*dongh zien Singx Lingh dorh nyei mienh*) caux jaav nyei daaih beiv mangc: Tin-Hungh bun nyei Singx Lingh, ziouc hingh jiex baamh gen nyei jauv. Baamh gen wuov dauh mienv se jaav leiz nyei guei baamh gen, yaac kungx gorngv baamh gen nyei jauv louc hngangv.
- d. Gong-zoh, fai Yo^han, gorngv nyei eix-leiz se "baamh gen wuov dauh" mienv nyei hungh. Yiem 1 Yo^han 2:15-16 "Maiv dungx hnamv baamh gen fai hnamv baamh gen nyei ga'naaiv. Haaix dauh *hnamv baamh gen*, wuov dauh maiv maaih hnyouv *hnamv Zaangc Diex*. Weic zuqc yietc zungv yiem baamh gen nyei ga'naaiv se baamh mienh hanc nyei, m'zing buatc ziouc mueic jieqv nyei, caux mienh ceng-hlo, zoux maux nyei sic. Naaiv deix yietc zungv se yiem baamh gen cuotv daaih nyei, maiv zeiz yiem *Zaangc Diex daaih*". Naaiv joux waac "baamh gen" se mienh haih hnamv nyei, hnamv baamh gen nyei mienh naaiv nyungc maiv zeiz yiem Zangc Diex daaih. ("Baamh gen" wuov joux waac maaih eix-leiz gorngv taux zuiz dongh baamh mienh hanc nyei, mueic jieqv nyei.)

- e. Mienv caux jaav nyei maiv oix baamh mienh zieqv duqv ninh mbuo zoux nyei se zuiz. Jaav nyei maiv oix bun kuv fiex nyei njang ziux hmuangx nyei dorngx. Mienv maiv oix mienh guangc ninh mbuo zoux nyei zuiz, maiv oix mienh faix fim simv nqoi waaic nyei sic.
- f. Zien Singx Lingh dorh nyei mienh se maiv zeiz hungheic heic zuqc nduov duqv, fai zuqc mienh hungheic nyei nduov duqv. Mienv maiv haih zunc mienv cuotv (Matv^{tai} 12:25-26).

3. Dorh mienh gan longx Ging-sou

- a. *"Mbuo benx Tin-Hungheic nyei mienh. Haaix dauh hiuv duqv Tin-Hungheic, wuov dauh ziouc muangx mbuo. Haaix dauh maiv benx Tin-Hungheic nyei mienh, ninh yaac maiv muangx mbuo. Hnangv naaic, mbuo ziouc haih samx duqv cuotv gorngv zien leiz nyei Singx Lingh caux gorngv jaav leiz nyei mienv"* (1 Yo^{han} 4:6).
- b. Singx Lingh dorh mienh caux zoux bun mienh jorm hnyouv taux Ging-sou nyei waac, maaih hnyouv doqc, hoqc, caux ei Ging-sou nyei waac.
- c. Mienv fai jaav nyei se maiv oix baamh mienh doqc, hoqc, fai hiuv Ziouv nyei waac. Haih nduov duqv baamh mienh weic ninh mbuo maiv hiuv zien leiz. Mienv nyei hungheic yiem gorn nzorng Tin-Hungheic nyei waac (Ging-sou). Mienv nzorng taux Ging-sou nyei waac, weic zuqc Ging-sou gorngv taux ninh zoux nyei caux ninh zuqc yiem yietc liuz nyei dorngx. Weic naaiv ninh yaac maiv oix sienx Yesu nyei mienh doqc.

4. Bouh zien leiz fai taaih zien leiz

- a. *"Mbuo ziouc haih samx duqv cuotv gorngv zien leiz nyei Singx Lingh caux gorngv jaav leiz nyei mienv"* (1 Yo^{han} 4:6). Mbuo haih mangc duqv cuotv gorngv Singx Lingh dorh se weic zuqc dorh zoux haaix nyungc, dorh mienh ei zien leiz fai?
- b. Se gorngv Singx Lingh zoux gong nor, kuv fiex (fai zien leiz) duqv bouh faaux fai duqv mienh taaih. Singx Lingh zoux nyei gong bun mienh nzorng zuiz, weic Tin-Hungheic se cing-nzengc. Baamh mienh jix gorn zieqv duqv ninh mbuo oix zuqc maaih hnoi yiem Ziouv nyei nza'hmien gorngv mengh ninh mbuo zoux nyei ziouc jix gorn zoux kuv sic.
- c. Jaav nyei, fai Mienv nyei hungheic, maiv oix bun mienh hiuv zien leiz, kungx gorngv baengc nduov mienh yiem hmuangx nyei dorngx. Mienv nyei hungheic maaih lingc maaih qaqv gunv hmuangx nyei dorngx, se gorngv Singx Lingh maiv dorh maiv zoux gong ziouc zuqc nduov. Se gorngv Singx Lingh dorh mbuo bun mbuo hiuv zien leiz mbuo ziouc maaih hnyouv dorh ziec Ninh, weic zuqc naaiv za'gengh longx haih nyei en.

5. Bun mbuo haih hnamv Tin-Hungheic yaac hnamv Mienh.

- a. *"Haaix dauh maiv hnamv mienh, wuov dauh maiv hiuv duqv Tin-Hungheic, weic zuqc Tin-Hungheic zoux hnamv mienh nyei gorn"* (1 Yo^{han} 4:8).
- b. Se gorngv Singx Lingh zien zoux gong yiem mienh nyei maengc ziouc bun mienh haih hnamv Tin-Hungheic yaac hnamv mienh. Mbuo haih hiuv cing yaac hiuv dingc

- Singx Lingh zoux nyei gong. Naaiv deix biao nyungc mbiuv bun cing mbuo buac gornv Zien Singx Lingh zoux nyei gong se hnavg haaix nor.
- c. Yo^han longc ziangh hoc gornv taux nqa'haav naaiv nyungc mbiuv gauh lauh. Se gornv Singx Lingh zoux gong yiem mbuo nyei maengc mbuo ziouc hnamv Tin-Hungh yaac hnamv mienh, zieqv duqv Yesu Giduc za'gengh longx haic.
 - d. *"Mbuo hnamv Tin-Hungh yaac hnamv mienh weic zuqc Tin-Hungh hnamv mbuo ndaangc"* (1 Yo^han 4:19). Singx Lingh zoux bun mbuo nyei hnyouv caux lingh wuonh ngorc Ziouv, ngorc caux Ninh jiu-tong, ngorc hiuv duqv Ninh, ngorc zuangv Ninh, ngorc taaih Ninh, ngorc bun Ziouv gunv mbuo.
 - e. Singx Lingh ziangh nyei biouv yiem maengc: *"Mv baac Singx Lingh bun nyei se, [Gic waac gornv 'Singx Lingh ziangh nyei biouv se...'] bun mienh maaih hnyouv hnamv mienh, bun mienh maaih njien-youh, maaih baengh orn, maaih noic, maaih hnyouv korv-lienh mienh, zoux longx nyei sic, maaih ziepc zuoqv nyei hnyouv,²³ zoux hnyouv suonc, haih gunv duqv ganh. Naaiv deix yietc zungv javv leiz-latc maiv haangh"* (Gaa^laa^tie 5:22-23).
 - f. Sieng Tin-Hungh mienh nyei hnamv se bun cing mbuo haih hiuv duqv zien fai javv, Singx-Lingh fai Mienv zoux nyei gong. Mbuo hnamv weic mbuo zieqv duqv Tin-Hungh nyei en, zieqv duqv Tin-Hungh nyei hnamv, zieqv duqv ganh se maiv puix zipv. *"Tin-Hungh hnavg naaiv nor bun mbuo hiuv duqv ninh hnamv mienh. Ninh paaiv ninh nyei ndoqc Dorn njiec baamh gen, weic bun mbuo haih kaux ninh nyei Dorn duqv ziangh jienv.¹⁰ Hnamv nyei javv se hnavg naaiv. Maiv zeiz mbuo hnamv Tin-Hungh. Tin-Hungh hnamv mbuo ziouc paaiv ninh nyei Dorn daaih fiqv mbuo nyei zuiz. Hnamv nyei gorx-youz aah! Tin-Hungh ndongc naaic hnamv mbuo, mbuo horpc zuqc laanh hnamv laanh"* (1 Yo^han 4: 9-11, 19).

Nzutc Norz Waac:

1. Naaiv deix biao nyungc mbiuv bun cing mbuo hiuv duqv zien Singx Lingh zoux gong fai Mienv nyei hungh nduov.
2. Oix zuqc jangx jienv hnavg Baulo gornv yiem 2 Ko^lin^to 11:13-14 *"Wuov deix mienh zoux javv gong-zoh, ninh mbuo zoux nyei gong kungx nduov mienh hnavg. Ninh mbuo yaac goiv nyungc zeiv zoux hnavg Giduc nyei gong-zoh nor. Mv baac naaiv maiv zeiz mbuoqc horngh nyei sic. Liemh Saadaan yaac haih goiv nyungc zeiv zoux hnavg dauh njang-laangc nyei fin-mienh."* Mv baac naaiv deix biao nyungc mbiuv bun cing mbuo haih hiuv duqv zien Singx Lingh zoux nyei gong, maiv gunv mienv haih nduov mienh. Weic naaiv oix zuqc hiuv Ziouv nyei waac, zien leiz, cingx haih hiuv duqv javv nyei!

Ziepc Luoqc Joux Waac Naaic:

Hnavg Haaix nor hingh jiex zoux guenx waaic nyei sic fai zuiz?

Ging-sou: 1 Ko^lin^to 10:13 gornv, *"Meih mbuo buangh zuqc nyungc-nyungc seix hnyouv nyei sic se baamh mienh aah loc buangh nyei sic. Mv baac Tin-Hungh kaux duqv wuonv nyei. Ninh maiv bun meih mbuo zuqc seix jiex ndaangc meih mbuo nyei qaqv. Zuqc seix wuov zanc, Tin-Hungh oix bun meih mbuo maaih javv ciex duqv cuotv ziouc maaih qaqv diev duqv hingh."*

Mienh zoux guenx waaic nyei sic weic zuqc ninh mbuo sienx nyei se dorngc. Liuz, ninh mbuo nyei fiem-fingx yaac dorngc. Maiv daan oix yienc waaic nyei sic weic zuqc mbuo nyaev, weic waaic nyei sic zuqc ndortv zinh nyanh, maiv wange siangx, fai zoux bun mbuo maiv benx yiem/"guilty". Mv baac mbuo oix yienc weic zuqc Tin-Hungh maaih mouz deic hlo, longx haic, bun mbuo nyei maengc. Kungx mbuo ganh hngangv haih zoux dongh ninh heuc mbuo, zeix mbuo daaih, zoux nyei gong. Cuotv liuz mbuo yienc mbuo sienx dorngc nyei, caux dongh bun mbuo zoux dorngc nyei, mbuo mau maiv haih hingh jiex waaic nyei sic dongh zanc-zanc morh linc mbuo, fai mbuo zoux guenx nyei sic. Mbuo haih hingh nzunc baav nyei mv baac maiv haih duqv "hingh jiex nyei maengc".

Sienx Yesu nyei mienh oix zuqc buac zoux guenx waaic nyei sic se lingh wuonh nyei baengc, fai, lingh wuonh nyei sic. **Mbuo oix zuqc zieqv duqv zuiz se zuiz.** Mbuo hiuv duqv Ziouv nyei waac caux daux gaux haih bun mbuo hingh jiex waaic nyei sic.

Mbuo mouz laanh mienh ganh oix zuqc ndaam-dorng mbuo ganh zoux nyei zuiz, liemh dongh zanc-zanc zoux guenx nyei zuiz. Maiv gunv mbuo zoux guenx waaic nyei sic, mbuo maiv haih guaix fai lorz dorngx jaev sin. Mbuo ganh oix zuqc ndamh dorng mbuo nyei zuiz. Maaih mienh zoux gor zuiz waaic gor zungv maiv heuc zuiz se zuiz aqv.

Zoux guenx nyei zuiz se maiv horpc zuqc benx hoic nyei yiem Giduc Mienh nyei maengc, weic zuqc Singx Lingh yiem jienv sienx Tin-Hungh mienh nyei hnyouv zoux gong bun mbuo gauh haih zuangv Yesu. Se gorngv Tin-Hungh tengx mbuo, maaih haaix nyungc haih noic duqv mbuo (Lomaa 8:31)? Yiem Gaa^laa^tie 5:16 gorngv "Oix zuqc bun Singx Lingh dorh meih mbuo. Maiv dungx ei ganh nyei hnyouv hanc zoux." Yiem 1 Ko^lin^to 10:13 gorngv, "Meih mbuo buangh zuqc nyungc-nyungc seix hnyouv nyei sic se baamh mienh aah loc buangh nyei sic. Mv baac Tin-Hungh kaux duqv wuonv nyei. Ninh maiv bun meih mbuo zuqc seix jiex ndaangc meih mbuo nyei qaqv. Zuqc seix wuov zanc, Tin-Hungh oix bun meih mbuo maaih javv ciex duqv cuotv ziouc maaih qaqv diev duqv hingh." Se gorngv mbuo bun Singx Lingh dorh mbuo ei Ziouv nyei waac, maiv gunv maaih haaix nyungc guenx nyei waaic sic dongh mbuo zoux jiex daaih nyei, zoux ndongc haaix lauh, mbuo haih hingh.

Mbuo hngangv haaix nor haih hingh jiex zoux guenx waaic nyei sic?

Da'yietv, jangx jienv zuiz jiex gorn yiem mbuo hnamv nyei sic. Yaagorpc 1:14-15 "Mv baac mienh zuqc nduov se laaix ganh nyei hnyouv hanc ziouc yuoqc ganh mingh baamz zuiz.¹⁵ Hnyouv hanc haaix nyungc se beiv maaih jienv sin nor. Yungz cuotv daaih benx zuiz mi'aqv. Zuiz hlo dingc, ziouc bun wuov dauh mienh zuqc daic mi'aqv." Yaagorpc dorh mienh zuqc nduov fai zoux guenx zuiz nyei mienh daaih beiv saengh kuv zuqc nduov. Hngangv mbatc mbiauz nyei mienh longc gaeng nduov mv baac diux kuangx jienv gaeng, fai zinh ndangc mbuo zaeng norqc longc koux nor. Saengh kuv kungx buac nduov nyei ga'naaiv hngangv, weic mbiauz hapv, fai weic norqc nyorqv ziouc zuqc koux hopv fai diux kuangx. Zuiz jiex gorn yiem hnyouv fai hnamv nduov mbuo. Weic naaiv Ging-sou heuc mbuo oix zuqc bun Tin-Hungh goiv yienc mbuo hnamv nyei javv (Lomaa 12:2), oix zuqc hnamv longx nyei sic (Fi^lipv^poi 4:8), oix zuqc fei fangv Ziouv nyei waac (Singx Nzung 1:2).

Da'nyeic, oix hingh jiex zoux guenx waaic nyei sic oix zuqc yienc mbuo ziangh nyei maengc, zoux nyei sic, caux nyei doic. Mbuo oix zuqc maiv dungx bun sin zangc maaih qiangx zoux zuiz. Lomaa 13:14 gorngv, "*maiv dungx ziux ganh nyei hnyouv zoux haaix nyungc zuiz.*" Se gorngv mbuo oix guangc maiv buov in-mbiatc, oix zuqc guangc maaih nyei in-mbiatc; liuz, maiv dungx maaiz aqv. Mbuo caux nyei doic oix zuqc yienc, weic naaiv cingx gorngv oix zuqc yienc ziangh nyei maengc. Oix zuqc simv nqoi qiangx dongh naaiv deix sic haih nduov mbuo aengx nzuonx mingh zoux zuiz. Simv nqoi dorngx, simv nqoi zoux naaic nyungc sic nyei mienh. Hnangv 1 Ko^{lin}to 15:33 gorngv, "*Maiv dungx bun mienh nduov. 'Kuv mienh caux mienh waaic mienh zoux doic, kuv mienh ziouc waaic mi'aqv.'*"

Da'faam, maiv dungx bingx jienv meih zanc-zanc suei fai zanc-zanc zoux guenx nyei zuiz. Lorz zien doic daaih tengx jienv orn meih nyei hnyouv nunz meih nyei hnyouv tengx jienv meih. Hnangv Gaa^{laa}tie 6:2 gorngv nor, "*Haaix dauh maaih haaix nyungc sic oix zuqc laanh tengx laanh ndaam. Hnangv naaic meih mbuo ziouc ei jienv Giduc nyei lingc zoux.*" Longc ziangh hoc daux gaux doqc Ging-sou, ziangh zingx nyei maengc bun Tin-Hungh, bun meih ganh, caux bun mienh. Yaagorpc 5:16 gorngv, "*Hnangv naaic, meih mbuo laanh oix zuqc nyiemc zuiz bun laanh, laanh oix zuqc tengx laanh daux gaux. Meih mbuo nyei baengc ziouc longx mi'aqv. Kuv mienh daux gaux, ninh daux gaux nyei waac maaih qaqv yaac lingh haic.*"

Ei Ging-sou yienc se maiv zeiz simv nqoi zuiz hnangv, mv baac hungx jienv horpc nyei jauv mingh. Ging-sou gorngv yiem E^{fe}so 4:25 "*Hnangv naaic, meih mbuo oix zuqc guangc, maiv dungx gorngv-baeqc nduov mienh. Laanh caux laanh kungx oix zuqc gorngv zien waac hnangv, weic zuqc mbuo dauh dauh benx Giduc nyei sin nyei yietc nyungc.*" Gorngv baeqc nyei mienh maiv dan zuqc guangc maiv dungx gorngv baeqc hnangv mv baac oix zuqc gorngv zien waac. Maiv dungx kungx dingh maiv zoux zuiz hnangv, oix zuqc jiex gorn zoux horpc nyei sic. Wuov nzunc hnoi meih cingx haih jiex gorn zoux longx nyei sic, zoux longx nyei sic camv faaux ziouc jiex gorn tiuv yienc meih zoux guenx waaic nyei sic. Zoux longx nyei sic camv jienv faaux, zoux waaic nyei sic ziouc zoqc jienv njiec.

Ziepc Cietv Joux Waac Naaic:

Siex Yesu nyei mienh hnangv haaix nor haih ginv taaih Ziouv!

Mbuo zuqc ginv nyei yiem maengc se maiv zeiz hungx heic. Mv baac bun taux sienx Yesu nyei mienh horpc zuqc gauh heic, weic zuqc mbuo maaih Ziouv nyei waac Ging-sou caux Singx Lingh yiem mbuo nyei hnyouv. **Mbuo ginv nyei oix zuqc hnamv taux buo nyungc:** **Da'yietc**, oix zuqc muangx Ziouv nyei waac, dongh ninh laauc yaangh yiem Ging-sou nyei waac. Se gorngv Ging-sou heuc mbuo maiv dungx zoux, naaic se Tin-Hungh nyei za'eix weic ninh hnamv mbuo ninh hiuv duqv mbuo zoux nyei hoic mbuo, mbuo oix zuqc muangx waac maiv dungx zoux.

Fih hnangv nyei se gorngv mbuo ginv nyei fai zoux nyei haih zoux bun mbuo maiv muangx Ziouv nyei waac fai haih bun mbuo leih go Ziouv nor mbuo yaac oix zuqc ginv daaih doix dangc Ziouv nyei leiz. Nyungc zeiv Tin-Hungh heuc mbuo gapv zunv buoqc zangc (Hipv^{lu} 10:25),

wuov nyungc mbuo ginv nyei hngv haaix nor haih doix-dekc Tin-Hungh mengh-mengh paav nyei waac nyei fai? Nzunc-nzunc mbuo oix zuqc ginv naaic ganh, "*Ziouv nyei waac hngv haaix nor gorngv?*" Ging-sou gorngv mengh nyei nor oix zuqc muangx ei Ging-sou (1 Yo^han 5:3). Se gorngv Ging-sou maiv mengh nor, mbuo maiv dungx ginv doix-dekc Ziouv.

Da'nyeic, Mbuo ginv duqv horpc fai zuqc weic mbuo longc Ging-sou njaaux mbuo nyei cong-mengh. Weic mbuo hoqc Ziouv nyei waac, mengh baengc Ging-sou nyei eix-leiz; liuz, ziouc ei mbuo hiuv yiem Ging-sou nyei ginv. Hngv Yaagorpc 1:5 gorngv nor, se gorngv mbuo qiemx zuqc cong-mengh oix zuqc tov. Mbuo oix zuqc naaic mienh, zaah taux, hoqc taux, hnamv tong mbuo ginv nyei hngv haaix haih tengx fai hoic. Liuz ziouc ginv dongh buatc longx jiex nyei jav (Cong-mengh 2:1-11).

Da'faam, Oix zuqc hnamv taux meih oix nyei. Se gorngv Ging-sou maiv gorngv taux, fai maiv maaih eix-leiz gorngv taux nor, meih oix zuqc mangc gaax meih ginv nyei benx cong-mengh nyei/horpc nyei ginv fai. Meih ginv nyei tov Tin-Hungh tengx jienv meih ginv daaih bun meih haih duqv longx weic bun Ziouv nyei mbuo duqv njang-laangc (Singx Nzung 37:4; Fi^lipv^poi 2:13).

Mbuo haih hngv naav nor ginv weic mbuo bun Singx Lingh gunv jienv mbuo nyei maengc, mbuo mbuoqc Singx Lingh dorh. Maiv zeiz aeqv mbuo maiv haih ginv ei jienv Ziouv nyei waac, weic zuqc zuiz torngv jienv mbuo buang jienv mbuo nyei m'zing, mbuo ziouc maiv haih ei jienv Ging-sou ginv. Zuiz torngv mienh, bun mbuo maiv haih longc duqv horpc Ziouv nyei waac. Maiv haih bieqc hnyouv Ziouv nyei waac. Se gorngv mbuo ziangh jienv Ziouv, bun Singx Lingh gunv jienv mbuo nor, mbuo ziouc haih hingh jiex sin hanc nyei, haih hiuv duqv Ziouv nyei za'eix, ziouc haih ginv duqv horpc Ziouv nyei hnyouv, ziouc bun ganh nyei maengc duqv longx. Tin-Hungh nyei mbuox ziouc haih duqv njang-laangc yiem mbuo ginv nyei.

Ziepc Bety Joux Waac Naaic

Siex caux maiv siex nyei mienh maiv dungx jiu doic nyei eix-leiz se haaix nyungc?

Naaic muonc: Maaih mienh gorngv maiv dungx jiu-doic yiem dorg jaa. Maaih deix gorngv maiv dungx jiu doic yiem sa'eix. Siex Yesu nyei caux maiv siex nyei hngv haaix nor maiv dungx jiu doic?

Ging-sou: 2 Ko^lin^to 6:14-18

Dau Nyei Waac: Naaiv se jienv nyei naaic nyei waac. Yiem 2 Ko^lin^to 6 zaang, Mienh nyei waac gorngv "jiu doic", janx nyei waac gorngv "yoke". Naaiv se saengh kuv juangc jienv ndaam nyei ndiangx-gaax. Mbuo buatc ngongh cie fai maaz cie maaih i dauh saengh kuv juangc jienv ndaam nyei fangx, *juangc jienv zoux gong*. Yiem **2 Ko^lin^to 6:14**, Baulo gorngv, "*Siex nyei mienh caux maiv siex nyei mienh maiv dungx jiu doic. Kuv sic caux waaic sic hngv haaix nor haih jiu tong? Njang caux hmuangx hngv haaix nor haih juangc yiem?*"

Gorngv nyei eix-leiz se juangc jienv diuh jauv, juangc jienv nqanx ndiangx ndaam, juangc diuh jauv laih, juangc nyungc gong zoux, juangc nyungc ga'naaiv tor fai baeng (sienx Tin-Hungh nyei mienh caux maiv sienx nyei mienh hhangv naaiv nor zoux) **ndongc haaix yaac maaih sic aqv**. Yiem naaiv buoqv dorngx nyei Ging-sou se gorngv taux simv nqoi zunh jaav leiz nyei mienh, yaac maaih eix-leiz bun taux zorpc (sienx caux maiv sienx) dorng jaa caux zoux sa'eix nyei mienh.

Naaiv se lengc jeiv nyei gorngv taux dorng jaa nyei jauv. Weic maiv maaih haaix nyungc ndongc dorng jaa nyei doix mienh oix zuqc juangc jienv ndaam fai juangc jienv jauv mingh, fai juangc nyungc zoux. Maiv gunv juangc zoux sa'eix fai juangc haaix nyungc yaac baac. Zien sic se sienx Yesu nyei mienh caux maiv sienx nyei juangc nqanx ndiangx-gaax ndaam, juangc diuh jauv mingh, juangc nyungc zoux, fai, juangc norm mouz deic hnamv ziouc maaih sic.

Dorng jaa mienh caux zoux sa'eix mienh, se gorngv maaih dauh sienx Tin-Hungh, maaih dauh maiv sienx, ndongc haaix zungv maaih ziangh hoc gin v pien Tin-Hungh nyei za'eix (compromise) nyei. Weic zuqc ninh mbuo buatc lungh ndiev (worldview) maiv fih hhangv. Maaz caux ngongh juangc nqanx ndiangx tor cie ziouc maaih sic.

Sienx nyei caux maiv sienx nyei maiv dungx jiu doic fai juangc nqanx ndiangx fai juangc ngongh cie tor. Maengc, mauv, mouz deic maiv haih fih hhangv. Yiem dorng jaa nyei jauv mingh taux zoux sa'eix nyei jauv. Zaih dangh nziouv zanc hhangv maaih sic weic maiv buatc fai maiv sienx fih hhangv, caux cih cunx ndorqc (standard) maiv fih hhangv.

Meih mbuo yiem ninh mbuo mbu'ndongx, oix zuqc cuotv daaih. Oix zuqc caux ninh mbuo bun nqoi. *"Maiv dungx muoqv maaih uix nyei ga'naaiv, yie ziouc zipv meih mbuo aqv"* (2 Ko^{lin}^to 6:17). Baulo gorngv nyei se maiv zeiz oix mbuo yiem lengc fai simv nqoi maiv sienx Yesu nyei mienh (1 Ko^{lin}^to 9:5-13), mv baac heuc mbuo maiv dungx zuotc ninh mbuo nyei nyungc, zuotc caux zipv ninh mbuo zoux orqv zoux zuiz nyei nyungc zeiv.

Ziepc Juov Joux Waac Naaic:

Jiu-Bang oix zuqc ei Mienh fai Ziouv? Mbuo zoux nyei sic ei haaix dauh?

Horpc zuqc hungh heic gor dau: **Ei Ziouv!** Mv baac ih jaax jiu-baang camv nyei sienx gorngv se gorngv oix maiv sienx nyei mienh daaih sienx Yesu, mbuo oix zuqc zoux ei mienh, fai jiu-bang oix zuqc maaih nyungc dongh mienh qiemx zuqc nyei? Maaih janx nyei jiu-bang camv nyei mingh naaic maiv sienx nyei mienh, ninh mbuo hhangv haaix nor haih noic duqv ninh mbuo daaih sienx, fai daaih muangx kuv fiensex? Ziouc dorh jiu-baang zoux sic hhangv maaih huox nor.

Weic oix maaih mienh camv yiem jiu-baang, oix mienh camv maiv nqemh ninh mbuo, ninh mbuo ziouc cau-fiem taux baamh mienh oix nyei, maiv zeiz cau-fiem taux Ziouv goiv yienc maengc nyei jauv.

Zunh doz gorngv taux zuiz zoux bun mienh maiv oix muangx, zoux bun mienh youz, zoux bun mienh biaux. Zoux gau, jiu-baang maiv doix-dekc taux zuiz. Weic haaix nyungc oix nduov

mienh daaih sienx Yesu? Mbuox ninh mbuo sienx liuz Yesu zoux ei ninh mbuo ganh nyei hnyouv? Zoux bun ninh mbuo kuh yiem nyei yiem ninh mbuo zoux nyei zuiz? Naaiv se doix-dekc taux sienx Yesu nyei jauv. Ih jaax hnoi maaih jiu-baang hnavg naaiv camv jienv faaux. Baulo gorngv, “*Ziangh hoc oix taux, mienh oix ngaengc maiv muangx maaih gorn-buonv nyei doz. Kungx oix ei ganh nyei hnyouv nyunc lorz fin-saeng camv nyei daaih njaaux puix ninh mbuo nyei m'normh oix muangx nyei. 4 Ninh mbuo maiv oix muangx zien leiz ziouc hlioux m'normh mingh muangx maiv maaih gorn-buonv nyei gouv-laic.*”

Naaiv nyungc sienx fai zoux nyei sic se maiv zeiz Yesu paaiv mbuo zoux nyei gong. Yesu heuc mbuo mingh mbuox mienh zoux ninh nyei sai-gorx yaac ei nzengc ninh njaaux nyei waac (Matv[^]tai 28:18-20). Mbuo maiv zuqc nduov mienh sienx Yesu, mbuo nyei gong se douc Tin-Hungh nyei waac. Ninh nyei waac maaih qaqv haih njoux zuiz-mienh (Lomaa 1:16).

Jiu-bang oix zuqc lengc nyei maiv zorpc baamh gen nyei jauv. Buoqc zangc caux zunh doz se maiv hnavg baamh gen nyei jauv, se maiv zeiz weic zoux daaih bun mienh naauc ngitc mv baac buoqc zangc Zeix Lungh Zeix Ndau wuov Dauh Ziouv. Mienh sienx Ziouv weic ninh mbuo zieqv duqv gorngv ninh mbuo se zuiz mienh qiemx zuqc njoux Ziouv Yesu. Ninh mbuo caux mbuo juangc jienv buoqc zangc weic ninh mbuo zieqv duqv gorngv mbuo se caux ninh mbuo benx duqv bungx nqoi yiem zuiz nyei mienh, maaih hnyouv oix laanh ceix laanh yiem Ziouv nyei waac. Mbuo oix zuqc doix-dekc zuiz, simv nqoi zuiz, maiv dungx bun zuiz morh linc, ei mienh duqv mienh camv, mv baac ei Ziouv duqv fuqv gauh longx!

Nyic Ziepc Joux Waac Naaic:

I hmuangv hnavg haaix ceix wange siangx nyei jaa?

Ging-sou: Cong-mengh 31:30; 1 Bide 3:3-4; E[^]fe[^]so 5:25; Tidatc 2:4

Gorngv Jiex gorn nyei waac: I hmuangv oix zuqc zieqv duqv gorngv **da'yietv**, dornj jaa se buonh deic fai ganh laengz ngaengc waac fai liepc ngaengc waac caux Yesu Giduc. **Da'nyeic**, cingx daaih benx laengz ngaengc waac caux liepc ngaengc waac caux doic. Jienv jiex nyei dangv taux dongh maiv bun jaa mband, fai maaih waaic nyei jauv, se ziepc zuoqv bun Ziouv weic ei jienv ninh nyei waac. Weic i hmuangv ei jienv Ziouv nyei waac ziangh ziouc bun i hmuangv haih wange siangx, haih simv nqoi ndiqv zuqc ndorpc nyei ga'naaiv. **Ging-sou nyei eix-leiz njaaux mbuo haih zoux weic ceix wange siangx nyei jaa.**

Gorngv mengh caux muonc Ging-sou nyei eix-leiz:

A. Longc qiangx zorc gu'nyouz hnyouv maiv zeiz ga'nyiec nyei beih zaangc.

1. Ga'nyuoz hnyouv se gauh jienv ga'nyeic beih zaangc nyei nzueic. Cong-mengh 31:30 gorngv, “*Mienh maaih yuoqc fei mv baac haih jaav nyei. Nzueic nyei jauv yaac haih jiex. Mv baac taaih Ziouv nyei m'sieqv dorn puix duqv ceng*”. Ninh nyei hnyouv fai juoqc setv longx weic ninh taaih Tin-Hungh. Gamh nziex Ziouv fai taaih Ziouv se benx hnyouv nyei yietc nyungc jienv sic.

2. Bide gorngv taux zoux auv mienh nyei sic. Yiem 1 Bide 3:3-4 *“Meih mbuo zornng nzueic maiv dungx kungx zornng beih zaangc, gitv mba'biei-mbinz, zornng jiem zornng nyaanh, zuqv ciouh dunc nyei lui-houx. Daaux nzuonx oix zuqc zornng gu'nyuoz hnyouv, se oix zuqc hnyouv suonc hnyouv ndaauv. Naaiv se zornng nzueic yaac yietc liuz maiv haih zitc. Ei Tin-Hungh mangc yaac jaaix haic.”* Siensex Yesu mienh oix zuqc longc ziangh hoc zorc hnyouv zorc ga'nyuoz nyei juoqc setv, maiv zeiz zornng zorc ga'nyiec. Bide maiv zeiz gorngv heuc m'sieqv dorn maiv dungx zornng nzueic, ninh gorngv nyei ga'nyuoz gauh jienv ga'nyiec. M'jancg yaac fih hngangv nyei zorc ga'nyuoz gauh jienv zorc ga'nyeic. Mbuo hiuv duqv jaa gox jienv mingh ga'nyiec jaa waic jienv mingh, mv baac jaa gox jienv mienh ga'nyuoz haih gauh nzueic jienv mingh.
 3. Se gorngv mbuo i hmuangv zunv dingc hnyouv hnamv Yesu Giduc, ga'nyuoz hnyouv caux juoqc setv jiex gorn nzueic, ziouc bun jaa gauh wancg siangx. Jaa hnamv Yesu ziouc gauh jaa haih hnamv auv nqox, jaa mbuoqc Yesu ziouc gauh jaa haih mbuoqc gauh nqox, jaax fu-sux Yesu ziouc jaa gauh haih fu-sux doic.
2. **A'hneiv meih maaih nyei jaa, maiv zeiz meih oix duqv, feix duqv nyei jaa.**
1. Maaih camv nyei jaa piatv, ndortv weic zuqc dorng jaa nyei mienh maiv longc ziangh hoc a'hneiv ganh maaih nyei jaa. Maiv zien zien nyei hiuv taux ganh nyei jaa. (Pou tong nyei jauv se mbuo maiv hiuv duqv jaax-zinh cuotv liuz mbuo ndortv fai maiv maaih liuz cingx hiuv)
 2. Mbuo nyei jaa, maiv gunv maiv hngangv mienh nyei (longx fai waic) maaih jienv nyei jaa se gauh longx. Se gorngv mbuo *“oix maaih”* nyei jaa fai *“feix duqv”* nyei jaa mbuo haih jiex gorn maiv buangh hnyouv mbuo maaih nyei. (Jaa mv baac hngangv deix biau v nor, yie yiem nyei dorngx lung h muonc hmuangx deix cuotv maiv duqv ka'lau, janx buov pot/gan caa zuez gor, yie maaih ziangh hoc yie hnyouv hnamv feix duqv yie duqv biau v maaih ndau hngangv yie nyei doic nor, yiem lengc nyei cuotv liuz lomc zangc nyei hiev juv heuc zungv maiv maaih mienh la'huotv ndanc mbuo. Yie ziouc liemh zeih jangx taux yie mbuo nyei biau v yiem Pa'leih laangc. Mienh bungx nqaiv zoi maeqc horng nyei dorngx. Yie ziouc jiex gorn laengz zingh Ziouv).
 3. Se gorngv meih nyei auv fai nqox hiuv duqv meih maiv buangv hnyouv duqv ninh zoux auv fai nqox ninh jiex gorn maaih hnyouv mun nyei sic. Maiv dungx korh fiqv mienh nyei jaa, mienh nyei jaa yaac maiv dunh yunh, oix maaih longx wancg siangx nyei jaa jiex gorn hoqc taux (m'jancg hoqc ganh nyei auv, zoux auv mienh hoqc ganh nyei nqox). Jiex gorn hnamv ganh nyei auv nqox. Bide gorngv mbuox zoux nqox nyei mienh *“Meih mbuo zoux nqox nyei mienh yaac oix zuqc fih hngangv nyei hiuv duqv korv-lienh ganh nyei auv ”* (1 Bide 3:7)
3. **Longc hnyouv gin v hnamv meih nyei auv nqox, maiv zeiz weic ninh mbuo puix duqv.**
1. Maiv gunv mbuo nyei auv fai nqox se hngangv haaix nor, ih zanc mbuo i hmuangv nyei jiu-tong se hngangv haaix nor, mbuo haih aengx jiex gorn hoqc laanh hnamv laanh hngangv Ziouv hnamv mbuo nor.

2. Hnamv yie jaa se maiv zeiz ca'bouh fai la'guaih cuotv. Buatc mienh nyei jaa wange siangx yaac maiv zeiz maengc longx ziouc duqv. Baulo gorngv mbuox zoux nqox nyei mienh yiem E^{fe}so 5:25 *Oix zuqc hnamv ganh nyei auv hnangv Giduc hnamv jiu-baang, yaac weic jiu-baang siev ninh nyei maengc (E^{fe}so 5:25), zoux auv nyei mienh hnamv nqox caux fu'jueiv (Tidatc 2:4)*
3. Ging-sou mengh nyei heuc zoux auv zoux nqox nyei mienh oix zuqc hnamv doic. Hnamv se benx yietc nyungc jienv nyei ceix jaa.

Nyic Ziepc Yietv Joux Waac Naaic:

Ging-sou hnangv haaix nor gorngv taux caux ganh fingx mienh dornng jaa?

Ging-sou: 1 Ko^{lin}to 7:39 Se gorngv nqox corc ziangh jienv nyei ziangh hoc, auv maaih dornng jaa nyei leiz ndoh jienv. Mv baac nqox daic mi'aqv nor, auv maiv zuqc dornng jaa nyei leiz ndoh aqv. Sueih binc longc haaix dauh zoux nqox yaac duqv, *da'faanh sienx Ziouv nyei mienh hnangv*

Dau Nyei Waac: Ging-sou yiem Siang Ngaengc Waac maiv gorngv taux longc ganh fingx mienh. Yaac maiv hatc gorngv maiv bun longc ganh fingx mienh. Sienx Yesu mienh se haih ginv longc, maiv gunv haaix fingx mienh, “*da'faanh sienx Ziouv nyei mienh hnangv*” (1 Ko^{lin}to 7:39)

Yiem Loz Ngaengc Waac nyei ziangh hoc, I^{saa}laa^{en} fingx mienh Tin-Heuc ninh mbuo maiv dungx longc naaiv fingx wuov fingx weic goux ninh mbuo, maiv oix ninh mbuo mingh zangc zienh (Nzame Leiz Latc 7:3-4 *Maiv dungx caux ninh mbuo jouh cien, bungx meih mbuo nyei sieqv bun ninh mbuo nyei dorn longc fai lorz ninh mbuo nyei sieqv bun meih mbuo nyei dorn longc. Hnangv naaiv zoux haih bun meih mbuo nyei dorn leih Ziouv aengx zaangc ganh dauh zienh. Ziouv ziouc qiex jiez meih mbuo, siepv-siepv nyei mietc meih mbuo.*), Yaac goux jienv bun zoux sai nyei mienh maaih kuv douh zong (Lewi 21:13-14). Naaiv deix hatc nyei se yiem Loz Ngaengc waac nyei ziangh hoc. Weic sienx Yesu, mbuo maiv ganh nyungc. Mbuo benx yietc nyungc hnang...benx Giduc nyei mienh. Yiem Gaa^{laa}tie 3:27-29 *Meih mbuo jiej wuom nyei leiz duqv caux Giduc juangc maengc ziangh, ziouc goiv yienc duqv Giduc nyei fiem-fingx. Weic naaiv Yiutai Mienh fai Janx maiv ganh nyungc, zoux nouh nyei fai maiv zoux nouh nyei, m'jangc fai m'sieqv yaac maiv ganh nyungc. Meih mbuo caux Giduc Yesu juangc maengc ziangh yietc zungv ziouc benx yietc nyungc hnangv. Se gorngv meih mbuo benx Giduc nyei, meih mbuo ziouc benx Apc^{laa}ham nyei zeiv-fun yaac oix nzipc Tin-Hungh laengz ceix bun nyei.*

Nyic Ziepc Nyeic Joux Waac Naaic:

“*Meih mbuo zoux nqox nyei mienh yaac oix zuqc fih hnangv nyei hiuv duqv korv-lienh ganh nyei auv*” (1 Bide 3:7) hnangv haaix nor korv-lienh?

Ging-sou: 1 Bide 3:7 “*Meih mbuo zoux nqox nyei mienh yaac oix zuqc fih hnangv nyei hiuv duqv korv-lienh ganh nyei auv*”

Gorngv jiex gorn nyei waac: Maaih auv nyei mienh, hiuv duqv korv-lienh ganh nyei auv nyei mienh, oix zuqc laanh mbuoqc laanh. Ndangc Baulo mbuox zoux auv nyei mienh mbuoqc ganh nyei nqox, Ninh heuc i hmuangv laanh mbuoqc laanh (E[^]fe[^]so 5:21) Mbuoqc nyei gong se i hmuangv nyei gong, nqox mbuoqc auv maiv zeiz gorngv auv zoux beiv mv baac mbuoqc weic hnamv weic hiuv duqv korv-lienh, hiuv duqv auv qiemx zuqc nyei, hiuv duqv auv nzauh nyei, hiuv duqv auv cau fiem nyei, hiuv duqv auv nyei hnyouv. Zoux nqox nyei mienh mbuoqc auv se bun auv nyei jienv, auv nyei qiemx zuqc, daaih ndangc ganh nyei. Naaiv yaac benx siev ganh nyei maengc nyei hnamv.

Gorngv muonc Ging-sou:

1. Nqox hnamv auv nyei nza'hmien buonc.

- a. Korh lienh fai bieqc hnyouv auv se hiuv duqv auv nyei hnyouv fai qiemx zuqc nyei. Janx nyei waac se" sensitive" fai "thoughtful and respectful". Zoux nqox nyei mienh oix zuqc hnamv taux auv nyei nza'hmien buonc. Maaih m'sieqv dorn camv gorngv, Yie nyei gox maiv bieqc hnyouv yie!" Ninh maiv caux yie gorngv waac jiu-tong! Maiv muangx yie!, Maiv hiuv duqv yie hnamv nyei sic. Nqox maiv hiuv duqv hnamv auv nyei nza'hmie buonc ziouc maaih nzongh dangv jienv i hmuangv nyei jaa.
- b. "Hiuv duqv korh lienh ganh nyei auv, se maaih eix-leiz gorngv, oix zuqc hnamv mienh nyei nza'hmien buonc. Mbuo hnavg hnavg naaiv nor zoux ziouc zuangv Tin-Hungh, weic ninh siev...Mbuo oix zuqc hiuv duqv mbuo ganh nyei auv nyei qiemx nyei. Maiv hiuv oix zuqc naaic, Naaic gaax ninh oix meih benx haaix nyungc nqox bun ninh? Hnavg haaix nor yienc cingx gauh haih benx kuv nqox, guah haih korh lienh ninh?

2. Nqox biux mengh auv se jaaix yaac maaih jaax-zinh.

- a. Tin-Hungh zeix daaih, bun zoux auv nyei mienh za'gengh jaaix yaac maaih jaax-zinh. Maiv gun ninh mbuo se gauh mau m'jangc. Mv baac sin zaangc nyei qaqv hnavg. Ninh mbuo nyei sienx fim, cong-mengh, hnamv nyei jauv maiv zuqc gauh mau m'jangc.
- b. Qaqv gauh mau se maiv zeiz maiv benx nyei sic, Tin-Hungh bun m'jangc gauh hlenv, Tin-Hungh zeix m'sieqv daaih puix m'jangc. Yietc nyungc zoux m'jangc nyei mienh haih biux mengh ninh mbuo nyei auv se maaih jaax zinh fai jaaix se goux ninh mbuo nyei auv caux liuz leiz ninh mbuo nyei auv. Lorz qiangx zoux sic biux mengh mbuo nyei auv se jaaix caux maaih jaax-zinh bun Tin-Hungh caux mbuo.

3. Nqox benx auv nyei zien doic.

- a. Taaih auv se zoux sic bun cing mbuo tongx nimc, yietc nyungc tongx nimc se dornj jaa caux ninh. Yaac zieqv duqv yiem Ziouv nyei nza'hmien i hmuangv nyei mienh se juangc jienv ceix, juangc jienv siou jaaix nyei ga'naaiv yiem Tin-dorngh.
- b. Yietc nyungc mbuo haih zoux biux mengh mbuo korh lienh, mbuo hnamv, mbuo a'hneiv, mbuo taaih mbuo nyei auv se benx ninh mbuo nyei zien doic. Juangc maengc, juangc hnamv, juangc mouz deic, juangc nyei maengc se benx maaih jiu-tong nyei maengc.

- c. Mbuo nyei daux gaux nyei waac Tin-Hungh dau fai maiv dau se yiem mbuo hnavg haaix nor korh lienh mbuo nyei auv, cau-fiem taux mbuo nyei auv, fai zieqc duqv auv nyei jaax-zinh.

Nyic Ziepc Faam Joux Waac Naaic:

Tin-dorngh se hnavg haaix nor?

Gorngv jiex gorn nyei waac:

Yiem Meiv guoqv mv lauh mv lauh haix maaiah janx gorngv ninh mbuo buac Tin-Hungh fai duqv mingh liuz Tin-dorngh aengx nzuonx daaih. Jiex daaih i ziex hnoi maaiah laanh ndie sai gorngv dongh mienh gorngv ninh daic mi'aqv, ninh duqv buac Tin-dorngh hnavg naaiv hnavg wuov. Fu'jueiv fiev fieng daaih naaic taux zunh doz mienh, Tin-dorngh hnavg haaix nor, za'gengh maaiah Tin-Dorngh nyei fai? Naaiv deix mienh gorngv ninh mbuo buac Tin-dorngh za'gengh zien nyei fai? Mbuo maiv hiuv duqv gorngv ninh mbuo za'gengh haih buac Tin-dorngh nyei fai maiv buac.

Mv baac Ging-sou gorngv yiem Tin-dorngh maiv maaiah zuiz, maaiah maaiah diev kouy, maiv maaiah naanc zingh, maiv maaiah mun. Mbuo yaac maiv haih zoux dorngec Tin-Hungh. Maiv zuqc mienh hoic, maiv zuqc mienh nzorng. Yiem Tin-dorngh maiv maaiah nzaeng jaax, maiv maaiah qiex jiex, maaiah maaiah nyiemv, maaiv maaiah nzauh. Za'gengh kuh yiem yaac oix yiem nyei dorngh.

Gorngv Mengh caux Muonc Ging-sou:

1. Yiem Tin-dorngh mbuo maaiah dunh yunh nyei orn lorqc caux njien-youz taux daauh/*perfect pleasure*. Singx Nzung 16:11 gorngv, *Meih oix bun yie hiuv duqv ziangh maengc nyei jauv. **Yiem meih nyei nza'hmien meih bun yie maaiah njien-youh taux daauh.** Yiem meih nyei mbiaauc jieqv buoz maaiah yietc liuz nyei orn-lorqc.* Nyungc-nyungc dongh zoux bun mbuo njunh fai mun nyei yietc liuz maiv haih hoic mbuo. Yiem Ziouv nyei nza'hmien za'gengh maaiah cing-nzengc, dunh yunh, orn lorqc, njienh youh taux daauh.
2. Yiem Tindorngh mbuo maaiah dunh yunh nyei cong-mengh fai hiuv duqv nzengc dongh Tin-Hungh bun mbuo hiuv nyei. 1 Ko^{lin}to 13:12 *Ih zanc mbuo hnavg mangc gingx nor, kungx buac louh louh wuov. Mv baac taux wuov zanc mbuo ziouc buac hmien doix hmien. Yie ih zanc hiuv duqv deix, taux wuov zanc yie ziouc hiuv duqv nzengc, hnavg Tin-Hungh hiuv nzengc yie nor.*” Mbuo maiv maaiah dongh mbuo oix zuqc naaic fai maiv bieqc hnyouv nyei sic, maiv mengh baeqc nyei sic, maiv hiuv nyei sic, mbuo maiv zuqc longc sienx fim ziangh, mbuo longc mbuo hiuv nyei ziangh aqv. (Ih zanc mbuo longc sienx fim ziangh, sienx fim ei Tin-Hungh nyei waac gorngv maaiah Tin-dorngh, taux wuov zanc mbuo yiem jienv wuov mbuo buac aqv)
3. Yiem Tin-dorngh mbuo maaiah lamh kaux dorngec, maaiah lamh hnamv dorngh, duqv Tin-Hungh orn mbuo. Mbuo maiv zuqc buangh maiv lamh hnamv dorngh nyei sic. Mbuo haih hiuv duqv dunh yunh nyei hnamv, mbuo yaac haih hnamv Tin-Hungh hnavg mbuo

horpc zuqc nor hnamv, mbuo yaac duqv ninh hnamv mbuo yietc liuz. Hnamv benx yietc nyungc dongh mbuo maiv zuqc cai nyei yiem Tin-dorngh. (buangh zuqc nyei sic cai taux Tin-Hungh nyei hnamv? Maiv horpc zuqc cai, daux nzuonx oix zuqc bungx hnyouv Tin-Hungh.)

Yiem Tin-dorngh se dunh yunh, orn lorqc nyei dorngh. Hnangv naaiv nor hnamv taux maah. Yiem wuov Tin-dorngh, mbuo yietc liuz duqv bungx nqoi yiem waaic caux orqv nyei fiem fingx. Mbuo yietc liuz maiv haih zoux waic zoux zuiz, maiv haih zoux maiv benx nyei sic, maaiah dunh yunh nyei maengc, cing-nzengc nyei maengc yiem cing-nzengc nyei Ziouv nyei nza'hmien. Zuov maiv duqv taux wuov hnoi aqv! Zuiz hoic nyei, yietc liuz sortv guangc, yietc liuz duqv caux Ziouv yiem orn lorqc nyei dorngh, naaiv za'gengh maiv zaic nyei cuotv liuz duqv taux wuov hnangv.

Nyic Ziepc Feix Joux Waac Naaic:

Siensex Yesu nyei mienh daic wuov zanc duqv siang sin aqv fai? Taux haaix zanc cingx duqc siang sin?

Ging-sou: Lugaa 23:43 Yesu dau ninh, “Yie gorngv zien mbuox meih, ih hnoi meih duqv caux yie yiem orn-lorqc huingx.”; 2 Ko^lin^to 5:6-8 *Weic naaiv mbuo bungx dingc hnyouv. Mbuo hiuv duqv, da'faanh mbuo nyei sin corc zoux mbuo nyei biau, mbuo leih Ziouv nyei biau aqv. Mbuo yiem naaiv seix zaangc kaux sienx fim, maiv zeiz kaux mbuo mangc duqv buatec nyei. Mbuo bungx dingc hnyouv yaac gauh oix leih naaiv norm sin mingh caux Ziouv yiem;* 1 Yo^han 3:2 *Hnamv haic nyei gorx-youz aah! Ih zanc mbuo benx Tin-Hungh nyei naamh nyouz. Nqa'haav hingv mbuo oix hnangv haaix nor maiv gaengh hiuv. Mv baac mbuo hiuv duqv Giduc hinc cuotv wuov zanc mbuo oix hnangv ninh nor, weic zuqc Yesu za'gengh hnangv haaix nor, mbuo yaac duqv buatec ninh hnangv wuov nor*

Yiem 2 Ko^lin^to 5:6-8 *Weic naaiv mbuo bungx dingc hnyouv. Mbuo hiuv duqv, da'faanh mbuo nyei sin corc zoux mbuo nyei biau, mbuo leih Ziouv nyei biau aqv. Mbuo yiem naaiv seix zaangc kaux sienx fim, maiv zeiz kaux mbuo mangc duqv buatec nyei. Mbuo bungx dingc hnyouv yaac gauh oix leih naaiv norm sin mingh caux Ziouv yiem.* Mengh nyei gorngv sienx Yesu daic mingh nyei Lingh wuonh leih sin mingh caux Tin-Hungh yiem. Yesu ganh mbuox yiem ziepc nzangc jaax wuov dauh janx zaqc, *Ih hnoi meih duqv caux yie yiem orn-lorqc nyei huingx.* (Lugaa 23:43) Orn-lorqc nyei huingx se Tin-dorngh.

Ging-sou njaux gorngv, daic mingh nyei mienh duqv yiem Ziouv nyei nza'hmien mv baac maiv gaengh duqv siang sin. Zuov taux Yesu aengx daaih nyei da'nyeic nzunc. Daic mingh wuov zanc mbuo nyei Lingh wuonh mingh Tin-dorngh sin biopv njiec ndau (Lugaa 16:19-31) zuov jienv Yesu daaih nyei da'nyeic nzunc (1 Te^saa^lo^ni^gaa 4:14-17 *Yie mbuo sienx Yesu daic mingh aengx nangh daaih ziouc sienx Tin-Hungh yaac oix dorh yietc zungv sienx Yesu nyei mienh, dongh daic mingh wuov deix, caux jienv Yesu yietc jauv aengx daaih. Ih zanc yie mbuo mbuox meih mbuo nyei se ziux Ziouv njaaux yie mbuo nyei waac. Ziouv aengx daaih wuov hnoi, mbuo corc ziangh jienv nyei mienh zungv maiv duqv mingh ndaangc daic mingh nyei mienh. Wuov zanc Ziouv ganh ziouc yiem wuov tin-dorngh njiec daaih. Maaiah qiex hatc mbui nyei,*

aengx maaih fin-mienh bieiv nyei qiex yaac maaih Tin-Hungh nyei nzatc mbui. Siensex liuz Giduc, daic mingh wuov deix, ziouc nangh ndaangc. Nqa'haav mbuo corc ziangh jienv nyei mienh caux nangh daaih wuov deix ziouc faaux mingh yiem mbuonx gu'nyuoz buangh Ziouv yiem wuov ndaamv-lungh. Hnangv naaic, mbuo duqv yietc liuz caux Ziouv yiem. Dongh naaiv nzunc daic mingh nyei mienh ziouc duqv nangh daaih sin goiv yienc duqv siang sin. 1 Yo^han 3:2 Hnamv haic nyei gorx-youz, aah! Ih zanc mbuo benx Tin-Hungh nyei naamh nyouz. Nqa'haav hingv mbuo oix hnangv haaix nor maiv gaengh hiuv. Mv baac mbuo hiuv duqv Giduc hinc cuotv wuov zanc mbuo oix hnangv ninh nor, weic zuqc Yesu za'gengh hnangv haaix nor, mbuo yaac duqv buatac ninh hnangv wuov nor

Baulo gorngv maaih norm ziangh hoc daic mingh nyei mienh nyei lingh wuonh caux sin aengx duqv gapv zunv nzunc . Yie 2 Ko^lin^to 5;2-4 *Ih zanc mbuo yiem jienv naaiv norm sin njunh jienv yiem, aqc duqv zuov maiv taux duqv yiem tin-dorngh nyei biauv. Yiem jienv tin-dorngh nyei biauv se hnangv zuqv jienv lui-houx nor, ziouc maiv zuqc laengh gaengv yiem. Mbuo corc yiem naaiv norm ndopv-liuh kouv haic, njunh jienv yiem. Naaiv maiv zeiz mbuo oix guangc baamh gen nyei sin, mv baac oix duqv tin-dorngh nyei sin. Haih daic nyei sin ziouc tiuv benx yietc liuz nyei sin. Maiv gaengh duqv siang sin nyei ziangh hoc se laengh gaengv nyei yiem. Siang sin dunh yunh nyei sin maiv gaengh duqv zuov taux Yesu daaih nyei da'nyeic nzunc, dongh ninh daaih dorh siensex nyei mienh. Ih zanc daic mingh nyei mienh nyei Lingh wuonh yiem jienv Tin-dorngh sin yiem jienv baamh gen nyei. Yesu daaih nyei hnoi cingx daaih gapv, ziouc goiv yienc benx siang sin.*

Nyic Ziepc Hmz Joux Waac Naaic:
Siensex Yesu Mienh Zorngh jienv mingh tov dorngh (Halloween)

Gorngv Jiex gorn nyei waac:

Meiv Guoqv deix bung, yietc hnyangx maaih nzunc taux ziepc hlaax faah ziepc yietv wuov hnoi, zorngh jienv zuqv jienv janx daic nyei lui houx mingh tov dorngh. Yietc buonc yietv buonc nyei ngaengv jienv gaengc mingh tov. Maaic huox nyei mienh a'hneiv duqv maaic dorngh, maaic zorngh-zuqv lui zuangv janx daic mienh a'hneiv maaic, fu'jueiv a'hneiv baeqc-baeqc mingh tov duqv dorngh.

Maaih camv nyei siensex Yesu mienh maiv cuotv mingh tov dorngh, maiv zorngh jienv mingh. Weic zuqc hmuangx fai maiv oix zorngh zuqv hnangv daic mingh nyei mienh nor cuotv mingh tov. Maaih deix siensex Yesu mienh mingh nyei, maiv gunv yiem laangz zong fai yiem buoqc zangc dorngh. Hnangv mbuo nyei jiu-bang nor, heuc fu'jueiv daaih naaiv weic maiv oix fu'jueiv cuotv mingh hmuangx nyei dorngh.

Naaic nyei waac se, siensex Yesu mienh hnangv haaix nor zoux yiem naaiv norm hnoi? Horpc zuqc sueih fu'jueiv cuotv mingh tov dorngh fai? Maiv bun cuotv mingh tov se zoux jiex ndangc fai gamh nziex jiex ndangc fai?

“Halloween” nyei gorn:

Naaiv norm mbuox maaih eix leiz yiem zinh ndangc sienx Yesu nyei mienh, Janx nyei waac heuc “all Saints Day celebration”, naaiv norm hnoi se zorqv daaih lengc nyei weic jangx taux sienx Yesu mienh zuqc mienh hoic daic fai daix daic nyei mienh. Ndangc wuov muonc heuc “Hollow eve” mv baac ih zanc mienh heuc “halloween”

Sienx Yesu mienh camv nyei yiem Europe nyei ziangh hoc buangh zuqc zangc zienh nyei mienh camv. Naaiv deix zangc zienh zangc daic nyei mienh nyei fingx za'gengh zoux bun sienx Yesu nyei mienh haih ndorpc. Maaih mienh sienx liuz Yesu mv baac oix zuotv jienv zinh ndangc nyei leih fingx zoux. Weic naaiv, sienx Yesu suiv naaiv norm hnoi lengc jeiv nyei maiv nitv zangc zienh mienh nyei hnoi, liuz ziouc maiv doic zangc zienh mienh zoux nyei hnoi. Bun cing naaiv se sienx Tin-Hungh mienh nyei lengc jeiv hnoi. Naaiv se hngangv naaic, maiv gunv ninh mbuo ndongc naaiv mv baac maaih mienh corc sienx zorpc.

Zangc zienh nyei mienh lengc jeiv "Celtic" fai "Europe" caux Yingh guoc mienh, zoux nyei se weic hnyangx jomc, taux juangv nyei ziangh hoc, daic saengh kuv liouc jienv orv, kangx jienv mbungv. Gaengc zuangx daic, juangv nyei ziangh hoc taux. Naiv deix mienh sienx gorngv buo hnoi nyei ziangh hoc se yiem 10/31-11/2 maaih kuaav ndie nqoi daaih dongh dangv jienv daic caux naangh nyei mienh, naaiv kuaav ndie bun daic mingh nyei mienh nzuonx daaih caux ziangh jienv nyei mienh yiem.

Maaih deix longc naaiv norm qiangx caux janx daic fai mienh jiu tong. Ninh mbuo sienx gorngv, daic nyei nzounx daaih hoic ziangh jienv nyei. Janx daic maiv nzuonx daic nyei dorngc cuotv liuz ninh mbuo duqv mienh bun fai uix ninh mbuo. Haih zunc fai fungx janx daic mingh se longc ga'naaiv cingv. “Treat” nyanh, ga'naaiv nyanc, fai hopv. Se gorngv haaix laanh maiv bun zuqc daic mingh nyei mienh ziouc zuqc “Trick” nduov. Ziouc yietc liuz zuqc hoic.

Yiem hmuangv nyei mienh duqv Tin-Hungh nyei njang ziux bieqc taux ninh mbuo nyei maengc caux fingx. Siangx sienx Tin-Hungh nyei mienh simv nqoi guangc nzengc zoux naaiv deix waac nyei sic. Weic zuqc **Nzame Leiz Latc 18:9-13** *Meih mbuo duqv bieqc Ziouv, meih mbuo nyei Tin-Hungh, ceix bun nyei deic-bung, maiv dungx zuotc yiem wuov nyei fingx-fingx mienh zoux youx haic, gamh nziev haic nyei sic. Maiv dungx bun meih mbuo nyei haaix dauh mienh zorqv ninh mbuo nyei dorn fai sieqv zoux buov ziec nyei ga'naaiv. Yiem meih mbuo gu'nyuoz yaac maiv dungx bun haaix dauh jough cim, mangc maengc, zoux faatv, bungx ding bungx jiemx, gaanv hei, mbouv gaaax fai mbouv fin. Da'faanh zoux naaiv nyungc sic nyei mienh, Ziouv youx haic. Laaix zoux naaiv nyungc sic, Ziouv, meih mbuo nyei Tin-Hungh, zunc ninh mbuo cuotv meih mbuo nyei wuov ndaangc maengx. Meih mbuo oix zuqc yiem Ziouv, meih mbuo nyei Tin-Hungh nyei nza'hmien, zoux maiv maaih dorngx nqemh nyei mienh.*

Maiv gunv sienx Yesu nyei ndongc haaix oix simv nqoi sienx zorpc nyei jauv, mv baac maiv ndutv. Yiem 1800 nyei ziangh hoc maaih Ying guoc mienh camv biaux daaih meiv guoqv dorh jienv ninh mbuo nyei sienx daaih, lengc jienv guaix nyei jauv fai "superstition". Lunx nyei Meiv guoqv mienh zuotv jienv ninh mbuo nyei nyungc zoux.

Sieng Yesu mienh hngangv haaix nor zoux yiem naaiv hnoi?

Ih hnoi zoux “halloween” nyei se nzengc-nzengc maiv sienx Tin-Hungh nyei mienh, ninh mbuo

maiv hiuv weic haaix nyungc ninh mbuo zoux. Maiv gunv zienh fai Zangc Ziouv nyei gorn. Fu'jueiv zornj jienv lorz qiangx mingh tov dorngh. Domh mienh longc qiangx zoux waic hopv diuv nyanc orv.

Da'yietv, Siensex Yesu maiv zuqc gamh nziex hnavg maiv sienx Yesu mienh nor. Maiv gunv Mienv longc haaix nyungc guv guaix nyei za'eix (1 Bide 5:8 hnavg sienh nor), mbuo bungx hnyouv Tin-Hungh, weic zuqc Singx Lingh yiem mbuo nyei hnyouv gauh hlenv jiex mienv (1 Yo^han 4:4).

Da'nyeic, sienx Yesu mienh oix zuqc longc cong-mengh, simv nqoi waic nyei jauv, zuiz nyei jauv, mangc longc ganh nyei fu'jueiv.

Da'faam, sienx Yesu mienh simv nqoi zoux waic nyei dorngh, lorz qiangx zunh kuv fiensex yiem naaiv norm ziangh hoc. Weic zuqc maiv sienx nyei maiv dan ngaengc Tin-Hungh, ninh mbuo gamh nziex taux daic nyei jauv. Ninh mbuo horpc zuqc gamh nziex zuqc dingc zuiz, weic benx Tin-Hungh nyei win-wangv (Hipv^lu 10:27) Maiv zuqc gamh nziex janx daic, gamh ziox dongh haih bun meih nyei lingh wuonh zuqc daic zuqc dingc zuiz.

Siensex Yesu nyei mienh longc naaiv norm hnoi, naaiv norm ziangh hoc dorh kuv fiensex bun yiem hmuangx nyei mienh. Lorz qiangx mbuox mienh taux zien nyei eix-leiz, zoux haaix nyungc zornj jienv mingh tov ga'naaiv.

Weic naaiv mbuo nyei jiu-bang longc qiangx caux lorz qiangx mbuox fu'jueiv taux kuv fiensex, bun ninh mbuo yiem longx nyei dorngh, maiv bun fu'jueiv mingh waaic nyei dorngh. Meih mbuo zoux domh mienh nyei mienh haih maaih lingc bun meih mbuo nyei fu'jueiv...zuqv nyei lui houx zuqv longx nyei, dorh ninh mbuo daaih muangx mienh zunh kuv fiensex yaac duqv dorngh nyei.

Dorngh se maiv zeiz waic nyei, bun dorngh yaac maiv zeiz waic nyei sic, bun qiangx haih zunh kuv fiensex...da'faanh zoux nyei sic taaih Tin-Hungh.

Siensex Yesu mienh meih zoux nyei taaih Tin-Hungh nyei fai? Naaiv se benx naaic nyei waac ndangc mbuo zoux nyei. Mbuo zoux nyei bun Ziouv duqv njang laangc nyei fai? Naaiv norm ziangh hoc bun qiangx sienx Yesu mienh zunh kuv fiensex gornv Tin-Hungh hnavg ninh mbuo , oix ninh mbuo goiv hnyouv guangc zuiz. Naaiv se benx longx nyei qiangx weic zuqc maiv sienx nyei mienh hnavg taux daic nyei hnoi...daic liuz oix zuqc souv jienv Ziouv nyei nza'hmien gornv mengh fai dingc zuiz (Hipv^lu 9:27)

Nyic Ziepc Luoqc Joux Waac Naaic:

Zunh Doz Mienh caux Zunh Nyei Ziangh Hoc! Zunh ndongc haaix lauh?

Ging-sou: Tidatc 2:1 *Meih njaaux mienh, meih oix zuqc njaaux doix maaih gorn-buonv nyei doz. 2 Ti^mo^tai 4:3-4* *Ziangh hoc oix taux, mienh oix ngaengc maiv muangx maaih gorn-buonv nyei doz. Kungx oix ei ganh nyei hnyouv nyunc lorz fin-saeng camv nyei daaih njaaux*

puix ninh mbuo nyei m'normh oix muangx nyei. 4 Ninh mbuo maiv oix muangx zien leiz ziouc hlioux m'normh mingh muangx maiv maaih gorn-buonv nyei gouv-laic

Oix zuqc longx ziangh hoc porv duqv mengh dongh zunh taux wuov yiemc Ging-sou. Ndauv fai nangv se maiv jienv, gorngv ndauv se maiv zeiz gauh longx, gorngv naangv yaac maiv zeiz gauh longx. Zunh lauh fai zunh nangv yaac maiv zeix jienv nyei. Jienv se zunh duqv toux taux wuov yiemc Ging-sou. Maaih ziangh hoc gauh lauh deix, maaih ziangh hoc gauh nangv deix, mv baac oix zuqc porv duqv mengh wuov douc Ging-sou. Muangx nyei mienh oix zuqc bieqc hnyouv taux wuov douc Ging-sou, caux Ging-sou nyei eix-leiz, liuz haih dorh mingh longc horpc yiem maengc. Muangx nyei mienh oix zuqc bieqc hnyouv gorngv Tin-Hungh nyei waac hhangv haaix nor oix ninh mbuo ziangh.

Se gorngv maiv mbenc longx fai maiv maaih waac gorngv nor, faah ziepc buon mv baac hhangv yietc seix nor bun meih ganh caux bun muangx nyei mienh. Mv baac se gorngv mbenc longx nyei, mienh muangx nyei yaac haih gan jienv meih zunh nyei nor, maiv gun zunh lauh deix mv baac hhangv maiv lauh nor.

Yie ganh nor, yie longc 40 buon nyei ziangh hoc zunh yietc nzunc doz. Maaih deix gauh camv maaih deix gauh zoqc deix. Weic zuqc se gorngv maiv porv mengh caux muonc nor za'gengh zunh maiv toux, gorngv lauh mv baac maiv maaih waac gorngv yaac zoux mienh youz. Feix ziepc buon nyei ziangh hoc nor gaux duqv porv mengh caux muonc Ziouv nyei waac. Longc 5 buon doqc Ging-sou, Longc biao buon gorngv jiex gorn waac, longc 20 buon porv mengh, longc 10 buon dorh Ging-sou nyei eix-leiz daaih longc zungv 40 buon mi'aqv.

Zunh nyic ziepc fai faah ziepc buon nyei mienh nzengc-nzengc maiv porv mengh Ging-sou nyei eix-leiz caux dorh Ging-sou nyei eix-leiz daaih longc yiem maengc. Weic naaiv zunh doz mienh oix zuqc mbenc daaih zunh maaih gorn buonv nyei doz. Njaaux leiz nyei ziangh hoc dorh muangx nyei mienh haih bieqc hnyouv mengh nyei taux Tin-Hungh nyei waac yiem Ging-sou, maaih hnyouv ei Ziouv nyei mienh haih ginv ei dongh ninh mbuo duqv haiz nyei. Zunh doz oix zuqc maaih mouz deic, zunh doz mienh oix zuqc bieqc hnyouv ninh oix muangx nyei mienh hhangv haaix nor ziangh caux zoux. Muangx nyei mienh oix zuqc haih hiuv duqv gorngv, **“yie haiz liuz naaiv, yie oix zuqc hhangv naaiv zoux, se gorngv yie oix ei jienv Ziouv nyei waac ziangh”** maiv zeiz la'guaih gorngv naaiv gorngv wuov, muangx nyei mienh ziouc maiv hiuv duqv ninh mbuo oix zuqc hhangv haaix nor ziangh fai zoux.

Janx nyei waac gorngv " maiv sietv maiv dungx nyaiv". Tin-Hungh nyei waac se joux joux maaih lamh longc nyei mv baac dongh mbuo qiemx zuqc nyei ziangh hoc oix zuqc zunh duqv horpc ziangh hoc. Se gorngv zunh doz mienh maaih hnyouv porv mengh Ging-sou bun muangx nyei mienh haih mengh baeqc nor, qiemx zuqc ziangh hoc (40-50 buon). Se gorngv mienh longc ziangh gauh nangv za'gengh maiv haih porv duqv mengh taux wuov douc ging-sou dongh ninh mbuo gorngv nyei.

Zunh doz nyei mouz deic se maiv zeiz zoux leiz gorngv “ging-sou waac” fai doqc ging-sou waac. Mv baac porv mengh Ziouv gorngv nyei waac nyei eix-leiz. Liuz ih jaax mienh ziouc hiuv duqv hhangv haaix longc naaiv deix ging-sou yiem ninh mbuo nyei maengc.

Yie nyei mouz deic se maiv zeiz gorngv “zoux benx leiz” mv baac zunh Ziouv nyei waac, yie oix porv mengh eix-leiz, yiem wuov gitv lungv ndiev nyei ziangh hoc nyei eix-leiz, ih jaax hnoi mienh hnangv haaix nor longc duqv horpc yiem maengc.

Maaih mienh gorngv, mienh youz, se gorngv meih gorngv lauh? Zunh lauh saah? Zunh nyei mienh “Boring” nor muangx nyei mienh yaac “bored”. Zunh nyei mienh maiv hiuv duqv ninh mbuo zunh nyei fai maiv bungx hnyouv ninh mbuo zunh nyei fai maiv bieqc hnyouv ninh mbuo zunh nyei, muangx nyei mienh fungx haih bieqc hnyouv ninh mbuo zunh nyei? Zunh nyei mienh maiv jorm hnyouv zunh, muangx nyei mienh fungc haih jorm hnyouv muangx. Zunh nyei mienh jorm hnyouv zunh, ziepc zuoqv nyei zunh mv baac muangx nyei mienh zungv maiv muangx yaac maaih. Se gorngv meih zunh nyei maiv nuqv taux ninh mbuo nyei maengc, maiv donv, maiv orn, maiv kuinx taux mienh nyei maengc, ninh mbuo maiv gunv meih zunh nyei!

Yie nyei mouz deic, zoux zunh doz mienh oix zuqc zunh doix-dangc nyei doz. Yie ganh oix zuqc hoqc, oix zuqc ei, buatc zien leiz tong taux yie nyei maengc, yie dorh mingh njaaux, mienh gauh buatc duqv cing. Zunh nyei oix zuqc doi- dangc yiem kuinx, orn, nunx, donv, ceix nyei jauv. Ei jienv Ziouv ziangh nyei mienh duqv orn, zoux zuiz nyei mienh zuqc donv caux kuinx.

Meih hnangv haaix nor hiuv duqv zunh haaix nyungc fai haaix norm hoc dauh? Maaih ziangh zunh weic pou tong mienh qiexx zuqc nyei (Jaa nyei jauv, zinh nyanh nyei jauv, benx deix bung nyei baeqc fíngx nyei mienh) maaih ziangh hoc zunh taux sienx fim nyei gorn ndoqv (Tin-Hungh, Diex, Dorn, Singx Lingh, Fin-mienh, Mienv, Saadaan, Njoux En, Jiu-Baang, Setv mueiz nyei sic), maaih ziangh zunh taux cuotv daaih nyei sic yiem lungv ndiev (deic bung nyei sic cuotv daaih bun mbuo gauh horpc zuqc nitv Ziouv). Meih hoqc liuz buatc haaix nyungc jiu-bang mienh qiexx zuqc fai dongh meih a'hneiv duqv hoqc nyei, fai yietc buonv yietc buonv yietc zang yietc zangc hoqc jienv mingh.

Nyic Ziepc Cietv Joux Waac Naaic:

Zunh Doz Mienh Zunh Tin-Hungh oix mienh hiuv nyei fai mienh oix muangx nyei?

Ging-sou 1 Ko[^]lin[^]to 2:1-2 *Zuangx gorx-youz aac, zinh ndaangc yie mingh meih mbuo naaic zunh Tin-Hungh gem jienv nyei jauv. Wuov zanc yie maiv zeiz longc kuh muangx nyei waac fai cong-mengh nyei waac gorngv. 2 Yie caux meih mbuo yiem wuov zanc, yie dingc hnyouv yie kungx oix gorngv Yesu Giduc yaac gorngv ninh zuqc ding ziepc nzaangc jaax daic nyei sic hnangv. Ganh nyungc yie maiv gorngv aqv*

Baulo maiv oix mienh gorngv waac gaam gorngv dongh mienh oix muangx nyei nduov mienh. Ninh maiv hnangv ih jaax maaih camv nyei zunh doz mienh, gorngv waac kuv muangx longc cong-mengh nyei waac nduov mienh camv. Yiem 1 Ko[^]lin[^]to 2:4-5 *Yie gorngv nyei waac, zunh nyei doz maiv zeiz longc baamh mienh nyei cong-mengh gorngv waac mbiaangc, mv baac bun cing Singx Lingh maaih domh qaqv. Hnangv naaic, meih mbuo nyei sienx fim maiv zeiz bangc baamh mienh nyei cong-mengh, se bangc Tin-Hungh nyei qaqv.*

Ninh maiv longc baamh mienh za'eix fai cong-mengh nduov mienh fai gorngv mienh oix muangx nyei. Ninh maiv oix mbuo nyei sienx fim bangc taux baamh mienh nyei cong-mengh mv baac oix mbuo bangc taux Tin-Hungh nyei qaqv.

Baulo zunh kuv fiex ei Ging-sou. Tin-Hungh nyei waac maaih qaqv goiv yienc mienh, maiv zeiz zunh doz nyei gong kuinx mienh goiv yienc, Tin-Hungh nyei waac zoux bun mienh hnyouv mun goiv hnyouv guangc zuiz, maiv zeiz zunh doz mienh haih. Zunh doz mienh yaac maiv horpc zuqc gorngv dongh mienh oix muangx nyei, kungx gorngv Tin-Hungh nyei waac, gorngv dongh mienh oix zuqc hiuv nyei.

Tin-Hungh nyei waac oix zuqc zoux gorn buonv goiv yienc mienh nyei maengc, maiv zeiz nzung, maiv zeiz mienh tov, mienh aapv, maiv zeiz mienh kuinx, maiv zeiz nyaev. Kungx Tin-Hungh nyei waac hhangv haih yienc mienh nyei maengc taux dauh.

Maiv zeiz zunh doz mienh nyei gong gorngv dongh mienh oix muangx nyei, longc ga'naaiv nduov, longc waac nduov mienh, yuqc mienh.

Haiz nyei mienh oix zuqc ginv dongh zunh nyei mienh duqv ziepc zuoqv nyei zunh, porv mengh eix-leiz liuz, haiz nyei mienh ganh oix zuqc mbuoqc, ei, nyunc gan Ziouv. Haiz nyei mienh ganh oix zuqc gorngv mengh caux ndaam dorng ninh mbuo duqv haiz nyei.

Zunh nyei mienh oix zuqc ndam dorng ninh mbuo duqv qiang zunh nyei, Yaagorpc 3:1 *"Yie nyei gorx-youz aac, meih mbuo maiv zuqc maaih mienh camv zoux fin-saeng, weic zuqc meih mbuo hiuv duqv yie mbuo zoux fin-saeng nyei mienh oix zuqc siemv gauh hniev jiex maiv zoux nyei mienh"*

Zunh doz mienh bangc kaux Singx Lingh nyei qaqv, Tin-Hungh paaiv zunh nyei mienh zunh, oix zuqc ziepc zuoqv zunh ei jienv Ging-sou zunh. Porv mengh Ging-sou, Ging-sou nyei eix-leiz, hhangv haaix nor dorh daaih longc yiem maengc....muangx nyei mienh oix zuqc ginv...ginv bun Tin-Hungh nyei waac yienc fai ginv ngaengc Tin-Hungh nyei waac.

Yie nyei gong se porv mengh ging-sou, zunh fai douc Tin-Hungh nyei waac yietc mouz yietc setv dongh Tin-Hungh oix mienh hiuv, oix mienh ei nyei, oix mienh ziangh nyei, dongh Tin-Hungh nyei eix caux oix nyei...zunh nyei nyei gorngv dongh Tin-Hungh oix ninh mbuo gorngv nyei, Tin-Hungh longc baamh mienh gorngv dongh ninh oix gorngv nyei. **Weic naaiv yie funx zoux zunh doz mienh za'gengh jienv haic, gamh nziex haic, longx haic nyei gong.**

Nyic Ziepc Bietv Joux Waac Naaic:

Zuh doz mienh, Cuotv liuz zunh doz caux hoqc Ging-sou aengx maaih haaix nyungc gong?

Ging-sou: 1 Bide 5:1-4; Yo[^]han 10:11; Ye[^]le[^]mi 23:1-4; E[^]se[^]ken 34:2-10

Dau Nyei waac: Dau nyei waac se yiem janx nyei waac “Pastor” wuov joux waac nyei eix-leiz. Naaiv joux waac za’ gengh biux mengh taux ninh nyei gong fai zoux zunh doz mienh nyei gong.

Yesu gorngv taux zoux zunh doz mienh se hnangv goux lingsh wuov fai dorh mienh nyei lingsh wuonh nyei mienh “spiritual leadership” Yesu gorngv ninh se goux ba’gi yungh longx wuov dauh Ziouv. (Ba’gi yungh se dorh daaih beiv taux sienx Yesu nyei mienh) goux ba’gi yungh mienh hnangv haaix nor goux ba’gi yungh? Ninh dorh, ninh uix, ninh liuc leix mangc caux dorh, ninh orn zoux longx, ninh njaaux zoux horpc nyei, mborqv zoux dorngc nyei. Naaiv se benx fangx gorngv taux “Pastor” wuov joux waac fai zunh doz mienh nyei gong fai "responsibilities". (Pastor wuov joux waac maaih eix-leiz gorngv shepherd fai goux ba’gi yungh mienh).

Bide fiev bun taux goux jiu-bang fai sienx Yesu nyei mienh, ninh longc goux ba'gi yungh wuov joux waac weic zuqc ninh mbuo mengh baeqc taux goux ba'gi yungh nyei jauv louc caux eix-leiz nyei mienh.

Yie kuinx yiem meih mbuo naaic jiu-baang nyei zuangx mienh gox. yie yaac zoux mienh gox, yaac zoux Giduc siouc kouv nyei zorong-zengx. Yie yaac oix juangc jienv zipv nqa'haav oix hinc cuotv nyei njang-laangc. 2 Yie kuinx meih mbuo goux longx Tin-Hungh bun meih mbuo goux wuov guanh mienh hnangv goux ba'gi yungh mienh goux ninh mbuo nyei ba'gi yungh nor. Oix zuqc buangv hnyouv goux, hnangv Tin-Hungh oix meih mbuo zoux nor, maiv zeiz hnangv zuqc aapv jienv zoux. Yaac maiv dungx zoux weic douh duqv nyaanh. Oix zuqc buangv hnyouv zoux. 3 Yaac maiv dungx gunv ba'laqc hniev Tin-Hungh bun meih mbuo goux wuov deix. Oix zuqc zoux longx nyei nyungc zeiv bun ninh mbuo zuotc. 4 Taux Giduc, dongh Goux Ba'gi Yungh nyei Domh Ziouv, daaih wuov zanc, meih mbuo ziouc duqv maiv haih mitc nyei njang-laangc ningv. (1 Bide 5:1-4)

Se gorngv mbuo oix buate cing gorngv taux zunh doz mienh nyei gong fai ninh nyei “role” mbuo mangc gaaxba’gi yungh nyei fiem fingx, goux yungh nyei mienh nyei fiem caux zoux nyei sic. Ziouc haih beiv mangc taux zunh doz mienh caux goux yungh mienh nyei gong. Mangc goux ba’gi yungh mienh zoux nyei gong caux ninh mbuo zoux nyei eix-leiz ziouc haih mengh baeqc gorngv zunh doz mienh nyei gong fai ninh mbuo nyei "responsibilities" se haaix nyungc.

Goux ba’gi yungh mienh fai Zunh doz mienh njoux

Ba’gi yungh haih mingh dorngc jauv, haih dingx laaih, mingh maiv go hnangv zungv lorz maiv buate jauv nzuonx biau. Weic ninh mbuo ganh mingh pien fai mingh dorngc jauv ninh mbuo ganh maiv haih nzuonx taux yungh guanh. Dingx laaih nyei ba’gi yungh guinh mingh guinh daaih, gamh nziex, qiexm zuqc goux ba’gi yungh mienh mingh dorh ninh mbuo nzuonx.

Yesu buatc mienh camv, hnangv dingx laaih nyei mienh, maiv mengh baeqc guinh mingh guinh daaih hnangv ba'gi yungh maiv maaiah Ziouv goux (**Matv[^]tai 9:36** "*Yesu buatc naaiv deix mienh camv ninh za'gengh! haiz korv-lienh haic weic zuqc ninh mbuo kouv haic, maiv lamh kaux dorngx, hnangv guanh ba'gi yungh maiv maaiah ziouv goux nor.*") Douc waac mienh I[^]saa[^]yaa gorngv dingx laaih nyei mienh se hnangv ba'gi yungh nor (I[^]saa[^]yaa 53:6 "*Yie mbuo yietc zungv hnangv ba'gi yungh, yangh dorngc jauv, gorqv-mienh yangh gorqv-mienh nyei jauv hnangv. Ziouv zorqv yie mbuo zuangx mienh nyei zuiz an jienv ninh, bun ninh ndaam.*")

Hnangv ba'gi yungh dingx laaih mingh, maiv sienx Yesu nyei mienh se dingx laaih mingh qiemx zuqc mienh mingh lorz ninh mbuo, mingh dorh ninh mbuo nzuonx daaih yiem ba'gi yungh guanh nyei mbu'ndongx. Zunh doz mienh zoux nyei gong se hnangv goux ba'gi yungh nyei mienh. Ninh mbuo mbuox dingx laaih nyei mienh mingh lorz Yesu, weic Yesu zoux longx jix nyei goux ba'gi yungh nyei Ziouv. (**Yo[^]han 10:11** "*Yie se goux ba'gi yungh longx nyei ziouv. Goux ba'gi yungh longx wuov dauh nyunc weic ba'gi yungh siev ninh nyei maengc*")

Goux ba'gi yungh mienh fai Zunh doz mienh uix

Ba'gi yungh longc ziangh hoc camv nyei nyanc caux hopv, mv baac ninh mbuo hngongx nyei maiv simv jienv ninh mbuo nyanc nyei. Ninh mbuo yaac maiv hiuv duqv haaix nyungc miev haih laengc haaix nyungc nyanc duqv. Weic naaiv goux ba'gi yungh nyei mienh oix zuqc faix fim nyei goux longx mangc longx ninh mbuo nyanc nyei, dorh ninh mbuo mingh miev dongh haih tengx duqv ninh mbuo nyei dorngx. Yiem **Yo[^]han 21:17** Yesu gorngv mengh nyei mbuox Bide, "*Goux longx yie nyei ba'gi yungh oc.*" Yiem **Yo[^]han 21:15** "*Meih za'gengh hnamv yie gauh camv naaiv deix fai?*" Bide dau, "*Ziouv aah! Yie hnamv nyei lorqc. Meih hiuv duqv yie hnamv meih nyei.*" Yesu gorngv mbuox ninh, "*Meih yungz yie nyei ba'gi yungh dorn oc.*"

Zunh doz mienh nyei gong fai mouz deix se maiv zeiz zoux horpc ba'gi yungh nyei hnyouv, zoux ninh mbuo a'hneiv, mv baac uix ninh mbuo, longc zien leiz uix ninh mbuo nyei lingh wuonh. Maiv zeiz gorngv bun ninh mbuo nyei m'normh oix muangx nyei. Uix ninh mbuo nyei lingh wuonh qiemx zuqc nyei. Naaiv se hnangv Bide gorngv nor, horpc yungz maengc nyei nyorz. Yiem 1 Bide 2:2 "*Meih mbuo oix zuqc hnangv coqv hoqc cuotv seix nyei gu'nguaaz oix hopv nyorx nor, zanc-zanc oix hopv yungz lingh wuonh nyei cing-nzengc nyorx. Meih mbuo ziouc haih hlo daaih duqv njoux.*" Se gorngv haaix laanh goux ba'gi yungh nyei mienh fai zunh doz mienh piatv maiv uix Ziouv nyei ba'gi yungh fai sienx Yesu nyei mienh se maiv puix zoux goux ba'gi yungh nyei mienh fai zunh doz mienh (**Ye[^]le[^]mi 23:1-4** Ziouv gorngv, "*Yiem yie nyei miev-ciangv mietc yaac bun yie nyei ba'gi yungh nzaanx nyei goux ba'gi yungh mienh oix zuqc kouv aqv.* 2 *Weic naaiv Ziouv, I[^]saa[^]laa[^]en nyei Tin-Hungh, hnangv naaiv gorngv goux ninh nyei baeqc fingx nyei bieiv zeiv.* "*Meih mbuo bun yie nyei ba'gi yungh guanh nzaanx yaac zunc ninh mbuo mingh. Meih mbuo yaac maiv goux ninh mbuo. Laaix meih mbuo zoux nyei orqv sic yie oix dingc meih mbuo nyei zuiz.*" Ziouv hnangv naaiv gorngv. 3 "*Yie oix zorqv dongh yie zunc mingh yiem norm-norm guoqv zengc njiec nyei ba'gi yungh guanh siou zunv, dorh ninh mbuo nzuonx ganh nyei laanh. Ninh mbuo ziouc hiaangx jienv faaux, maaiah dorn camv.* 4 *Yie oix paav goux ba'gi yungh nyei mienh gunv ninh mbuo, goux ninh mbuo. Yiem naaiv mingh ninh mbuo maiv gamh nziex, maiv zuqc huaang, yaac maiv caa yietc dauh.*" Naaiv se Ziouv gorngv nyei waac) **Mangc E[^]se[^]ken 34:2-10**

Goux ba'gi yungh mienh fai Zunh doz mienh zoux beiv dorh

Bide mbuox zunh doz mienh "Yie kuinx meih mbuo goux longx Tin-Hungh bun meih mbuo goux wuov guanh mienh hnangv goux ba'gi yungh mienh goux ninh mbuo nyei ba'gi yungh nor. Oix zuqc buangv hnyouv goux, hnangv Tin-Hungh oix meih mbuo zoux nor, maiv zeiz hnangv zuqc aapv jienv zoux. Yaac maiv dungx zoux weic douh duqv nyaanh. Oix zuqc buangv hnyouv zoux." (1 Bide 5:2) Tin-Hungh bun zunh doz mienh fai goux ba'gi yungh mienh goux ninh nyei ba'gi yungh dongh ninh longc ninh nyei dorn Yesu zuoqc nzuonx daaih nyei mienh. Oix zuqc dorh ninh mbuo. Zunh doz mienh oix zuqc ndaamh dorng ninh mbuo duqv paaiv zoux nyei gong. Ninh mbuo hnangv haaix nor dorh, liuz ba'gi yungh oix zuqc ndaamh dorng ninh mbuo hnangv haaix nor gan. (**Hipv^lu 13:17** "Oix zuqc muangx meih mbuo nyei bieiv zeiv yaac mbuoqc ninh mbuo gunv. Ninh mbuo zanc-zanc goux jienv meih mbuo * Gikc waac gorngv "goux meih mbuo nyei lingsh wuonh". weic zuqc ninh mbuo oix zuqc gorngv mengh ninh mbuo zoux nyei gong mbuox Tin-Hungh. Oix zuqc muangx ninh mbuo weic bun ninh mbuo njien-youh nyei zoux ninh mbuo nyei gong. Maiv zeiz aeqv, ninh mbuo nzauh. Naaiv yaac maiv tengx haaix nyungc meih mbuo".)

Maiv dan zunh doz, mv baac "Pastor" nyei gong se goux caux dorh ba'gi yungh, longc nyungc zeiv dorh. Oix zuqc mingh ndangc cingx haih dorh, ganh oix zuqc zoux ei cingx haih mbuox mienh zoux ei. Maiv zeiz zunh fai aapv mv baac dorh! **Dorh longx nyei ba'gi yungh ziouv se maiv zeiz yiem nqa'haav zunc, mv baac mingh wuov ndangc dorh...mienh ei jienv zoux.**

Longx jiex nyei dongh zunh doz mienh haih njaaux nyei se ziangh yiem ninh ganh nyei maengc. Weic naaiv **1 Ti^mo^tai 4:16** njaaux taux zunh doz mienh gorngv, "Oix zuqc faix fim longx-longx nyei goux jienv ganh caux ganh njaaux nyei doz-leiz. Meih longc hnyouv zoux nor, meih ziouc njoux ganh yaac njoux muangx meih nyei waac wuov deix mienh."

Goux ba'gi yungh mienh fai Zunh doz mienh goux

Ba'gi yungh maiv haih goux ganh, Ninh mbuo maiv haih doix-dekc caux hieh juv dongh oix hoic ninh mbuo wuov deix win-wangv. Ba'gi yungh maiv haih ndiqv, maiv haih zong, maiv haih ngatc, maiv haih biu, tiux yaac maiv siepv. Se gorngv zuqc hieh juv daaih ngatc ninh mbuo nor, ninh mbuo guanh guanh nyei gapv zunh yiem dingc nyei, liemh maiv tiux biaux. Weic naaiv ninh mbuo za'gengh hungh heic bun ga'naaiv ngatc. Kungx goux ninh mbuo nyei ziouv haih njoux fai tengx ninh mbuo hnangv.

Sieng Yesu mienh fai ba'gi yungh yaac fih hnangv nyei qiemx zuqc ba'gi yungh ziouv goux fai zunh doz mienh goux, bun ninh mbuo maiv zuqc jaav nyei daaih nduov...weic zuqc za'gengh maaih camv. Zunh doz mienh oix zuqc goux jienv ninh mbuo nyei jiu-baang mienh maiv bun hieh juv daaih ngatc, nduov hoic ninh mbuo, oix zuqc njaaux zien leiz, oix zuqc ging jienv hnyouv mangc longx (maiv zeiz dauh dauh ba'gi yungh oix ziouv goux...mingh lengc nyei zuqc hiec juv hoic) **Gong-zou sou 20:18-30** gorngv, "Meih mbuo oix zuqc mbungh jienv oc. Oix zuqc goux longx meih mbuo ganh yaac goux longx Singx Lingsh bun meih mbuo goux wuov deix mienh. Oix zuqc goux Tin-Hungh nyei jiu-baang, dongh ninh longc ninh nyei Dorn nyei nziaamv maaiz nyei jiu-baang, hnangv yungz yungh nyei mienh goux ninh mbuo nyei yungh nor. Yie hiuv duqv yie leih nqoi meih mbuo liuz, nqa'haav maaih ciouv haic nyei hieh juv oix bieqc meih mbuo

gu'nyuoz. Ninh mbuo yaac maiv nyaangc naaiv deix yungh. Yiem meih mbuo gu'nyuoz zungv oix maaih mienh zorqv zien leiz tiuv benx jaav leiz nduov sienx Yesu nyei mienh mingh gan."

Goux ba'gi yungh mienh fai Zunh doz mienh orn hnyouv

Ba'gi yungh se maiv maaih hnyouv hnamv gorngv oix zuqc njoux ganh nyei maengc wuov nyungc hnyouv. Ninh mbuo za'gengh hnyouv suonc, maiv gunv zuqc mienh zoux doqc. Hungh heic nyei bun hiec juv daaih hoic daaih ngatc. Goux ba'gi yungh nyei mienh oix zuqc hiuv duqv ninh mbuo nyei nyei fiem fingx, goux longx ninh mbuo. Zunh doz ei Ziouv paaiv nyei mienh hnavg **1 Te^saa^lo^ni^gaa 5:14** gorngv nor, "*Zuangx gorx-youz aac, yie mbuo tov meih mbuo oix zuqc kuinx mienh lueic mienh, oix zuqc tengx daamv faix nyei mienh zungx daamv, oix zuqc tengx mau nyei mienh, yaac oix zuqc longc noic daaix zuangx mienh*Goux ba'gi yungh mienh fai Zunh doz mienh zoux bou tengx Ziouv zoux gong."

Yesu ganh zoux dunh yunh nyei nyungc zeiv gorngv ninh hnavg haaix nor goux ba'gi yungh. Bide heuc Yesu zoux, "*Goux Ba'gi Yungh nyei Domh Ziouv*" (**1 Bide 5:4**).

Yesu zoux njoux mbuo nyei Ziouv, Ninh zoux dorh mbuo nyei Ziouv, Ninh zoux goux mbuo nyei Ziouv, Ninh zoux orn mbuo nyei Ziouv.

Zoux zunh doz mienh se tengx Yesu goux ninh nyei ba'gi yungh nyei mienh oix zuqc goux longx dongh Yesu paaiv ninh goux nyei. Weic zuqc ninh zanc-zanc mangc jienv (Gong-zou 20:28) Weic zuqc ba'gi yungh fai sienx Yesu mienh se hnavg ba'gi yungh nor, mau, maiv haih tengx ganh, maiv zieqv duqv longx, haih mingh pien fai mingh dorngc javv.

Tengx Yesu goux ba'gi yungh za'gengh benx jienv yaac maiv zeiz hungg heic nyei gong. Zoux ziepc zuoqv nyei zunh doz mienh nyei zingh nyeic za'gengh hlo haic "*Taux Giduc, dongh Goux Ba'gi Yungh nyei Domh Ziouv, daaih wuov zanc, meih mbuo ziouc duqv maiv haih mitc nyei njang-laangc ningv.*" (**1 Bide 5:4**)

Se gorngv haaix norm jiu-bang maaih ziepc zuoqv nyei zunh doz mienh, maaih zunh doz mienh ei jienv Ziouv paaiv ninh zoux nyei gong, zoux ba'gi yungh mienh oix zuqc muangx jienv dorh nyei Ziouv nor za'gengh zoux bun ninh mbuo nyei gong heng nyei. (Hipv^lu 13:17 "*Oix zuqc muangx meih mbuo nyei bieiv zeiv yaac mbuoqc ninh mbuo gunv. Ninh mbuo zanc-zanc goux jienv meih mbuo weic zuqc ninh mbuo oix zuqc gorngv mengh ninh mbuo zoux nyei gong mbuox Tin-Hunggh. Oix zuqc muangx ninh mbuo weic bun ninh mbuo njien-youh nyei zoux ninh mbuo nyei gong. Maiv zeiv aeqv, ninh mbuo nzauh. Naaiv yaac maiv tengx haaix nyungc meih mbuo.*"

Sienx liuz Tin-Hunggh mbuo corc maaih waac camv nyei naaic taux mbuo sienx nyei. Mv baac Tin-Hunggh nyei waac yiem Ging-sou haih dau dongh mbuo qiemx zuqc hiuv nyei. Weic zuqc "*Douc-douc Ging-Sou, Tin-Hunggh dorh mienh fiev yaac maaih lamh longc weic njaaux mienh, weic gorngv-hemx mienh, weic zorc mienh zoux dorngc nyei dorngx, weic njaaux mienh zoux horpc nyei javv.*" (**2 Ti^mo^tai 3:16**)

©Yauzsing 2013

Longc Zunh doz qiex/Audio, Fangx Naangh/Video, Zoc Nyei Sou/Writing, caux Fangx
Linh/Power Point nyei leiz/policy:

Gunv zorqv mingh longc caux aamx cuotv duqv weic juangc jienv bun Ziouv nyei kuv fienv gormx lungx ndiev. Mv baac tov:

1. Oix zuqc aamx cuotv nzengc, maiv dungx gatv (edit-tipv fai zorqv cuotv) zunh doz nyei waac fai fiev nyei sou.
2. Maiv haih longc nyaanh, maiv gunv meih ganh ndortv aamx nyei zinh.
3. Maiv haih zorqv zunh nyei doz fai fiev nyei sou aan meih nyei website, kungx haih kuangx/link hngangv cuotv liuz mbuox ndangc.
4. **Tov maiv dungx yienc fai pienv Yauzsing gorgngv nyei eix-leiz weic maiv oix pien caux pienv Ziouv nyei waac.**
5. Tov tengx jienv zorc oc. Laengz zingh mienh muoz. A'hneiv duqv juangc jienv bun Ziouv nyei kuv fienv haih gormx lungx ndiev.

